

# Icamanal Toteco Cati Quiijcuilo Lucas

*Lucas quitajcuilhui Teófilo cati Jesús quichijqui*

<sup>1</sup> Noicni Teófilo, miyaqui tacame quichijtoque campeca quiijcuirose nochí nopa tamanti cati panotiyajque toixpa ipan inemilis Jesucristo. <sup>2</sup> Quiijcuilojtoque cati nopa tacame cati tepohuilijque icamanal techilhuijque para quiitztiyajque ten quema pejque nejnemij ihuaya Jesús. <sup>3</sup> Huan huajca na nojquiya nimoilhui cuali para nimitztajcuilhuis nochí cati panoc ten quema tacatqui Jesús huan quenicatza panotiyajqui hasta itamiya, pampa ica yolic nijtemojtoc cati melahuac ica nochí ni tamanti. Huajca noicni Teófilo cati nochí mitztepanitaj miyac, ama nimitztajcuilhuis nochí <sup>4</sup> para tijmachilis nelía temachti nopa tamanti cati masehualme ya mitzmachtijtoque.

*Tacatis Juan cati tecuaaltis*

<sup>5</sup> Ipan nopa tonali quema tanahuatiyaya Herodes el Grande ipan estado Judea, itztoya se totajtzi itoca Zacarías cati tequitic ipan nopa Abías pamit ten totajtzitzi. Zacarías quipixqui isihua cati itoca Elisabet huan nochí ome eliyayaj iteipan ixhuihua nopa totajtzi Aarón cati huejcajquiya itztoya. <sup>6</sup> Zacarías huan Elisabet itztoyaj xitahuaque iixpa Toteco. Quintoquilijque itanahuatilhua Toteco huan nochí cati yaya quinnahuati ma quichihuaca. Yeca amo aqui

huelqui quintaijilhui ica yon se tamanti fiero.  
<sup>7</sup> Pero amo quipiyayaj yon se conet pampa Elisabet amo hueliyaya quinpiya coneme, huan inijuanti ya huehuejtixtoyaj.

<sup>8</sup> Huan se tonali Zacarías quichihuayaya itequi nepa tiopan calijtic iixpa Toteco, pampa quitocaro se ipan nopa Abías pamit ten totajtzitzitzi ma tequitica. <sup>9</sup> Huan quej momatque quichihuaj totajtzitzitzi, mahuiltijque ica piltetzitzitzi para quiitase ajquiya ten inijuanti Toteco quitapejpenisquía para quitatis nopa copali iixpa Toteco ipan nopa hueyi israelita tiopamit. Huan quinexti para elqui Zacarías cati monequi quitatis. <sup>10</sup> Huan ipan nopa hora quema Zacarías quitatiyaya nopa copali tiopan calijtic, moquetzayabaj calteno miyaqui masehualme cati motatajtiyayaj ica Toteco. <sup>11</sup> Huan nimantzi monexti se iilhuicac ejca Toteco iixpa Zacarías. Moquetzaco ica inejmat nopa taixpamit campa quitatiyaya copali. <sup>12</sup> Huan Zacarías tahuel momajmati quema quiitac. <sup>13</sup> Pero nopa ilhuicac ejquet quilhui:

—Zacarías, amo ximomajmati. Toteco quicactoc cati tijtajtaniyaya, huan mosihua Elisabet quipiyas se piloquichpiltzi huan tijtocaxtis Juan. <sup>14</sup> Tahuel anpaquise quema tacatis huan paquise amohuaya miyaqui masehualme, <sup>15</sup> pampa yaya quipiyas se hueyi tequit iixpa Toteco. Amo quiis xocomeca at, yon amo quiis se taili nelcococ. Yaya elis temitoc ica Itonal Toteco hasta quema noja itztos ipan inana. <sup>16</sup> Huan yaya quichihuas para miyaqui israelitame ma moyolpataca huan ma quitoquilica Toteco Dios. <sup>17</sup> Juan quipiyas

italnamiquilis huan ichicahualis quej nopa tajtolpanextijquet Elías huejcajquiya quipixtoya. Huan yaya quiyacanas Tohueyiteco para quincualtalilis iniyolo masehualme para ma quiselica. Quichihuas para tetajme ma moyoltalica huan ma itz-toca ica cuali ica ininconehua. Huan quichihuas para masehualme cati amo teno quitepanitaj, ma tatepanitaca.

<sup>18</sup> Huan Zacarías quitatzintoquili nopa ilhuicac ejquet:

—¿Quenicatza huelis nijmatis para temachti cati techilhuía? Nosihua huan na ya tihuehuejtix-toque.

<sup>19</sup> Huan nopa ilhuicac ejquet quinanquili:

—Na niGabriel. Nochipa nimoquetza iixpa Toteco. Yaya nechtitanqui ma nimitzcamanal-huiqui huan ma nimitzyolmelahua ten icamanal Toteco. <sup>20</sup> Pero pampa amo tijneltocac nocamanal, tielis tinonotzi huan amo huelis ticamanaltis hasta tacatis mocone. Huan nochí ni tamanti panos quema ajsis nopa tonali cati Toteco quitalijtoc.

<sup>21</sup> Huan nopa miyaqui masehualme noja quichiyayaj calteno quema nopa ilhuicac ejquet quicamanalhuiyaya Zacarías. Moilhuiyayaj para ten Zacarías huejcahuayaya tiopan calijtic. <sup>22</sup> Huan quema Zacarías quisqui, amo hueliyaya camanalti. Huajca quimatque para quiitztoya se tanextili ten Toteco tiopan calijtic. Huan Zacarías san tamanexti, pampa eltoya nonotzi.

<sup>23</sup> Teipa tanqui nopa tonali cati quitocaro Zacarías para tequitis quej totajtzi, huan yaya

mocuetqui ichaj. <sup>24</sup> Huan isihua Elisabet coneucuic, huan teipa senitztoya calijtic huan amo cana yajqui para macuili metzti. Huan isihua moilhuiyaya: <sup>25</sup> “Toteco nechtiochijtoc miyac, pampa ama niconehue huan ayecmo nipinahuas iniixpa sequinoc pampa amo nijpixtoya se nocone.”

*Iilhuicac ejca Toteco quiyolmelajqui María para tacatis Jesucristo*

<sup>26</sup> Elisabet ya quipixtoya icona ipan itacayo se chicuase metzti quema Toteco quititanqui iilhuicac ejca cati itoca Gabriel ma yahui hasta altepet Nazaret ipan estado Galilea <sup>27</sup> para quimacas se ichpocat itoca María se camanalí. Huan María itztoya se cuali ichpocat cati amo quema quiixmajtoya se tacat huan ya quiijtantoya se telpocat cati itoca José cati eliyaya iteipan ixhui Tanahuatijquet David ten huejcajquiya. <sup>28</sup> Huan Gabriel calajqui campa María itztoya huan quiilhui:

—Xipaqui ta cati Toteco mitzcualita. Toteco itztoc mohuaya huan achi más mitztiochijtoc que sequinoc sihuame.

<sup>29</sup> Pero quema María quiitac nopa ilhuicac ejquet, san quitachili huan quitetzaitac huan moilhui taya quiijtosnequi para quej nopa quitajpalo.

<sup>30</sup> Huan nopa ilhuicac ejquet quiilhui:

—Amo ximomajmati María. Toteco mitztapejpenijtoc para mitztiochihuas tahuel miyac. <sup>31</sup> Nimantzi ticonehue tielis huan teipa tijtacatiltis se oquichpil huan tijtocaxtalis Jesús. <sup>32</sup> Yaya elis hueyi iixpa Toteco. Huan masehualme quiixmatise para Icone Toteco Dios Cati Más

Quipiya Tanahuatili. Huan Toteco quichihuas ma mosehuis huan tanahuatis campa tanahuatiyaya ihuejcapan tata David. <sup>33</sup> Huan quipiyas tequiticayot ica israelitame para nochipa huan amo quema tamis itanahuatilis.

<sup>34</sup> Huajca María quitatzintoquili nopa ilhuicac ejquet:

—¿Quenicatza niconehue nielis, huan amo quema niitztoya ihuaya se tacat?

<sup>35</sup> Huan nopa ilhuicac ejquet quinanquili:

—Itonal Toteco hualas ipan ta, huan ichicahualis Toteco Dios Cati Más Quipiya Tanahuatili mitzixtzacuas huan ticonehue tielis. Huan yeca mocone elis nelía tatzejzeloltic, huan masehualme quiixmatise para Icone Toteco. <sup>36</sup> Huan momachicni Elisabet nojquiya quipiyas icone masque ya nanatzi. Huan masque masehualme quiijtohuaj amo hueli coneipyas, ama ya quipixtoc icone ipan itacayo chicuase metzti. <sup>37</sup> Amo onca yon se tamanti cati Toteco amo hueli quichihuas. Yaya nochí hueli.

<sup>38</sup> Huajca María quijito:

—Na niajaxca Toteco. Nica niitztoc para nijchihuas nochí cati nechnahuatis ma nijchihua. Ma nochí mochihua quej techilhuijtoc.

Huajca ica ya ni, quistejqui nopa ilhuicac ejquet.

### *María quipaxaloto Elisabet*

<sup>39</sup> Teipa María mocualtali huan moisihuilti yajqui se altepet ipan estado Judea campa onca miyac tepeme, <sup>40</sup> campa ichaj Zacarías. Huan calaquito huan quitajpalo Elisabet.

**41** Huan quema Elisabet quicajqui para María quinojnotzqui, icono Elisabet mojmolini iijtico. Huan Itonal Toteco quitelemi Elisabet, **42** huan chicahuac Elisabet quiilhui María:

—Ipan nochí sihuame achi más Toteco mitzti-ochijtoc ta, huan nojquiya quitiochijtoc mocone. **43** Nelía se hueyi tatepanitacayot para na, pampa ta tiinana nohueyiTeco techpaxaloco. **44** Quema technojnotzqui, nimantzi nocone mojmolini ica paquilisti noiijtico. **45** Toteco mitztiocchijtoc pampa tijneltocac para temachtí quichihuas cati quiijtojtoc.

**46** Huan María quiijto:

“Tahuel nijhueyichihua Tohueyiteco ipan noyolo.

**47** Quena, nipaqui miyac ipan Toteco Dios, yaya cati notemaquixtija.

**48** Pampa masque san niitequipanojca, huan san niteicneltzi, yaya nechelnamijqui, huan ama masehualme cati tacajtiyase para nochipa quiijtose para Toteco nechtiochijtoc.

**49** Quena, Toteco Cati Quipiya Nochi Chicahualisti nechchihuilijtoc huejhueyi tamanti.

Tahuel tatzejtzeloltic ya.

**50** Toteco quintasojta nochí masehualme cati quitepanitaj ama,

huan nochí cati teipa tacajtiyase huan quitepani-tase.

**51** Quena, quichijtoc huejhueyi tamanti ica ihueyi chicahualis.

Quintzontamiltijtoc cati mohueyimatiyayaj ipan iniyolo.

**52** Toteco quinquixtilijtoc inintequiticayo tacame  
cati tanahuatiyayaj,  
huan quinhueyitalijtoc masehualme cati moech-  
capanohuaj iixpa.

**53** Miyac tatiochihualisti Toteco quinmacatoc  
masehualme cati mayanayayaj,  
pampa quinixhuiti.

Huan masehualme cati quipixque miyac tomi  
quinmajcajqui san inimax.

**54** Miyac techpalehuijtoc tiisraelitame pampa ti-  
itequipanojcahua.

Techtasojtatoc huan amo techelcajtoc.

**55** Quitencahuili Abraham, tohuejcapan tata,  
para quitasojtasquía ya inihuaya iteipan ixhuihua  
para nochipa,

huan yeca techtasojtatoc tojuanti.”

Quej nopa quijito María.

**56** Huan María mocajqui ihuaya Elisabet nechca  
eyi metzti, huan teipa mocuetqui ichaj.

### *Tacatqui Juan cati tecuaaltis*

**57** Teipa ajsic tonali para Elisabet conepiyas,  
huan quitacatilti se oquichpil. **58** Huan nochia  
icalnechcahua huan ihuicalhua quicajque  
quenicatza Toteco tahuel quitasojtatoya Elisabet  
huan quimacatoya icona, huan huajca nochia  
paquiyayaj ihuaya. **59** Huan quema nopa  
piloquichpiltzi quipixqui chicueyi tonati,  
nochia hualajque para quipiltequilise nopa  
machiyot cati itoca circuncisión ipan ipiltacayo  
quej momajtoyaj quichihuaj. Huan nochia  
quinequiyayaj quitocaxtise Zacarías quej itata.  
**60** Pero inana quijito:

—Amo tijtocaxtise Zacarías, tijtocaxtise Juan.

<sup>61</sup> Huan quiilhuijque:

—¿Para ten? Yon se amotata amo quipixqui itoca Juan.

<sup>62</sup> Huan quimanextilijke itata para quimatise taya itoca quinequiyaya quitalilis. <sup>63</sup> Huan Zacarías quintajtani ma quihualiquilica cati ipan tajcuilos. Huan Zacarías quiijcuilo: “Itoca elis Juan.” Huan nochí inihuampoyohua san quitachilijque huan quitetzaitaque. <sup>64</sup> Huan nimantzi pejqui quiolinía inenepil Zacarías, huan pejqui camanalti huan quipaquilismaca Toteco. <sup>65</sup> Huan inincalnechcahua quiitaque ten panoc, huan nochí tahuel momajmatijque. Huan teipa nochí masehualme cati itztoyaj campa hueli campa tepeyo nepa ipan estado Judea mocamanalhuiyayaj se ica seyoc cati panoc. <sup>66</sup> Huan nochí cati quicajque cati panoc moilhuiyayaj: “¿Taya elis ni piloquichpiltzi quema moscaltis?”

Quej nopa quiijtohuayayaj pampa quiitayayaj para Toteco nelía quitalijtoya imax ipan nopa oquichpil para quitiochihuas.

### *Icamanal Zacarías*

<sup>67</sup> Huan nimantzi Itonal Toteco quitemiti Zacarías, itata nopa pilconetzi, huan yaya pejqui quiijtohuá ni camanali cati Toteco quimacac. Quiijo:

<sup>68</sup> “Ma tijhueyichihuaca Toteco Dios ten tiisraelitame,

pampa hualajtoc techmaquixtis tiimasehualhua.

<sup>69</sup> Techtitanilía se Temaquixtijquet cati quipiya hueyi chicahualisti.

- Yaya elis se iteipan ixhui Tanahuatijquet David  
cati huecajquiya eliyaya itequipanojca.
- <sup>70</sup> Quej Toteco techtencahuili huecajquiya ica ita-  
jtolpanextijcahua cati tatzejzeloltique,
- <sup>71</sup> ama yaya techmaquixtis ten tocualancaitac-  
ahua huan ten inijuanti cati amo quinequij  
techitase.
- <sup>72</sup> Quintasojtac tohuejcapan tatahua,  
huan quielnamijqui nopa camanali tatzejzeloltic  
cati quitencahuili Abraham.
- <sup>73</sup> Quena, Toteco Dios motestigojquetzqui huan  
quitencahuili Abraham, tohuejcapan tata,
- <sup>74</sup> para techmanahuisquía ten tocualancaitacahua  
para huelis tijtequipanose ya huan amo  
timajmahuise.
- <sup>75</sup> Huelis tiitztose titatzejzeloltique iixpa huan  
tijchihuase cati cuali hasta timiquise.”
- <sup>76</sup> Huan teipa Zacarías quiilhui ipiloquichpil:  
“Tinopilcone, Toteco Cati Más Quipyia Tanahuatili  
mitztequitalijtoc tiitajtolpanextijca,  
huan ta titayacanas huan tijcualtalijtiyas iojhui  
Tohueyiteco cati hualas teipa.
- <sup>77</sup> Tiquinyolmelahuas iisraelita masehualhua  
para yaya cati hualas quinmaquixtis,  
pampa quintapojpolhuis inintajtacolhua.
- <sup>78</sup> Quena, Toteco techtasojta miyac,  
huan yeca techtitanilijtoc yaya cati elis quej to-  
nati,  
yaya cati hualas ten ilhuicac para techtaahuilis.
- <sup>79</sup> Quintaahuilis ipan iniyolo nochí masehualme  
cati nemij ipan tzintayohuilot huan campa  
onca miqulistí.

Huan quinnextilis quenicatza quipiyase tasehuilistiihuaya Toteco.”  
Quej nopa Zacarías quiijto.

<sup>80</sup> Huan nopa piloquichpiltzi Juan moscaltijtiyajqui huan motacachijqui huan Toteco quimacac chicahualisti ipan itonal. Huan teipa yaya itztoya ipan nopa tali huactoc campa amo teno elqui hasta ajsic tonali para monextis huan para israelitame ma quiixmatica.

## 2

### *Tacatqui Jesucristo (Mt. 1:18-25)*

<sup>1</sup> Ipan nopa tonali itztoya se hueyi tanahuatijquet cati itoca Augusto César huan yaya tanahuati para nochimasehualme ipan taltipacti ma moijsuiloca para taxtahuase impuesto.  
<sup>2</sup> Ipan nopa xihuit Cirenio itztoya gobernador ipan tali Siria, huan ya ni eltoya iniachtohui censo ipan nopa tonali. <sup>3</sup> Huan monequiyaya nochimasehualme ma yaca campa inialtepe para moijsuilose. <sup>4</sup> Huajca José quisqui altepet Nazaret ipan estado Galilea huan yajqui altepet Belén ipan estado Judea pampa nepa tacatqui Tanahuatijquet David ten huejcajquiya, huan José eltoya se iteipan ixhui. <sup>5</sup> Huan María, cati ya quiijtantoya, yajqui ihuaya para moijsuilose, huan ya conehue eliyaya. <sup>6</sup> Huan quema noja itztoyaj nepa Belén, ajsic tonali para coneipyas María. <sup>7</sup> Huan quitacatilti iachtohui cone, se piloquichpiltzi huan quipijqui ica peseli huan quitejqui ipan se cuacajo campa tacuaj tapiyalme

pampa amo quipantijque campa cochise ipan se cali para paxalohuani.

*Iilhuicac ejcahua Toteco quinyolmelahuacoj tamocuitahuiani*

<sup>8</sup> Huan ipan nopa tayohua itztoyaj sequij tamocuitahuiani cati quinmocuitahuiyaj ininborregojhua campa potrero nechca Belén. <sup>9</sup> Huan nimantzi se ilhuicac ejquet monexti iniixpa huan itatanex Toteco yahualtic quintaahuili huan inijuanti tahuel momajmatijque. <sup>10</sup> Pero nopa ilhuicac ejquet quinilhui: “Amo ximomajmatica. Nihualajtoc para nimechyoelmelahuas se cuali camanali cati quinmacas hueyi paquilsti nochimasehualme ipan taltipacti. <sup>11</sup> Amantzi nepa ipan Belén, ialtepe David, ya tacatqui amotemaquixtijca. Yaya nopa Cristo cati Toteco Dios quiijto techtitanilisquia. Yaya Tohueyiteco. <sup>12</sup> Huan ica ni tanextili anquixmatise. Anquipantise nopa piloquichpiltzi pictoc ica peseli huan quitectoque ipan se cuacajo campa tacuaj tapiyalme.”

<sup>13</sup> Huan nimantzi monextijque tahuel miyaqui ilhuicac ehuani ihuaya ya cati achtohui hualajqui, huan nochimajuanti quipaquilismacayayaj Toteco huan quiijtohuayayaj:

<sup>14</sup> “Ma tijhueyichihuaca Toteco cati itztoc ilhuicac. Huan ipan taltipacti ma onca tasehulisti ipan iniyolo nochimasehualme cati quichihuaj cati Toteco quipactía.”

<sup>15</sup> Huan nopa ilhuicac ehuani tacuepilijque ilhuicac, huan nopa tamocuitahuiani moilhuijque:

—Ma tiyacajya Belén nimantzi. Ma tiquitatij cati panoc cati Toteco techyolmelahuaco.

**16** Huan nopa tamocuitahuiani moisihuiltijiyajque huan quipantijque María ihuaya José ica nopa pilconetzi cati quitectoyaj ipan cuacajo. **17** Huan quema quiitaque, quisque huan quinpo-huilijque nochí masehualme cati nopa ilhuicac ejquet quinilhuijtoya ten nopa pilconetzi. **18** Huan nochí masehualme cati quicajque ten quijtojque san quintachilijque huan quitetzaitaque. **19** Pero María quiajojqui nochí inincamanal ipan iyolo huan moyolilhui ten nochí cati quijtojque. **20** Huan teipa nopa tamocuitahuiani tacuepilijque quihueyichijtiyajque, huan quipaquilismacatiyajque Toteco por nochí cati quicactoyaj huan quitztoyaj, pampa nelía quipantijque nochí quej nopa ilhuicac ejquet quinilhuijtoya.

*Quinextijque Jesús ipan hueyi israelita tiopamit*

**21** Quema Jesús quipixtoya chicueyi tonati, quipaltequilijque nopa machiyot cati itoca circuncisión ipan ipiltacayo. Huan quitocaxtijque Jesús quej quitocaxti nopa ilhuicac ejquet quema quipaxaloto María huan noja ayemo conehue eliyaya.

**22** Huan quema tanqui nopa tonali cati monejqui para María ma mocahua ichaj para motapajpacchihuas quej quijtojque itanahuatil Moisés, José huan María quihiuicaque Jesús hasta altepet Jerusalén para quinextitij iixpa Toteco. **23** Pampa ijcuilijtoc ipan itanahuatilhua Tohueyiteco campa quijtohua: “Nochi oquichpilme cati achtohui ehuani elise taiyocatalilme para iaxcahua Toteco.” **24** Huajca José huan María yajque para quicahuatij nopa tacajcahualisti cati quijtojque itanahuatilhua

Toteco para quicohuasquíaj ininpilcone sempa ica inintacajcahuialis. Monequi quincahuasquíaj ome piltototzitzo o ome palomas.

<sup>25</sup> Huan itztoya nepa Jerusalén se cuali tacat itoca Simeón cati quinneltocac nochi itanahuatilhua Toteco, huan quichiyayaya ma ajsi inintemaqueixtijca israelitame. Huan Itonal Toteco mocahuayayaya ipan Simeón. <sup>26</sup> Huan Itonal Toteco quinextilijtoya para amo miquisquía hasta quiitasquía nopa Cristo cati Toteco quititanisquía.

<sup>27</sup> Huajca Itonal Toteco quititanqui Simeón ma yahui ipan nopa hueyi israelita tiopamit ipan nopa tonali quema itatahua pilconetzi Jesús quihuicaque ipan nopa hueyi israelita tiopamit para ma quinextica iixpa Toteco huan quichihuase nochi cati quijtojque itanahuatil Moisés. <sup>28</sup> Huan Simeón quiitac nopa pilconetzi, huan quinahuaqui huan quihueyimatqui Toteco huan quiilhui:

<sup>29</sup> “NoTeco, ama nihueli nimquis ica tasehuilisti ipan noyolo,  
pampa ya niquitztoc ya ni cati techtencahuili para niquitasquía.

<sup>30</sup> Niquitztoc ica noixteyol yaya cati techtitanilijtoc para techmaquixtis ten totajtacolhua.

<sup>31</sup> Yaya ni cati tijtalijtoc iniixpa nochi masehualme ipan ni taltipacti.

<sup>32</sup> Yaya elis quej se taahuili cati quintaahuilis nochi masehualme huan quinnextilis Toteco,

masque amo israelitame huan itztoque ipan cati hueli tali.

Yaya elis tohueyitilis timoisraelita masehualhua.”

<sup>33</sup> Huan José huan María quitachiliyayaj cati quijtohuayaya Simeón ten nopa pilconetzi Jesús.

<sup>34</sup> Huan Simeón quintiochijqui huan quiilhui María:

—Xiquita, Toteco quitalijtoc ni oquichpil para elis quej se tanextili ten Toteco cati miyaqui masehualme quihuejcamajcahuase huan yeca injuanti huetzise. Pero sequinoc miyac masehualme tahuel paquise ica ya huan Toteco quinhueytalis. <sup>35</sup> Huan quej nopa tanemijya nesis cati moilhuíaj masehualme ipan iniyolo. Huan pampa yaya mocone, tijpantis se hueyi tequipacholi huan tijmachilis quej mitzyolquechilisquíaj se macheta.

<sup>36</sup> Nojquiya tiopan calijtic itztoya se sihua tajtolpanextijquet cati itoca Ana. Ana eliyaya iichpoca Fanuel, cati itztoya se iteipan ixhui Aser ten huejcajquiya. Huan quema noja eliyaya se ichpocat, Ana monamicti, huan itztoya ihuaya ihuehue san chicome xihuit huan ihuehue mijqui.

<sup>37</sup> Huan ama Ana ya quipixqui ochenta y cuatro xihuit para mijqui ihuehue. Huan amo cana yajqui, senitztoya hueyi tiopan calijtic. Quitequipanohuayaya Toteco tonaya huan tayohua, mosahuayaya huan motatajtiyaya. <sup>38</sup> Huan ipan nopa talojtzi quema Simeón quitachiliyaya Jesús, ajsico Ana, huan pejqui quitascamati Toteco por nopa piloquichpiltzi. Huan pejqui camanalti ten ya ica nochí nopa masehualme ipan Jerusalén cati quichiyayayaj ma ajsi nopa israelita Temaquixtijquet huan quinilhuiyaya para ya tacatqui nopa pilconetzi.

*José huan María tacuepilijque ipan altepet*

*Nazaret*

<sup>39</sup> Huan quema José huan María ya quichijtoyaj nochí nopa tamanti catí itanahuatilhua Toteco quinilhuijque ma quichihuaca, tacuepilijque inialtepe Nazaret ipan estado Galilea. <sup>40</sup> Huan nopa piloquichpiltzi Jesús moscaltijtiyajqui huan quipixtiyajqui chicahualisti. Huan quipixtiyajqui miyac italnamiquilis huan Toteco Dios quipixqui hueyi iyolo ica ya huan quitiochijqui miyac.

*Nopa oquichpil Jesús ipan hueyi tiopamit*

<sup>41</sup> Huan itatahua Jesús momatque yahuij altepet Jerusalén sesen xihuit ipan nopa ilhuit catí itoca Pascua\*. <sup>42</sup> Huan quema Jesús quipixtoya majtacti huan ome xihuit, yajqui ipan ilhuit inihuaya itatahua quej momatque quichihuaj. <sup>43</sup> Huan quema tantoya nochí tonali ten nopa ilhuit, Jesús mocajqui ipan altepet Jerusalén huan itatahua quisque huan tacuepiliyayaj ininchaj huan amo quimatque para mocajtoya. <sup>44</sup> Inijuanti moilhuiyayaj hualayaya ica nopa miyaqui masehualme catí nejnemiyayaj san sejco. Huan quema ya nejnentoyaj se tonal, pejque quitemohuaj campa inihuicalhua huan inihuampoyohua, <sup>45</sup> pero amo quipantijque. Yeca tacuepilijque ipan Jerusalén para quitemotij.

<sup>46</sup> Huan ica eyi tonati itatahua quipantijque Jesús hueyi tiopan calijtic, mosehuiyaya tatajcotipa ten nopa huejhueyi tamachtiani catí más momachtijtoyaj itanahuatil Moisés. Huan Jesús quintacaquiliyaya huan

---

\* **2:41** 2:41 Nopa ilhuit quema israelitame quielnamijque quenicitza Toteco quinchololti inihuejcapan tatahua ipan tali Egipto.

quintatzintoquiliyaya. <sup>47</sup> Huan nochí tacame catí quicaquiyayaj catí Jesús quijtohuayaya san quitachiliyayaj huan quitetzaitaque por italnamiquilis huan por icamanal pampa nelía cuál quinnanquiliyaya. <sup>48</sup> Huan quema itatahua quipantijque, quitetzaitaque. Huan inana quitatzintoquili:

—Nocone, ¿para ten timocajqui? Na ihuaya motata nelía timocuesojoque huan timitztemojtinentoque.

<sup>49</sup> Huajca Jesús tananquili:

—¿Para ten antechtemojque? ¿Amo anquimatiј para monequi nimotequihuis ica itequi noTata?

<sup>50</sup> Pero itatahua amo quimachilijque catí yaya quinilhui.

<sup>51</sup> Huan Jesús mocuetqui inihuaya hasta altepet Nazaret, huan quinneltoquilijtiyajqui nochí catí quinahuatiyayaj. Huan inana Jesús quitali ipan iyolo nochí tamanti catí panoc. <sup>52</sup> Huan Jesús talnamictiyajqui huan motacachijtiyajqui, huan Toteco Dios quipacti nochí catí quichijqui huan nojquiya quinpactiyaya masehualme.

### 3

*Juan catí tecuaaltiyaya tayolmelajqui para hualas Cristo*

(Mt. 3:1-12; Mr. 1:1-8; Jn. 1:19-28)

<sup>1</sup> Toteco quinotzqui Juan quema Tiberio César yahuiyaya para caxtoli xihuit tanahuatis ipan Roma huan ipan nochí talme catí Roma iaxcahua. Huan Poncio Pilato eltoya gobernador ipan estado Judea, huan Herodes Ántipas ipan estado Galilea. Huan iicni Herodes catí itoca Herodes Felipe II

eltoya gobernador ipan estados Iturea huan Traconite. Huan Lisanias eltoya gobernador campa itoca Abilinia. <sup>2</sup> Huan Anás huan teipa Caifás eltoyaj huejhueyi totajtzitzi. Huan ipan ni tonali Toteco quinotzqui Juan, itelpoca Zacarías, huan quimacac icamanal para tayolmelahuas quema yaya itztoya ipan nopa huactoc tali campa amo teno eli. <sup>3</sup> Huajca Juan pejqui nejnemi campa hueli ipan nopa tali nechca hueyat Jordán, huan tepohuilijtinemiyaya icamanal Toteco. Quinilhuiyaya masehualme ma moyolpataca, huan ma quicahuaca inintajtacolhua huan ma mocuaaltica para Toteco quintapojojhuis. <sup>4</sup> Cati Juan quichihuayaya quitamiltiyaya cati nopa tajtolpanextijquet Isaías huejcajquiya quiijcuilo para Juan quichihuasquía. Isaías quiijto:

“Masehualme quicaquise se cati camanaltis chichahuac ipan nopa huactoc tali campa amo teno eli.

Quiijtos:

Xijcualtalica amoyolo pampa hualas  
Tohueyiteco.

Xijsencahuaca huan xijxitahuaca iojhui para ipan nemis.

<sup>5</sup> Xijtemitica nochí campa taostotic.

Xijsepanoca campa tafiero,  
huan xijxitahuaca nochí ojhuijhuijcoli,  
huan xicalaxoca nochí talcojcomoli.

<sup>6</sup> Pampa hualas yaya cati Toteco Dios techtitanilijtoc para techmaquixtis ten totajtacolhua,  
huan nochí masehualme quiitase.’ ”  
Quej nopa quiijcuilo Isaías huejcajquiya.

<sup>7</sup> Huan miyaqui masehualme ajsiyayaj campa Juan para ma quincuaalti, huan yaya quinilhuiyaya:

—Ancohuame. ¿Ajquia amechilhuijtoc para Toteco amo amechatzacuiltis teipa sintia amocuaaltise? <sup>8</sup> Amo quej nopa. Monequi xijchihuaca cati cuali para nochia quimatise sintia nelia ya anmoyolpatatoque huan anquicajtejtoque amotajtacolhua. Amo ximoilhuica para amo teno amechajsis pampa aniteipan ixhuihua tohuejcapan tata Abraham, pampa Toteco hueli quincuepas ni teme iteipan ixhuihua Abraham sintia quinequi quichihuas. <sup>9</sup> Quej tacame quitzonterquij cuame cati amo temacaj inintajca huan quitatiaj, Toteco nojquiya ya itztoc para amechzontamiltis huan amechcuamajcahuas ipan tit.

<sup>10</sup> Huan nopa masehualme quitatzintoquili-jque:

—Huajca, ¿taya monequi tijchihuase?

<sup>11</sup> Huajca Juan quinilhui:

—Xijchihuaca cati cuali. Cati quipiya ome iyoyo ma quimaca se cati amo teno quipiya. Huan cati quipiya tacualisti nojquiya ma temajmaca.

<sup>12</sup> Huan nojquiya hualajque para mocuaaltise sequinoc tacame cati tainamaj impuesto, huan nochia masehualme quimatque para tahuel tacajcayahuaj, huan nopa tainamani quitatzintoquili-jque:

—Tamachtijquet, ¿taya monequi tijchihuase tojuanti?

<sup>13</sup> Huajca Juan quinilhui:

—San xiquininamac a masehualme cati quijto-hua nopa tanahuatili.

<sup>14</sup> Huan hualajtoyaj sequij soldados cati quitatz-intoquilijque:

—Huan tojuanti, ¿taya monequi tijchihuase?

Huajca Juan quinilhui:

—Amo xiquinchihualtica masehualme ma amechtamajmacaca. Amo aqui xijtelhuica ica cati amo nelía melahuac huan xipaquica san ica cati anquitanij.

<sup>15</sup> Huan amo molinijque nopa masehualme cati itztoyaj nopona. Nochi san quichiyayaj huan moyolilhuiyayaj sinta huelis Juan eliyaya nopa Cristo cati Toteco quitencajqui techtitanilisquía.

<sup>16</sup> Huajca Juan quinilhui nochi nopa masehualme:

—Na nimechcuaaltía san ica at, pero yaya cati hualas teipa quiipyas más chicahualisti que na. Ya nimechilhuijtoc ten ya. Amo nicaxilía para nijtequipanos, yon amo para nijquixtilis itecac. Yaya amechmacas sequij amojuanti Itonal Toteco huan sequinoc amechtatzacuiltis ica tit. <sup>17</sup> Yaya quiniyocatalis masehualme cati iaxcahua ica inijuanti cati amo. Quena, Toteco quichihuas quej se tacat cati quitequihuía itaajacapehuilol para quiyejyec-tis trigo. Quinhucas masehualme cati iaxcahua quej se tacat quitalis itrigo ipan icuacalhua. Huan nopa sequinoc masehualme quintatis ipan tit cati amo quema sehuis quej se tacat quitatis itasolo trigo.

<sup>18</sup> Quej nopa, Juan quinyolmelajqui nochi nopa masehualme miyac tamanti quema quincamanal-huiyaya ten icamanal Toteco. <sup>19</sup> Huan teipa Juan quitelhui Gobernador Herodes Ántipas pampa mocuili ihuejpol cati itoca Herodías para elis

isihua. Herodías eliyaya isihua iicni cati itoca eliyaya Herodes Felipe II. Nojquiya Juan quitelhui Herodes Ántipas ica sequinoc tamanti cati fiero quichihuayaya.<sup>20</sup> Huajca nopa Gobernador Herodes Ántipas noja más fiero quichijqui huan quitzajqui Juan.

*Juan quicuaalti Jesús  
(Mt. 3:13-17; Mr. 1:9-11)*

<sup>21</sup> Pero quema ayemo quitzactoyaj Juan, quincuaaltiyaya miyaqui masehualme, huan Jesús nojquiya hualajqui campa itztoya huan mocuaalti. Huan ipan nopa talojtzi quema mocuaaltiyaya, Jesús motatajtiyaya huan tapojqui ilhuicac,<sup>22</sup> huan hualtemoc Itonal Toteco ipan ya. Huan Itonal Toteco nesiyaya quej se paloma. Huan Toteco Dios camanaltic ten ilhuicac huan quiilhui Jesús:

—Ta tiNocone cati nimitzicnelía huan nipaqui miyac ica cati tijchihua.

*Ihuejcapan tatahua Jesús  
(Mt. 1:1-17)*

<sup>23</sup> Huan Jesús quipixtoya se treinta xihuit quema quipehualti itequi huan pejqui nentinemi para tepohuilis icamanal Toteco. Huan masehualme moilhuiyaya para eliyaya icono José.

Huan José eliyaya icono Elí,  
<sup>24</sup> cati eliyaya icono Matat,  
cati eliyaya icone Leví,  
cati eliyaya icone Melqui,  
cati eliyaya icone Jana,  
cati eliyaya icone José,

25 cati eliyaya icone Matatías,  
cati eliyaya icone Amós,  
cati eliyaya icone Nahúm,  
cati eliyaya icone Esli,  
cati eliyaya icone Nagai,  
26 cati eliyaya icone Maat,  
cati eliyaya icone Matatías,  
cati eliyaya icone Semei,  
cati eliyaya icone José,  
cati eliyaya icone Judá,  
27 cati eliyaya icone Joana,  
cati eliyaya icone Resa,  
cati eliyaya icone Zorobabel,  
cati eliyaya icone Salatiel,  
cati eliyaya icone Neri,  
28 cati eliyaya icone Melqui,  
cati eliyaya icone Adi,  
cati eliyaya icone Cosam,  
cati eliyaya icone Elmodam,  
cati eliyaya icone Er,  
29 cati eliyaya icone Josué,  
cati eliyaya icone Eliezer,  
cati eliyaya icone Jorim,  
cati eliyaya icone Matat,  
30 cati eliyaya icone Leví,  
cati eliyaya icone Simeón,  
cati eliyaya icone Judá,  
cati eliyaya icone José,  
cati eliyaya icone Jonán,  
cati eliyaya icone Eliaquim,  
31 cati eliyaya icone Melea,  
cati eliyaya icone Mainán,  
cati eliyaya icone Matata,

cati eliyaya icone Natán,  
<sup>32</sup> cati eliyaya icone David,  
cati eliyaya icone Isaí,  
cati eliyaya icone Obed,  
cati eliyaya icone Booz,  
cati eliyaya icone Salmón,  
cati eliyaya icone Naasón,  
<sup>33</sup> cati eliyaya icone Aminadab,  
cati eliyaya icone Aram,  
cati eliyaya icone Esrom,  
cati eliyaya icone Fares,  
cati eliyaya icone Judá,  
<sup>34</sup> cati eliyaya icone Jacob,  
cati eliyaya icone Isaac,  
cati eliyaya icone Abraham,  
cati eliyaya icone Taré,  
cati eliyaya icone Nacor,  
<sup>35</sup> cati eliyaya icone Serug,  
cati eliyaya icone Ragau,  
cati eliyaya icone Peleg,  
cati eliyaya icone Heber,  
cati eliyaya icone Sala,  
<sup>36</sup> cati eliyaya icone Cainán,  
cati eliyaya icone Arfaxad,  
cati eliyaya icone Sem,  
cati eliyaya icone Noé,  
cati eliyaya icone Lamec,  
<sup>37</sup> cati eliyaya icone Matusalén,  
cati eliyaya icone Enoc,  
cati eliyaya icone Jared,  
cati eliyaya icone Mahalaleel,  
cati eliyaya icone Cainán,

<sup>38</sup> cati eliyaya icone Enós,  
cati eliyaya icone Set,  
cati eliyaya icone Adán,  
cati eliyaya icone Toteco Dios.

## 4

*Amocualtacat quinejqui quiyoltilanás Jesús  
(Mt. 4:1-11; Mr. 1:12-13)*

<sup>1</sup> Huan Jesús quisqui hueyat Jordán temitoc ica Itonal Toteco. Huan Itonal Toteco quihuicac hasta nopa huactoc tali campa amo teno eli. <sup>2</sup> Huan mocajqui nepa para cuarenta tonali huan Amocualtacat quiyoltilanayaya para ma tajta-colchihua. Huan ipan nochí nopa tonali amo teno quicuajqui, huan quema tanqui nopa tonali, nelía mayanayaya. <sup>3</sup> Huan hualajqui Amocualtacat qui-ilhuico:

—Sinta nelía tiIcone Toteco, xijnahuati ni tet ma mocuepa pantzi.

<sup>4</sup> Huan Jesús quinanquili:  
—Ijcuilijtoc ipan Icamanal Toteco campa quijj-tohua: ‘Amo san ica pantzi itztose masehualme. Nojquiya monequi quitoquilijtinemise nochí Icamanal Toteco.’

<sup>5</sup> Huan Amocualtacat quihuicac Jesús ipan se te-pet huejcapantic, huan ipan nopa talojtzi quinextili iniricojyo nochí tanahuatiani ipan taltipacti, huan nochí talme cati iniaxcahua. <sup>6</sup> Huan Amocualtacat quiilhui:

—Nimitzmacas tequiticayot tijnahuatis nochí ni talme ipan nochí taltipacti huan nimitzmacas nochí iniricojyo, pampa nochí nechmacatoque na huan huelis nijmacas cati nijnequis. <sup>7</sup> Huan

nochi nimitzmacas ta sinta san timotancuaquetzas huan techhueyimatis.

<sup>8</sup> Huan Jesús quinanquili:

—Techtalcahui, Amocualtacat, pampa ijcuilijtoc ipan Icamanal Toteco campa quijtohua: ‘Xihueyimati san Toteco Dios huan san ya xijtequipano.’

<sup>9</sup> Huan Amocualtacat quihuicac Jesús altepet Jerusalén, huan quiquetzqui hasta iixco nopa hueyi israelita tiopamit huan quiilhui:

—Sinta nelía tilcone Toteco Dios, xihuitoni nica para tatzinta, <sup>10</sup> pampa ijcuilijtoc ipan Icamanal campa quijtohua:

‘Toteco quinnahuatis iilhuicac ejcahua ma mitzmocuitahuica.

<sup>11</sup> Inijuanti mitzmanamiquise para amo timoicxicocos ica yon se tet.’

<sup>12</sup> Huan Jesús quinanquili:

—Nojquiya Icamanal Toteco quijtohua: ‘Amoxijyejyeco Toteco Dios san para tiquitas taya quichihuas.’

<sup>13</sup> Huan quema Amocualtacat ya quichijtoya campeca para quiyoltlanas Jesús ma tajtacolchihua, quicajtejqui hasta seyoc huelta.

*Jesús pejqui tamachtía ipan estado Galilea  
(Mt. 4:12-17; Mr. 1:14-15)*

<sup>14</sup> Teipa Jesús tacuepili ipan estado Galilea temitoc ica ichicahualis Itonal Toteco, huan campa hueli ipan nochí nopa tali nochí masehualme quicaquiyayaj ten ya. <sup>15</sup> Huan pejqui quinmachtijtinemi masehualme ipan israelita tiopame campa hueli huan nochí quihueyimatiyayaj.

*Jesús itztoya ipan pilaltepetzi Nazaret  
(Mt. 13:53-58; Mr. 6:1-6)*

<sup>16</sup> Huan Jesús ajsito pilaltepetzi Nazaret campa moscalti huan ipan sábado, nopa tonali para ma mosiyajquetzaca israelitame, yaya calajqui ipan israelita tiopamit quej momajtoya quichihua. Huan moquetzqui ipan tasentilisti para quipohuas Icamanal Toteco. <sup>17</sup> Huan quimacaque nopa amatapohuali cati huejcajquiya quiijcuilo nopa tajtolpanextijquet Isaías. Huan Jesús quitapo huan quipanti campa ijcuilijtoc ni camanali, huan pejqui quipohua:

<sup>18</sup> “Itonal Toteco itztoc ipan na,  
pampa Toteco nechtequimacatoc para ma  
niquinlhui masehualme cati teicneltzitz  
icamanal Toteco.

Nechtitantoc ma niquinchicahua masehualme  
cati mocuesohuaj,  
huan para ma niquinyolmelahuas masehualme  
cati Amocualtacat quinilpitoc para nihueli  
niquintojtomas.

Nechtequimacac para niquinchicahuas popoyotz-  
itzi para huelise tachiyase.

Huan niquintojtomas nochí cati taijyohuíaj ini-  
maco cati quintaijyohuilitáj.

<sup>19</sup> Nechtitantoc ma niquinyolmelahuas nochí para  
ya ajsic nopa tonal,  
quema Toteco quinchihuilis masehualme se cuali  
tacayot.”

<sup>20</sup> Huan Jesús quitzajqui nopa momimilojtoc  
amatapohuali huan quimacac nopa tiapan tapale-  
huijquet, huan mosehui para tamachtis. Huan  
nochí nopa masehualme cati itztoyaj ipan nopa

tasentilsti quitachiliyayaj. <sup>21</sup> Huan Jesús pejqui quincamanalhuía huan quinilhui:

—Ni camanali cati nijpojqui moijcuilo huejcajquiya huan camanalti ten na cati nimoquetza amoixpa. Huajca ama motamichihua cati quiijtohua.

<sup>22</sup> Huan nochí nopa masehualme camanaltiyayaj cuali ten Jesús huan quitetzatayayaj huan quitachiliyayaj ica icamanal cati nelía yejyectzi, pero motatzintoquiliyayaj:

—¿Amo ya ni icono José?

<sup>23</sup> Huan Jesús quinilhui:

—Nijmati se tonali antechilhuise ni camanali: ‘Tepajtijquet ximopajti, huan timitzneltocase.’ Anquijtose para anquicactoque nopa tiochicahualnescayot cati nijchijtoc ipan altepet Capernaum, huajca san se ma nijchihua nica ipan ni amoaltepe. <sup>24</sup> Pero masehualme cati san sejco ehuani cati hueli tajtolpanextijquet amo quiselíaj. <sup>25</sup> Huan quema itztoya Elías, nopa tajtolpanextijquet ten huejcajquiya, itztoyaj miyac israelita sihuame cati mictoyaj inihuehuejhua ipan tali Israel campa yaya ejqui. Huan nochí nopa sihuame icnotzitzi quinpolohuayaya inintacualis pampa amo huetzqui at para eyi xihuit huan tajco ipan tali Israel huan oncac se hueyi mayanti. <sup>26</sup> Pero Toteco amo quititanqui Elías ma yahui ica se israelita toahui cati icnotzi cati san sejco ehuani. Quititanqui ma quipalehuiti nopa toahui cati icnotzi ipan pilaltepetzi Sarepta ipan seyoc tali cati itoca Sidón. <sup>27</sup> Huan itztoyaj miyaqui masehualme ipan tali Israel cati

tacayo palaniyayaj ica lepra quema itztoya tajtolpanextijquet Eliseo, pero Eliseo yon se inijuanti amo quichicajqui. San quichicajqui Naamán cati hualajqui ipan seyoc tali cati itoca Siria.

<sup>28</sup> Huajca nelía cuelanque nochí nopa israelitame cati quitacaquiliyayaj Jesús ipan nopa israelita tiopamit. <sup>29</sup> Huan motananque huan quiqxintijque Jesús ten inialtepe. Teipa quihuicaque hasta iixco nopa tepet cati ipan quichijchijtoyaj nopa altepet. Quinequiyayaj quicuamimilose, <sup>30</sup> pero Jesús san panotquisqui tatajco ten inijuanti huan yajqui.

*Se tacat ica iajacayo Amocualtacat  
(Mr. 1:21-28)*

<sup>31</sup> Huan Jesús ajsito altepet Capernaum ipan estado Galilea huan pejqui tamachtía ipan israelita tiopamit sese sábado, nopa tonal para israelitame ma mosiyajquetzaca. <sup>32</sup> Huan nochí cati quitacaquiliyayaj san quitachiliyayaj huan quitetzaitayayaj ica itamachtil, pampa icamanal quipixqui tequiticayot.

<sup>33</sup> Huan itztoya se tacat ipan nopa israelita tiopamit cati quipixqui ipan itacayo se iajacayo Amocualtacat. Huan yaya tzajtzic chicahuac huan quiilhui Jesús:

<sup>34</sup> —Jesús, tiNazaret ejquet, techcahua. Amo huelis timomatise mohuaya. ¿Tihualajtoc para techtzontamiltis? Tojuanti timitzixmatij ajquiya ta. Ta titatzejzelotic. Ta tiIcone Dios.

<sup>35</sup> Huan Jesús quitacahualti iajacayo Amocualtacat huan quiilhui:

—Amo ximolini. Xiquisa ipan ni tacat.

Huan nopa ajacat quimajcajqui nopa tacat talchi inixpa nochí nopa masehualme, huan teipa quisqui ipan itacayo huan amo teno más quichihuili. <sup>36</sup> Huan nochí nopa masehualme quitachiliyayaj huan quitetzaitayayaj huan pejque motatzintoquilíaj se ica seyoc:

—¿Taya tamanti ya ni? Tanemijya nesi para icamanal Jesús quipiya tanahuatili huan chicahualisti pampa quema quinnahuatía iajacahua Amocualtacat, nopa ajacame quineltoquilíaj huan quisaj.

<sup>37</sup> Huan campa hueli ipan nopa tali nechca altepet Capernaum nochí masehualme quimatque cati Jesús quichihuaya.

*Jesús quichicajqui imona Simón Pedro*

*(Mt. 8:14-15; Mr. 1:29-31)*

<sup>38</sup> Huan Jesús moquetzqui huan quisqui ipan tiopamit huan yajqui ichaj Simón Pedro. Huan quipanti imona Pedro mococohua pampa chicahuac totoniyayaya, huan nochí cati itztoyaj nepa quitajtanijque Jesús ma quichicahua. <sup>39</sup> Huajca Jesús mohuijtzonqui campa huetztoya huan quinahuati nopa tatotonilot ma quisa. Huan nopa tatotonilot quicajtejqui, huan nimantzi moquetzqui nopa sihuat huan pejqui quintamacá.

*Jesús quinchicajqui miyac cocoyani*

*(Mt. 8:16-17; Mr. 1:32-34)*

<sup>40</sup> Huan ica tiotac nochí masehualme cati quinpixtoyaj cocoyani ipan ininchajchaj quinhualicaque campa Jesús. Huan itztoyaj cocoyani

cati quipixque miyac tamanti cocolisti. Huan Jesús quitali imax ipan sesen nopa cocoyani huan quinchicajqui. <sup>41</sup> Huan miyac masehualme nepa quinpixtoyaj iajacahua Amocualtacat huan nopa ajacame quisayayaj huan chicahuac quiijto-huayayaj ten Jesús:

—Ta tiIcone Dios.

Pero Jesús quinnahuati nopa ajacame ma ayecmo camanaltica pampa inijuanti quiixmatiyayaj yaya itztoya nopa Cristo cati Toteco quiijto quititanisquía.

*Jesús tepohuili ipan estado Galilea  
(Mr. 1:35-39)*

<sup>42</sup> Huan quema tanestihualayaya, Jesús quisqui nepa, huan yajqui ipan nopa huactoc tali campa amo teno eli. Huan miyaqui masehualme quite-mohuayayaj huan quema quipantijque, quiilhuijque ma mocahua ipan inintal. <sup>43</sup> Pero Jesús quinilhui:

—Monequi nojquiya niyas ipan sequinoc alte-peme para niquinilhuis masehualme icamanal Toteco huan niquinnotzas ma calaquica campa yaya tanahuatía, pampa ya nopa nechtitantoc ma njchihua.

<sup>44</sup> Huan Jesús tepohuilitinenqui icamanal Toteco ipan israelita tiopame ipan campa hueli altepet ipan estado Galilea.

## 5

*Jesús quichijqui ma quinitzquica miyac michime  
(Mt. 4:18-22; Mr. 1:16-20)*

<sup>1</sup> Huan nopa miyaqui masehualme nelía quicuatetzopayabaj Jesús pampa quinequiyabaj quicaquise icamanal Toteco. Huan Jesús moquetzayaya iteno hueyi mantoc at cati itoca Genesaret\*, <sup>2</sup> huan quinitac ome cuaacalme atenti cati nopa michtajtamani quincajtejtoyaj pampa quipajpacayabaj inimata. <sup>3</sup> Huajca Jesús tejcoc ipan icuaacal Simón Pedro huan quiilhui ma quinejnemilti nopa cuaacali quentzi ipan at. Huan Jesús mosehui ipan nopa cuaacali huan pejqui quinmachtia nopa miyac masehualme cati itztoyaj talpani huan nochí huelque quitachilíaj. <sup>4</sup> Huan teipa quema tanqui quincamanalhuía nopa masehualme, Jesús quiilhui Simón:

—Xijnejnemilti ni cuaacali hasta campa achi huejcata huan nepa xijmajcahuaca amomata para anquinitzquise michime.

<sup>5</sup> Huan Simón quinanquili huan quiilhui:  
—Tamachtijquet, titajtamajque seyohual huan yon se michi amo tiquitzquijque. Pero sinta quej nopa techilhuía ma nijchihua, huajca sempa nijmajcahuas tomata.

<sup>6</sup> Huan quimajcajque inimata, huan quinitzqui-jque tahuel miyaqui michime hasta quinequiyaya tzayanis inimata. <sup>7</sup> Huan quinmanotzque ini-huampoyohua cati itztoyaj ipan nopa seyoc cuaacali para ma quinpalehuiquij. Huan hualajque huan quitemitijque nochí ome cuaacalme ica michime hasta san quentzi misahuisquíaj. <sup>8</sup> Huan

---

\* <sup>5:1</sup> 5:1 San se ica nopa Hueyi At Galilea. Nelía amo elqui se hueyi at, pero elqui se hueyi mantoc at cati quipixqui 22 kilómetros ihuehueyaca huan 13 kilómetros ipatajca.

quema Simón Pedro quiitac cati panotoya, motancaquetzqui iixpa Jesús huan quiilhui:

—Toteco, techcajtehua pampa na se nitajtacolchijca tacat.

<sup>9</sup> Simón quiilhui Jesús ya ni pampa yaya huan nochíihuampoyohua san motachiliyaj pampa quiitaque nopa miyaqui michime cati quinitzqui-jque. <sup>10</sup> Huan nojquiya san quitachilijque Jacobo huan Juan cati eliyaya itelpocahua Zebedeo huan eliyayaj ihuampoyohua Simón. Huan Jesús quiilhui Simón:

—Amo ximomajmati. Ama timichtajtamajquet, pero na nimitznextilis quenicatza tiquinnotzas masehualme para ma techtoquilica na.

<sup>11</sup> Huan quinejnemiltijque inincuaacal hasta atenti, huan quicajtejque nochí cati quipixtoyaj huan quitoquilijque Jesús.

*Jesús quichicajqui se cati tacayo palaniyaya  
(Mt. 8:1-4; Mr. 1:40-45)*

<sup>12</sup> Huan Jesús itztoya ipan se altepet, huan hualajqui se tacat cati itacayo palaniyaya ica nopa cocolisti lepra. Huan quema quiitac Jesús, motancaquetzqui iixpa huan chicahuac quiilhui:

—Toteco, sintajnequi, huelis techchicahuas.

<sup>13</sup> Huajca Jesús quitalili imax huan quiilhui:

—Quena, nijnequi. Ximochicahua amantzi.

Huan nimantzi icocolis quicajqui. <sup>14</sup> Huan Jesús quinahuati ma amo tepohuili ten panoc, quiilhui:

—San xiya ximonextiti ica nopa totajtzi huan xijmaca Toteco nopa tacajcahualisti cati Moisés

tanahuati ma quimacaca para ma motapajpacchi-huaca cati ayecmo tacayo palantoque. Quej nopa quimatise ya timochicajtoc.

<sup>15</sup> Pero campa hueli miyaqui más masehualme quicaquiyayaj ten ichicahualis Jesús huan huajca miyaqui mosentilijque campa itztoya para quicaquise icamanal huan para ma quinchicahua ten inincocolis. <sup>16</sup> Pero miyac huelta Jesús moiyocaquixti iselti huan yajqui campa tatzitzicaya para huelis motatajtis ica Toteco.

*Jesús quichicajqui se tacat cati huapahuixtoc  
(Mt. 9:1-8; Mr. 2:1-12)*

<sup>17</sup> Se tonali Jesús quinmachtiyaya masehualme ipan se cali, huan itztoyaj npona sequij fariseos huan huejhueyi tamachtiani ten itanahuatilhua Moisés cati hualajque ipan nochí ranchos ipan estados Galilea huan Judea, huan ten hueyi altepet Jerusalén. Huan Jesús quipixqui ichicahualis Toteco para quinchicahuas cocoyani. <sup>18</sup> Huan ajiscoj sequij tacame cati quihualicayayaj se cocoxquet cati metzhuapactic. Huan quinequiyayaj calaquise calijtic campa itztoya Jesús para quitalise nopa cocoxquet iixpa, <sup>19</sup> pero amo oncac campa calaquise pampa itztoyaj tahuel miyaqui masehualme. Huajca nopa tacame tejcoque calpani huan quijcuenijke se ome tzontzajcayot. Teipa quitemohuijque nopa cocoxquet huilantoc ipan itapech tatajco nochí nopa masehualme huan quitalijque iixpa Jesús. <sup>20</sup> Huan Jesús quiitac para nopa tacame quineltocayayaj, quiilhui nopa cocoxquet:

—Nohuampo, nimitzta pojpolhuía motajtacolhua.

<sup>21</sup> Huan nopa tamachtiani ten itanahuatil Moisés huan nopa fariseos pejque moyolilhuíaj: “¿Ajquiya nelía ni Jesús? Yaya yon quentzi amo quitepanita Toteco Dios pampa mochihua quej ya elisquía Toteco. Amo aquí hueli tetapojpolhuía tajtacoli, san Toteco.”

<sup>22</sup> Pero Jesús quimatiyaya cati inijuanti moyolilhuiyaj huan quinilhui:

—¿Para ten anmoilhuíaj amo nijtepanita Toteco Dios? <sup>23</sup> Sinta niquilhuis ni cocoxquet: ‘Ximijquehua huan xinejnemi’ huan mochihuas nocamanal, nojquiya motapojpolhui quema niquilhui: ‘Nimitzta pojpolhuía motajtacolhua.’ <sup>24</sup> Nijnequi xijmatica na cati niMocuetqui Masehuali nijpiya tequiticayot ipan taltipacti para nitetapojpolhuis, huajca nimechnextilis para mochihuas cati niquijtohua.

Huan nimantzi Jesús quiilhui nopa cocoxquet:

—Nimitzilhuía, ximijquehua huan xijtanana motapech huan xiya mochaj.

<sup>25</sup> Huan nimantzi nopa cocoxquet moquetzqui huan quitanantejqui itapech huan yajqui ichaj, quihueyichijtiyajqui Toteco Dios. <sup>26</sup> Huan nochí nopa masehualme san quitetzaitaque huan momajmatijke. Huan teipa pejque quihueyichihuaj Toteco huan quijitohuaj:

—Nelía se hueyi tiochicahualnescayot tiquitztoque ama.

*Jesús quinotzqui Mateo  
(Mt. 9:9-13; Mr. 2:13-17)*

**27** Teipa quema Jesús quisayaya ten nopa altepet, quiitac se tacat cati tainanqui impuesto. Yaya itoca Mateo huan nojquiya itoca Leví, huan mosehuijtoya campa nopa mesa para quiselis impuesto. Huan Jesús quiilhui:

—Techtoquili.

**28** Huan Mateo quicajtejqui nochí cati quipixtoya, huan moquetztquisqui huan yajqui ihuaya Jesús.

**29** Huan Mateo quichijqui se hueyi ilhuit nepa ichaj. Huan tacuayaya jihuaya Jesús campa mesa miyac tacame cati tainanque impuesto huan momajtoyaj tacajcayahua j, huan nojquiya itztoyaj sequinoc masehualme. **30** Huan hualajque fariseos huan tamachtiani ten itanahuatilhua Moisés huan quiitaque. Huajca pejque quitatelhuiáj Jesús iniixpa imomachtijcahua huan quinilhuijque:

—¿Para ten antacuaj huan anatij inihuaya ni tacame cati tainamaj impuesto huan tacajcayahua j huan inihuaya ni sequinoc cati miyac tajtacoli quichihuaj?

**31** Huan Jesús quinnanquili nopa fariseos huan quinilhui:

—Se tetica tacat amo quimonequilía se tepatijquet, pero se cocoxquet, quena. **32** Na amo nihualajtoc para niquinnotzas masehualme cati moilhuiáj para cuajcualme iixpa Toteco. Ni-hualajtoc para niquinnotzas ma moyolpataca cati quimatij quipiyaj inintajtacolhua.

*Jesús quinilhui para ten amo mosahuaj imo-machtijcahua*

(Mt. 9:14-17; Mr. 2:18-22)

<sup>33</sup> Huan hualajque sequij tacame cati quiilhui-jque Jesús:

—Imomachtijcahua Juan cati tecuaaltía talojtzitzí mosahuaj para motatajtise ica Toteco Dios. Huan san se quichihuaj cati quitoquilíaj inintamachtil nopa fariseos, pero momomachtijcahua amo. Nochipa tacuaj huan atij.

<sup>34</sup> Huan Jesús quinilhui:

—Amo quinamiqui ma mosahuaca ihuampoyohua se mosihuajtijquet ipan nopa talojtzi quema tacuaj ihuaya ipan inenamictil. San se eltoc quema na niitztoc inihuaya nomomachtijcahua, inijuanti amo hueli mosahuaj pampa itztoque nohuaya. <sup>35</sup> Pero ajsis tonali quema hualase nocualancaitacahua huan nechhuicase huan huajca quena, nomomachtijcahua mosahuase.

<sup>36</sup> Huan nojquiya quinpohuili se tatenpohualisti†, quinilhui:

—Amo aqui quitequi se quentzi yoyomit yan-cuic para quitatamanis se yoyomit cati sosoltic, pampa tzocoyolihuis nopa cati yancuic, huan ayecko quinamiquis cati sosoltic. <sup>37</sup> Huan amo aqui quiteca xocomeca at cati yancuic ipan cuetaxti cati sosoltic. Pampa nopa yancuic xocomeca at xocoyas, huan mohueyilis, huan tzayanis nopa

---

† **5:36** 5:36 Quinilhui ni tatenpohualisti para quinnextilis amo cuali quimanelose itamachtil ica cati huecjajquiya quinel-tocayayaj masehualme, pampa itamachtil eltoc se tamanti cati yancuic.

cuetaxti sosoltic. Quej nopa toyahuis nopa xocomeca at huan nojquiya quinenpolos nopa cuetaxti. <sup>38</sup> Monequi tijtecas xocomeca at cati yancuic ipan cuetaxti cati yancuic. <sup>39</sup> Huan amo aqui cati quiitoc xocomeca at cati achtohui tasencahuali quinequis cati yancuic, pampa nochí quijtohuaj: ‘Achi cuali nopa cati achtohui tasencahuali.’

## 6

*Nopa tonali para israelitame ma mosiyajquetzaca*  
(Mt. 12:1-8; Mr. 2:23-28)

<sup>1</sup> Ipan se sábado, nopa tonali para mosiyajquetzase israelitame, Jesús huan imomachtijcahua panoyayaj ipan se mili campa quitoctoyaj trigo. Huan imomachtijcahua pejque quiquechcocotetzaj huan quimaoyaj quentzi trigo tancohti huan quicuayayaj. <sup>2</sup> Huajca nopa fariseos moilhuijque para taixpanoyayaj huan quitatzintoquilijque Jesús:

—¿Para ten tequitij momomachtijcahua ipan ni tonali para ma timosiyajquetzaca? Inijuanti tajtacolchihuaj.

<sup>3</sup> Huan Jesús quinilhui:

—¿Amo anquipojtoque cati monejqui quichijqui David quema yaya huan ihuampoyohua mayanayayaj? <sup>4</sup> Calajqui ichaj Toteco huan quicuic nopa pantzi cati totajtzitzi quitentoyaj iixpa Toteco. Huan David quicuajqui huan noquinmajmacac nopa tacame cati itztoyaj ihuaya huan nojquiya quicuajque. Huan itanahuatil Moisés quijtohuaj, san totajtzitzi hueli quicuase nopa pantzi.

<sup>5</sup> Huan nojquiya Jesús quinilhui:

—Na cati niMocuetqui Masehuali nijpiya tequiticayot para niquinilhuis masehualme taya huelis quichihuase ipan sábado, ni tonal para ma timosiyajquetzaca tiisraelitame.

*Jesús quichicajqui se cati huactoya imax  
(Mt. 12:9-14; Mr. 3:1-6)*

<sup>6</sup> Ipan seyoc sábado, nopa tonali para ma mosiyajquetzaca israelitame, Jesús calajqui ipan se israelita tiopamit huan pejqui tamachtía. Huan itztoya tiopan calijtic se tacat cati huactoc imanejmat. <sup>7</sup> Huan nopa fariseos huan tamachtiani ten itanahuatil Moisés talojtzitzí quitachiliyayaj sintia quichicahuasquía nopa tacat ipan nopa tonali para mosiyajquetzase israelitame para quipiyasquíaj ica taya quitelhuisquíaj. <sup>8</sup> Pero Jesús quimatqui cati moilhuiyayaj huan quiilhui nopa tacat cati huactoc imax:

—Ximoquetza huan xihuala nica tatajco tojuanti.

Huan yaya moquetzqui huan yajqui. <sup>9</sup> Huan Jesús quinilhui nopa fariseos:

—Nimechchihuilis se tatzintoquili: ¿Taya quijj-tohuaj nopa tanahuatilme para onca caquihuili para tijchihuase ipan sábado? ¿Huelis tijchihuase cati cuali o cati amo cuali? ¿Ma tiquinmaquixtica masehualme o ma tiquinmictica?

<sup>10</sup> Huan Jesús quintachili nopa tacame cati quiyahualojtoyaj, pero amo aquí molini. Huajca Jesús quiilhui nopa tacat:

—Xijxitahua momax.

Huan yaya quixitajqui huan nimantzi mochicajqui. <sup>11</sup> Huan tahuel cualanque nopa fariseos huan nimantzi pejque mocamanalhuíaj taya huelis quichihuilise Jesús.

*Jesús quintapejpeni imomachtijcahua*

(Mt. 10:1-4; Mr. 3:13-19)

<sup>12</sup> Huan ipan nopa tonali Jesús yajqui iselti ipan se tepet huan mocajqui nepa seyohual para motatajtis ica Toteco Dios. <sup>13</sup> Huan quema tanesqui, quinnotzqui imomachtijcahua ma hualaca campa ya huan quintapejpeni majtacti huan ome inijuanti huan quintocaxti itayolmelajcahua. <sup>14</sup> Quitapejpeni Simón cati nojquiya quitocaxti Pedro, huan Andrés cati eliyaya iicni. Nojquiya quintapejpeni Jacobo, Juan, Felipe, Bartolomé, <sup>15</sup> Mateo huan Tomás. Quitapejpeni Jacobo icono Alfeo huan nopa Simón cati moiycatali ica partido cananista. <sup>16</sup> Huan quitapejpeni Judas, iicni Jacobo huan Judas Iscariote cati teipa quitemactili.

*Jesús quinmachi miyaqui masehualme*

(Mt. 4:23-25)

<sup>17</sup> Huan teipa Jesús temoc ipan tepet inihuaya imomachtijcahua, huan moquetzque campa se tamayamit huan mosentilijque miyaqui masehualme cati quitoquiliyayaj. Hualajtoyaj ten campa hueli pilaltepetzitzí ipan estado Judea huan ipan altepet Jerusalén huan ten talme Tiro huan Sidón nechca hueyi at. Nochi nopa masehualme hualajtoyaj para quicaquise icamanal Jesús huan para ma quinchicahua ten inincocolis. <sup>18</sup> Huan nojquiya quinchicajqui cati

quinpixtoyaj ajacame cati quintaijyohuiltyayaj.  
<sup>19</sup> Huan nochí nopa masehualme quinequiyayaj  
 monechcahuise campa Jesús para quiitzquise,  
 pampa ichicahualis quinajsiyaya cati  
 quiitzquiyayaj huan quinchicahuayaya.

*Xipaquica*  
*(Mt. 5:1-12)*

<sup>20</sup> Huan Jesús quintachili imomachtijcahua  
 huan quinilhui:

“Xipaquica amojuanti cati anteicneltzitzi,  
 pampa ancalaquise campa Toteco tanahuatía.

<sup>21</sup> Xipaquica amojuanti cati anmayanaj ama,  
 pampa anixhuise.

Xipaquica amojuanti cati anchocaj ama,  
 pampa anhuetzcase.

<sup>22</sup> Xipaquica quema masehualme amechcualan-  
 caitaj huan amechquixtía.

Xipaquica quema amechtelchihuaj huan amech-  
 tocaxtía amo ancuajcualme,  
 pampa antechoquilíaj na cati niMocuetqui Mase-  
 huali.

<sup>23</sup> Xipaquica, quena, xijpiyaca hueyi paquilsti  
 quema quej nopa amopantis,  
 pampa Toteco miyac amechtaxtahuis nepa il-  
 huicac.

San se quichihuayayaj inihuejapan tatahua hue-  
 jcajquiya ica itajtolpanextijcahua Toteco.

<sup>24</sup> Pero tahuel anteicneltique amojuanti cati  
 miyac antominpiyaj,  
 pampa ya anquipiyaj nochí cati cuali cati elis  
 amoaxcá.

<sup>25</sup> Tahuel anteicneltique cati anixhuij ama,  
 pampa teipa anmayanase.

Tahuel anteicneltique cati anhuetzcaj ama,  
pampa teipa anchocase huan antahuejchihuase.

<sup>26</sup> Tahuel anteicneltique quema nochí  
masehualme camanaltij cuali ten  
amojuanti.

Inintatahua nojquiya camanaltique cuali ten  
nopa istacatica tajtolpanextiani ten  
huejcajquiya.

*Xiquinicnelica amocualancaitacahua*  
(Mt. 5:38-48; 7:12)

<sup>27</sup> “Pero nimechilhuía amojuanti cati antechta-  
caquiláj: Xiquinicnelica amocualancaitacahua.  
Xiquinchihuilica cati cuali inijuanti cati  
amechcualancaitaj. <sup>28</sup> Xijtajtanilica Toteco  
ma quintiochihua cati amechtelchihuaj.  
Ximotatajtica ica Toteco por inijuanti cati  
amechtaijilhuía ica cati fiero. <sup>29</sup> Sinta se  
mitzmaquilis mocampa, xijnextili ne seyoc  
mocampa para nojquiya ma mitzmaquili  
nopona. Sinta se mitzquixtilis motaque, xijcahua  
ma quihuica mocamisa nojquiya. <sup>30</sup> Sinta  
se mitztajtanía se tenijqui, xijmaca. Sinta se  
mitzquixtilía se tenijqui, amo xiquilhui ma  
mitzcuepili. <sup>31</sup> Xiquinchihuilica sequinoc quej  
anquinequij sequinoc ma amechchihuilica.

<sup>32</sup> “Sinta san anquinicnelíaj masehualme cati  
amechicnelíaj, Toteco amo quiita para anquichih-  
uaj cati cuali. Hasta amo cuajcualme quinic-  
nelíaj inijuanti cati nojquiya quinicnelíaj. <sup>33</sup> Sinta  
san anquinchihuilíaj ten cuali masehualme cati  
amechchihuilíaj ten cuali, amo teno ipati iixpa

Toteco. Amo cuajcualme nojquiya san se quichihuaj. <sup>34</sup> Huan sintia san anquintanejtiaj tomi masehualme cati anquimatiij temachti amechtaxtahuise, amo teno ipati iixpa Toteco, amo cuajcualme nojquiya quintanejtiaj tomi cati quincuepilise teipa. <sup>35</sup> Na nimechilhuía, xiquinicnelica amocualancaitacahua. Xiquinchihuilica nochi cati cuali. Xiquintanejtica masque amo anmoilhuíaj sintia amechcuepilise. Huan Toteco hueyi amechtaxtahuis. Huan quej nopa anquichijtose quej quichihua Toteco Cati Más Quipiya Tanahutili, pampa yaya quinchihuila cati cuali nochi masehualme, masque amo cuajcualme o amo motascamatij. <sup>36</sup> Huajca xitetasojtaca quej amoTata, Toteco Dios, tetasojta.

*Amo xiquintequitachilica sequinoc  
(Mt. 7:1-5)*

<sup>37</sup> “Amo xiquintequitachilica sequinoc, huan sequinoc amo amechtequitachilise. Amo xitetatelhuica, huan sequinoc amo amechtatelhuise. Xitetapojojpolhuica, huan sequinoc amechtapojpolhuise. <sup>38</sup> Xitemacaca huan anquiselise. Quena, Toteco amechmacas miyac sintia antemacaj miyac. Yaya quichihuas quej se cuali tanamacquet cati quitema se tatamachihuali sinti, huan cuali quiojolinis, huan más quitema hasta motzontis. Pampa san se tayejyecoli cati ipan titatamachihuas ta, yaya quitequihuis para tatamachihuas cati elis para ta.”

<sup>39</sup> Huan Jesús quinlhui se tatenpohualisti: “Se popoyotzi amo hueli quiyacana seyoc cati popoy-

otzi, pampa nochí ome huetzise ostoco. <sup>40</sup> Se momachtijquet amo quimati más que itamachti-jca, pero nochí momachtiani cati tamimomachtíaj elise quej inintamachti-jca.

<sup>41</sup> “¿Para ten anquikitaj nochí piltajtacoltzitzti cati quichihuaj amohuampoyohua huan amo an-quimati-j para achi más miyac tajtacoli anquichi-huaj? Eltoc quej tiquita se piltejtzi ipan iixteyol moicni, pero amo tijmati para ta tijpiya hasta se apechti moixteyolijtic. <sup>42</sup> ¿Quenicateza huelis tiquil-huis seyoc: ‘Noicni, nimitzquixtilis nopa piltejtzi ipan moixteyol’, quema ta tijpiya se apechti moixteyolijtic? Tijpiya ome moxayac. Timoilhuía amo cuali cati yaya quipiyá, pero cuali cati ta tijpiya. Achtohui ximoquixtilis nopa apechti huan quej nopa titachiyas cuali para tijquixtilis nopa piltejtzi cati quipiyá iixteyolijtic mohuampo.

*Nochí quiixmatij se cuahuit ica itajca  
(Mt. 7:17-20; 12:34-35)*

<sup>43</sup> “Se cuali cuahuit temaca itajca cati cuali, huan cati amo cuali, amo. Yon se cuahuit cati amo cuali amo temaca itajca cati cuali. <sup>44</sup> Huajca nochí masehualme quiixmatij se cuahuit ica taya itajca temaca. Se huitzmecat amo temaca cuasel-cayot. Huan se sahuamecat amo temaca xocomecat. <sup>45</sup> San se nojquiya ica se cuali masehuali, quisa cati cuali ipan iyolo. Huan sinta amo cuali se masehuali, quisa cati amo cuali ipan iyolo. Pampa se masehuali camanalti cati eltoc ipan iyolo huan cati más moilhuía.

*Ome Calme  
(Mt. 7:24-27)*

**46** “¿Para ten anquijtohuaj niamo Teco huan amo anquichihuaj cati nimechilhuía? **47** Nochi cati hualahuij campa na huan quicaquij nocamanal huan quichihuaj cati niqujtohua, itztoque quej ni talnamijca tacat cati nimechpohuilis. **48** Se tacat quinequiyaya quichihuas ichaj huan taxajqui huejcata huan quitzinpehualti ica tet huan quiquetzqui. Huan teipa huetzqui at miyac huan tatemic hasta quiajsic ichaj, pero amo teno ipantic nopa cali pampa nopa tacat quiquetztoya ipan tet. **49** Pero masehualme cati quicaquij nocamanal huan amo quichihuaj cati quijtohua, quichihuaj quej ni huihui tacat. Yaya quichijqui ichaj ipan tali huan amo teno ica quitzinpehualti. Teipa tatemic huan nopa at quiajsic ichaj, huan nimantzi huetzqui huan tamisosolijqui.”

## 7

*Jesús quichicajqui itequipanojca se soldado  
(Mt. 8:5-13)*

**1** Huan Jesús tanqui quinmachtía nochi nopa masehualme, huan yajqui altepet Capernaum. **2** Huan nepa itztoya se capitán ten soldados cati quipixtoya se itequipanojca cati quiicneli, huan itequipanojca ya tahuel mococohuayaya. **3** Huan nopa capitán quicajqui ya ajsico Jesús, hua-jca quintitanqui nopa huehue israelita tacame ma quitajtanitij ma huala quichicahuquia itequipanojca. **4** Huan nopa tacame yajque campa Jesús huan ica nochi iniyolo quitajtanjque ma quichicahuati huan quiilhuijque:

—Cuali para tijchihuilis se cuali tacayot ni capitán,<sup>5</sup> pampa nelía techicnelía tiisraelitame huan taxtajqui nochí catí monejqui para techsencahuili se toisraelita tiopa.

<sup>6</sup> Huajca Jesús quisqui inihuaya para yas ichaj nopa capitán, pero quema monechcahuiyaya, nopa capitán quintitanqui ihuampoyohua ma quicamanalhuica Jesús huan ma quiilhuica:

—NoTeco, amo ximocuatotoní más. Nopa capitán quijtohua para yaya amo hueyi quej ta, huan amo quinamiqui para ticalaquís ichaj.

<sup>7</sup> Nojquiya yaya quimati amo quinamiqui mitznechcahuis, yon mitzcamanalhuis. Pero yaya quijtohua, san xiquijto se camanali huan xijnahuati para mochicahuas itequipanojca huan nimantzi mochicahuas.<sup>8</sup> Quijtohua yaya quimati catí ta tiquijtos, ya nopa mochihuas, pampa yaya nojquiya quipiya iteco catí quinahuatía. Huan nojquiya quinpiya soldados catí yaya quinnahuatía. Huan sinta yaya quiilhuis se soldado ma yas nepa, yaya nimantzi yas. Huan sinta quiilhuis seyoc ma huala nica, yaya nimantzi hualas. Huan sinta quiilhuis itequipanojca ma quichihua se tequit, yaya quichihuas. Huan nopa capitán quimati ta nojquiya tijpiya san se tequiticayot para nimantzi mochihuas mocamanal.

<sup>9</sup> Huan quema Jesús quicajqui icamanal nopa capitán catí ihuampoyohua quiilhuicoj, quitetza-  
itac. Huan Jesús moicancuetqui huan quinilhui nopa miyaqui masehualme catí quitoquiliyayaj:

—Nelía nimechilhuía, yon se israelita masehuali amo nechneltoca nelcuali quej ni capitán catí

seyoc tali ejquet.

<sup>10</sup> Huan ihuampoyohua nopa capitán tacuepili-jque ichaj, huan ya mochicajtoya itequipanojca.

*Jesús quiyolcuic icon se toahui cati icnotzi*

<sup>11</sup> Huan teipa Jesús nejnemiyaya ipan ojti para se altepet cati itoca Naín huan imomachtijcahua huan miyaqui masehualme yahuiyayaj ihuaya.

<sup>12</sup> Huan quema Jesús monechcahui campa icalte nopa altepet, quinnamijqui miyaqui masehualme cati quiuechpanojtihualayayaj se mijcatzi. Huan nopa mijcatzi eliyaya iyojtzi icon se toahui cati icnotzi. <sup>13</sup> Huan Jesús quiitac nopa toahui cati icnotzi, huan quitasoxtac, huan quiilhui:

—Amo xichoca.

<sup>14</sup> Huan Jesús yajqui campa nopa mijcatzi huan quiitzqui nopa caja, huan cati quihuicayayaj moquetzque. Huan Jesús quiilhui nopa mijcatzi:

—Telpocat, nimitzilhuiá, ximijquehua.

<sup>15</sup> Huan nopa telpocat cati mictoya mosehui huan pejqui camanalti. Huan Jesús quimactili inana. <sup>16</sup> Huan nochí nopa masehualme cati quiitaque quitetzaitzque huan san quitachilijque huan pejque quihueyichihuaj Toteco Dios, huan quiijtojque:

—Ni Jesús cati itztoc tohuaya, se hueyi tajtol-panextijquet.

Huan nojquiya quiijtojque:

—Toteco Dios hualajtoc para techpalehuis tiisraelitame pampa tiimasehualhua.

<sup>17</sup> Huan nochí masehualme cati itztoyaj ipan estado Judea huan ipan sequinoc talme nechca quicajque para Jesús quiyolcuitoya nopa mijcatzi.

*Hualajque imomachtijcahua Juan cati tecuaaltiyaya (Mt. 11:2-19)*

<sup>18</sup> Huan imomachtijcahua Juan cati tecuaaltiyaya quiilhuijque nochí cati Jesús quichihuayaya. Huajca Juan quinnnotzqui ome imomachtijcahua, <sup>19</sup> huan quintitanqui ma yaca quitatzintoquilitij Jesús sintá nelía yaya nopa Cristo cati Toteco Dios quijito hualasquía, o monequi noja quichiyase ma huala. <sup>20</sup> Huan ajiscoj campa Jesús, huan quiilhuijque:

—Juan cati tecuaaltía techtitantoc ma timitzatzintoquiliquipiñ sintá ta tiCristo cati Toteco quiijito hualasquía o monequi noja tijchiyase para hualas.

<sup>21</sup> Huan ipan nopa hora quema imomachtijcahua Juan itztoyaj ihuaya Jesús, yaya quinchicajqui miyac cati mococohuaj ica miyac tamanti cocolisti. Quinchihaulti ma quisaca iajacahua Amocualtacat cati calactoyaj ipan masehualme huan quintachiyalti miyac popoyotzitz. <sup>22</sup> Huajca Jesús quinilhui imomachtijcahua Juan:

—Xijyolmelahuati Juan cati anquiitztoque huan anquicactoque. Xiquilhuitij masehualme cati itztoyaj popoyotzitz, ama tachiyaj, huan cati itztoyaj metzcuauchotique, ama nejnemij cuali. Cati quipiyayaj nopa tacayo palanca cocolisti, ya mochicajtoque, huan inijuanti cati nacastapaltzitz, ama ya tacaquij. Masehualme cati mictoyaj ya moyolcuitoque, huan cati teicneltzitz quicaquij icamanal Toteco, pampa niquin camanalhuía. <sup>23</sup> Xiquilhuitij para

paquij nopa masehualme cati nechselíaj huan nechneltocaj.

<sup>24</sup> Huajca quistejque nopa tacame cati quintitantoya Juan cati tecuaaltía, huan teipa Jesús pejqui quincamanalhuía nopa miyaqui masehualme ten Juan, huan quintatzintoquili: “¿Taya anmoilhuiyayaj anquiitasquíaj quema anyajque anquiitatoj Juan ipan nopa huactoc tali campa amo teno eli? ¿Anmoilhuiyayaj Juan elisquía se tacat cati amo temachti quej se ohua cuahuit cati huihuipica quema quentzi taajaca? <sup>25</sup> ¡Ximoilhuica! ¿Taya anmochiyayaj anquiitase? ¿Anquichiyayaj para Juan elisquía se tacat ica iyoyo nelcuali? Amo. Ya anquimatij tacame cati motalilíaj iniyoyo nelcuali, tominpixtoque huan itztoque ipan ininchaj tanahuatiani. <sup>26</sup> Huajca, ¿taya anyajque anquiitatoj? ¿Anyajque pampa anquiitasnequiyayaj se itajtolpanextijca Toteco? Huan nimechilhuía yaya más hueyi que nochí sequinoc tajtolpanextiani <sup>27</sup> pampa ipan Icamanal Toteco ijcuilijtoc cati Toteco Dios nechilhui ten Juan huan quej ni quijito: ‘Xiquita, na nijttanis notayolmelajca ma mitzyacanas.

Yaya quicualtalís iniyolo masehualme para ma mitzsélica.’

<sup>28</sup> Huan nimechilhuía amo aqui seyoc cati tacajtoc ipan ni taltipacti itztoc más hueyi iixpa Toteco que Juan cati tecuaaltía, pero cati hueli masehuali cati itztoc ipan itanahuatilis Toteco elis más hueyi que Juan.”

<sup>29</sup> Huan nochí nopa miyaqui masehualme huan nopa tacame cati tainamayayaj impuesto cati

quicactoyaj icamanal Juan, quinejque ma quincuaalti, pampa quiitztoyaj para xitahuac cati Juan quiijto ten Toteco. <sup>30</sup> Pero nopa fariseos huan tamachtiani ten itanahuatil Moisés amo quicualcajque cati Toteco quinejqui ma quichihuaca. San mohueyimatiyaya, huan yeca Juan amo quincuaalti.

<sup>31</sup> Huan sempa Jesús quinilhui: “¿Quenicatza huelis nimechilhuis quej mochihuaj masehualme cati ama itztoque? <sup>32</sup> Cati ama itztoque mochihuaj quej coneme cati mosehuíaj tianquis huan amo paquij pampa amo nochi pano quej quinequij ma pano. Quinnotzaj inihuampoyohua huan quinilhuiáj: ‘Titapitzque para ximijtotica, huan amo anmijtotijque. Tihuicaque se huicat quej mictoya se mijcatzi, pero amo anchocaque.’ <sup>33</sup> Huan masque Juan cati tecuaaltiyaya hualajqui huan amo quicuajqui pantzi huan amo quiic xocomeca at, anquijtojque para quipixtoya se iajacayo Amocualtacat. <sup>34</sup> Huan na cati niMocuetqui Masehuali nihualajqui huan nijcua huan niqui cati onca, huan anquijtohuaj nineltacuajquet huan nineltaiquet. Anquijtohuaj san ninemi inihuaya tacajcayahuani cati tainamaj impuesto huan masehualme cati miyac tajtacoli quichihuaj. <sup>35</sup> Pero amo ipati cati anquijtohuaj. Nochi masehualme cati talnamictoque quimachilíaj na ihuaya Juan tijchihuaj cati xitahuac.”

### *Jesús yajqui ichaj se fariseo cati itoca Simón*

<sup>36</sup> Monechcahui se fariseo campa Jesús huan quiilhui ma tacuati ichaj. Yeca Jesús yajqui ichaj huan mosehui campa mesa, <sup>37</sup> huan ajsico se

tacanenca sihuat cati nojquiya ehua nopa altepet. Huan quicajqui para Jesús tacuayaya ipan ichaj nopa fariseo huan quihualicac se taajhuiyacayot ipan se frasco cati quicoyonijtoya ten se tet itoca alabastro. <sup>38</sup> Huan moquetzqui chocayaya iicxita Jesús. Huan pejqui quixolonía iicxi ica iixayo cati huetziyaya huan quihuatzayaya ica itzoncal. Quitzoponili iicxi huan quitequili nopa taajhuiyacayot cati quihualicac. <sup>39</sup> Huan nopa fariseo cati quinotzqui ma tacuati ichaj quiitac nochí ya ni, huan moilhui ipan italnamiquilis: “Sinta ni Jesús nelía itztosquía se itajtolpanextijca Toteco, quimatisquía para amo cuali ni sihuat cati quiitzquía iicxi. Quimatisquía miyac tajtacolchijtoc.” <sup>40</sup> Huan yeca Jesús quinanquili cati Simón moyolilhuiyaya ipan italnamiquilis huan quiilhui:

—Simón, nijpiya se tatenpohualisti cati nijnequi nimitzilhuis.

Huan Simón quiilhui:

—Cualtitoc, Tamachtijquet, techilhui.

<sup>41</sup> Huan Jesús quiilhui:

—Itztoya se tacat cati momatqui tetanejtía tomi. Huan ome tacame quitahuiquiliyaya. Se quitahuiquiliyaya tomi para san cincuenta tonali tequit, pero nopa seyoc quitahuiquiliyaya tomi para quinientos tonali. <sup>42</sup> Huan nopa ome amo huelque quicuepilíaj nopa tomi. Huajca nopa tacat ica ipaquilis quintapojpolhui cati sesen quitahuiquiliyaya huan quiijto amo teno monequi quitaxtahuise. Huajca Simón, ¿catijqui ten ni ome tacame achi más quiicneli?

<sup>43</sup> Huan Simón quinanquili:

—Huelis yaya cati más quitahuiquiliyaya.

Huan Jesús quiilhui Simón:

—Quena, melahuac cati tiquijto.

<sup>44</sup> Huan Jesús quitachili nopa sihuat huan quiilhui Simón:

—¿Ta tiquita cati quichihua ni sihuat? Quema nicalajqui ipan mochaj, amo techmacac at para nimoicxipajpacas quej ipa tijchihuaj, pero yaya nechxolonili noicxihua ica iixayo huan quihuatzqui ica itzoncal. <sup>45</sup> Ta amo techtzoponi quej timomajtoque titeselíaj, pero hasta quema nica nicalajqui, yaya amo quicajtoc nechtzoponilía noicxihua. <sup>46</sup> Ta amo techtequili aceite ipan notzonteco quej timomajtoque, pero yaya quitejqui taajhuiyacayot hasta ipan noicxihua. <sup>47</sup> Yeca nimitzilhuía, masque miyac itajtacolhua, nochí nijtapojpolhuijtoc huan huajca miyac nechicnelía. Pero seyoc cati quipanti tapojpolhuili ica san pilquentzi cati tahuicayaya, san pilquentzi quiicnelía yaya cati quitapojpolhuijtoc.

<sup>48</sup> Huan Jesús quiilhui nopa sihuat:

—Nimitzta pojpolhuijtoc nochí motajtacolhua.

<sup>49</sup> Huan masehualme cati mosehuiyayaj campa mesa ihuaya Jesús pejque moilhuíaj:

—¿Ajquiya nelía ni tacat Jesús cati moilhuía quipiya tequiticayot para tetapojpolhuis tetajtacolhua?

<sup>50</sup> Huan Jesús quiilhui nopa sihuat:

—Pampa techneltocac, nimitzmaquixtijtoc ten motajtacolhua. Hueli tiyas mochaj ica paquilisti.

<sup>1</sup> Teipa Jesús nejnemiyaya campa hueli ipan altepeme huan ranchos tayolmelajtinemiyaya ica manal Toteco huan tenotzayaya ma calaquica ipan itanahuatilis Toteco Dios. Huan nopa majtacti huan ome imomachtijcahua yahuiyaya ihuaya. <sup>2</sup> Huan nojquiya nemiyayaj inihuaya Jesús sequij sihuame cati achtohui quipixque colisti o iajacahua Amocuaultacat, huan quinchicajtoya. Se ten nopa sihuame cati nejnenqui ihuaya Jesús itoca María Magdalena. Achtohuiya quipixtoya chicome iajacahua Amocuaultacat huan Jesús quinquixti. <sup>3</sup> Huan seyoc sihuat itoca eliyaya Juana, huan yaya elqui isihua Chuza cati quitequipano Tanahuatijquet Herodes. Huan nojquiya nejnenqui inihuaya se sihuat itoca Susana, huan más miyac sihuame cati quimacayayaj inintomi para quipalehuise Jesús ica cati monequiyaya.

*Se tacat quiijzeloto xinachti*

(Mt. 13:1-9; Mr. 4:1-9)

<sup>4</sup> Huan mosentilijque miyaqui masehualme cati ehuani campa hueli altepeme para quiitase Jesús, huan quincamanalhui ica se tatenpohualisti, huan quinlhui:

<sup>5</sup> “Se tacat quiijzeloto xinachti huan quema quiijzelohuayaya, sequij xinachti tepejqui ojtipa. Huan masehualme ipan moquejquetzque, huan totome quitamicuajque. <sup>6</sup> Sequinoc xinachti tepejqui tetzala campa amo onca miyac tali. Nopa xinachti ixhuac, pero nimantzi huajqui pampa amo quiajsiyaya at. <sup>7</sup> Huan sequinoc xinachti tepejqui huitzala huan nopa huitzti moscalti ihuaya huan quijjomicti. <sup>8</sup> Sequinoc xinachti tepejqui

ipan cuali tali huan moscalti huan temacac cien hueltas más ten cati quitoctoya.”

Huan quema Jesús tanqui quinilhuía ni tatenpohualisti, achi más chicahuac quinilhui:

—Nochi anquipiyaj amonacas, huajca xijcaquica cati nimechilhuía.

*Para ten Jesús tamachti ica tatenpohualisti  
(Mt. 13:10-17; Mr. 4:10-12)*

<sup>9</sup> Huan imomachtijcahua Jesús quitatzintoquilijque taya quiijtosnequi nopa tatenpohualisti.

<sup>10</sup> Huan Jesús quinnanquili: “Toteco amechcahuilijtoc xijmachilica quenicatza yaya tanahuatía. Achtohuiya amo aqui quimatiyaya ya ni, huan ama noja amo quincahuilía ne sequinoc ma quimachilica. Yeca niquincamanalhuía ica tatenpohualisti para masque inijuanti quiitaj cati nijchihua, mochihuaj quej amo teno quiitaj. Huan masque quicaquij nocamanal, amo hueli quimachilíaj.

*Jesús quinilhui taya quiijtosnequi nopa tatenpohualisti  
(Mt. 13:18-23; Mr. 4:13-20)*

<sup>11</sup> “Ya ni cati quiijtosnequi nopa tatenpohualisti ten nopa tacat cati quiijtzeloto xinachti. Nopa xinachti quiijtosnequi icamanal Toteco. <sup>12</sup> Sequij masehualme itztoqué quej nopa xinachti cati tepejqui ojtipa. Inijuanti quicaquij icamanal Toteco huan nimantzi Amocuältacat huala huan quinquitilía icamanal Toteco cati eltoc ipan iniyolo

para ma amo quineltocaca huan ma amo mo-maquixtica ten intintajtacolhua. <sup>13</sup> Sequinoc itztoque quej nopa xinachti cati tepejqui tetzala. Injuanti quicaquij icamanal Toteco huan quiselíaj ica paquilsti. Pero itztoque quej nopa xinachti cati amo hueli motatzquilá campa tetzala. Nopa masehualme san quineltocaj icamanal para se talojtzi. Huan quema huala taohuijcayot, ni-mantzi quicajtehuaj. <sup>14</sup> Sequinoc masehualme itztoque quej nopa xinachti cati tepejqui campa huitzti. Quicaquij icamanal Toteco, pero mojmosta ipan ininemilis mocuesohuaj miyac huan quinequij moricojchihuase ipan ni taltipacti huan quinequij quipiyase nochi cati quinpactía. Huan nochi ni tamanti quijiyomictía icamanal Toteco para amo hueli moscaltía cuali huan quipiyas itajca. <sup>15</sup> Pero sequinoc masehualme itztoque quej nopa xinachti cati tepejqui ipan cuali tali. Nopa masehualme quicaquij icamanal Toteco huan ica paquilsti quiselíaj ica nochi iniyolo. Quiicnelíaj icamanal huan mojmosta quitoquilijtinemij cati quijtohua. Injuanti, quena, quipiyaj intintajca.

*Nopa tatenpohualisti ten nopa taahuili  
(Mr 4:21-25)*

<sup>16</sup> “Amo aqui quitatía se taahuili huan quitalía cajonijtic o tapechtzinta. ¡Amo! Sinta se masehuali quitatía se taahuili, quitalía ipan se taahui quetzali para nochi cati calaquise nopona huelis tachiyase. <sup>17</sup> Quej nopa ica nocamanal. Nochi cati motatijtoc ama, tanemijya nesis teipa. Huan nochi cati eltoc ixtacatzi ama, nochi quimatisse huan cuali quimachilise teipa.

<sup>18</sup> “Huajca ximotachilica cuali quenicatza anquicaquij nocamanal, pampa nochí masehualme cati quimachilíaj, Toteco quinpalehuis para ma quimachilica más. Huan ica cati amo quimachilíaj, hualas se cati quinquixtilis nopa quentzi cati moilhuíaj quimachilíaj.”

*Inana huan iicnihua Jesús  
(Mt. 12:46-50; Mr. 3:31-35)*

<sup>19</sup> Huan hualajque inana huan iicnihua Jesús huan amo huelque monechcahuíaj campa itz-toya pampa nelmiyaqui masehualme quiyahualo-jtoyaj. <sup>20</sup> Huan hualajqui se tacat huan quiilhui Jesús:

—Monana huan moicnihua mitzchiyaj calteno huan quinequij mitzcamanalhuise.

<sup>21</sup> Huan Jesús tananquili:

—Ni masehualme nica cati quicaquij icamanal Toteco huan quichihuaj cati quijtohua, inijuanti niquinita quej nonana huan noicnihua.

*Jesús quitacahualti ajacat huan hueyi at  
(Mt. 8:23-27; Mr. 4:35-41)*

<sup>22</sup> Se tonali Jesús huan imomachtijcahua tej-coque ipan se cuaacali, huan Jesús quinilhui:

—Ma tiyaca hasta seyoc nali ni hueyi at.

Huan quistejque. <sup>23</sup> Huan imomachtijcahua quinejnemiltiyayaj nopa cuaacali para seyoc nali, huan Jesús cochqui. Huan nimantzi pejqui taajaca chicahuac ipan hueyi at, huan calaquiyyaya at ipan cuaacali hasta san quentzi misahuisquíaj. <sup>24</sup> Huan imomachtijcahua hualajque campa Jesús, quiixitique, huan quiilhuijque:

—Tamachtijquet, xiquila, timisahuijinemij.

Huanca Jesús mijquejqui huan quiajhuac nopa ajacat huan nopa hueyi at, huan nimantzi moquetzqui huan ayecmo moojolini. <sup>25</sup> Huan Jesús quinilhui imomachtijcahua:

—¿Para ten nelquentzi antechneltocaj na?

Huan imomachtijcahua momajmatiyayaj huan san quitetzaitaque huanmoilhuijque se ica seyoc:

—¿Ajquiya nelía ni tacat Jesús? Yaya hueli quitacahualtia ajacat huan hueyi at, huan inijuanti quineltoquiláj icamanal.

*Se Gadara ejquet ica iajacahua Amocuältacat  
(Mt. 8:28-34; Mr. 5:1-20)*

<sup>26</sup> Huan teipa Jesús huan imomachtijcahua ajsique tali Gadara ipan inincuaacal. Gadara mocahua iixmelac estado Galilea. <sup>27</sup> Huan quema inincuaacal ajsiyaya atenti, hualajqui quinamiquico se tacat cati ehua nopa altepet cati ya huejactoya quinpixtoya iajacahua Amocuältacat ipan itacayo. Huan amo teno moquentiyaya huan amo mocahuayaya ichaj. Senitztoya ipan campo santo ipan ostot ipan se tepet campa quintalíaj mijcätzitzi. <sup>28</sup> Huan quema quiitac Jesús, motancuaquetzqui iixpa huan quiijto chicahuac:

—¿Taya njipiya mohuaya? TiJesús. TiIcone Dios Cati Más Quipiya Tanahuatili. Nimitztajtanía, amo techtaijyohuilty.

<sup>29</sup> Quiijto ni pampa Jesús quinnahuatiyaya nopa ajacame ma quisaca ipan nopa tacat. Talojtzitzti nopa ajacame quiitzquiyayaj para ten hueli quichihuilise. Huan masque masehualme quiilpiyayaj imax huan iicxihua ica tepos cadena

para quimocuitahuise, san quicocototzayaya nochí tebos cadena huan nopa ajacame quinejnemiltiyaj hasta campa nopa tahuel huactoc tali campa amo teno eli.

<sup>30</sup> Huan Jesús quitatzintoquili:

—¿Taya motoca?

Huan yaya quinanquili:

—Notoca Miyac.

Quej ni quijito pampa miyaqui ajacame calac-toyaj ipan itacayo. <sup>31</sup> Huan nopa ajacame quitaj-tanijque Jesús ma amo quintitani ipan nopa os-tot cati tahuel huejcata. <sup>32</sup> Huan nopona nech-catzi itztoyaj miyaqui pitzome cati tacame quin-hualicaque para ma tacuajtinemica. Huan yeca nopa ajacame quitajtanijque Jesús ma quincahuili calaquise ipan nopa pitzome huan yaya quinc-ahuili. <sup>33</sup> Huan nopa ajacame quisque ipan nopa tacat huan calajque ipan pitzome. Huan nochí nopa miyaqui pitzome matalojtejque campa taix-temolis huan huetzque ipan nopa hueyi at huan misahuijque.

<sup>34</sup> Huan nopa tacame cati quinmocuitahuiyayaj nopa pitzome quiitaque ten panoc, huan yajque huan quinyolmelahuatoj nochí masehualme ipan nopa altepet huan campa hueli ipan nopa tali. <sup>35</sup> Huan nochí nopa masehualme hualajque qui-itacoj ten panotoya. Huan quema ajsicoj campa Jesús, quiitaque nopa tacat cati achtohui quin-pixtoya iajacahua Amocuallatcat ama mosehuij-toc iixpa Jesús. Ya moquentijtoya iyoyo huan quipixtoya cuali italnamiquilis. Huan nopa mase-hualme momajmatijque, <sup>36</sup> ica cati quiitaque. Huan inijuanti cati quiitaque quinpohuilijque

cati ajsiyayaj quenicatza Jesús quichicajtoya nopa tacat cati quinpixtoya ajacame. <sup>37</sup> Huan yeca nochí nopa miyaqui masehualme cati ehuani ipan tali Gadara huan nopona nechcatzitzí quitajtanicoj Jesús ma quisa ten inintal, pampa nelía momajmatijque. Huajca Jesús tejcoc ipan cuaacali para tacuepilis. <sup>38</sup> Huan nopa tacat cati achtohui quinpixtoya ajacame, chicahuac quitajtani Jesús ma quicahuili ma yahui ihuaya, pero Jesús amo quicahuili, san quiilhui:

<sup>39</sup> —Xitacuepili mochaj huan xiquinilhuiti masehualme nochí nopa huejhueyi tamanti cati Toteco mitzchihuilitjoc.

Huan quistejqui nopa tacat, huan ipan nochí nopa altepet quinpo huiliyaya nochí masehualme cati Jesús quichihuilitjotoya.

*Isihuapil Jairo huan nopa sihuat cati quiajsic iyoyo Jesús*

(Mt. 9:18-26; Mr. 5:21-43)

<sup>40</sup> Quema Jesús tacuepili seyoc nali nopa hueyi at, miyaqui masehualme quiselijque ica paquillisti pampa quichiyayaj ma ajsi. <sup>41</sup> Huan hualajqui se tacat cati itoca Jairo, se tequitquet ten israelita tiopamit. Huan yaya motancuaquetzqui iicxita Jesús huan chicahuac quitajtani ma yahui ichaj. <sup>42</sup> Quipixtoya setzi isihuapil cati quipiyayaya majtacti huan ome xihuit huan tahuel mococo-huayaya. Huan quema Jesús itztoya ipan ojti para ichaj, miyaqui masehualme quicuatetzopayayaj.

<sup>43</sup> Huan itztoya nopona inihuaya se sihuat cati quipixtoya se cocolisti para majtacti huan ome

xihuit. Mojmosta esotemoyaya. Huan quitamiltij-toya nochí cati quipixtoya ica tepajtiani huan yon se amo huelqui quipalehui para ma mochicahua. **44** Huan nopa sihuat monechcahui iica Jesús huan quiajsic iyoyonteno huan nimantzi mochicajqui.

**45** Huan Jesús quijito:

—¿Ajquiya quitoxonqui noyoyo?

Huan nochí masehualme quijtohuayayaj para amo quichijtoyaj. Huan Pedro quiilhui Jesús:

—Tamachtijquet, nochí ni miyaqui masehualme cati mitzyahualohuaj mitzcuatetzopaj.

**46** Pero Jesús quijito:

—Se masehuali nechitzqui pampa nijmatqui quisqui chicahualisti ten na huan quichicajqui se masehuali.

**47** Huan quema nopa sihuat quimatqui para Jesús quimatiyaya ten panoc, hualajqui huihuipicayaya huan motancuaquetzqui iixpa Jesús. Huan iniixpa nochí nopa masehualme quipohuili Jesús para ten quiajsitoya iyoyo huan para nimantzi mochicajtoya. **48** Huan Jesús quiilhui:

—Nane, timochicajqui pampa techneltocac. Xiya ica paquilisti.

**49** Huan quema camanaltiyaya Jesús, ajsico se tetequipanojquet ten ichaj nopa tequitquet ten tiopamit, huan quiilhui:

—Mosihuapil ya mijqui. Ayecmo xijcuatotoní ni tamachtijquet.

**50** Pero Jesús quicajqui cati nopa tetequipanojquet quijito, huan quiilhui nopa tequitquet:

—Amo ximajmahui, san techneltoca na huan mosihuapil mochicahuas.

<sup>51</sup> Huan quema nochí inijuanti ajsitoj ichaj, Jesús quincahuili Juan, Pedro, Jacobo huan inana huan itata nopa sihuapil ma itztoca calijtic ihuaya, pero sequinoc amo quincahuili ma itztoca. <sup>52</sup> Huan nochí chocayayaj huan tahuejchihuayayaj pampa ya mictoya nopa sihuapil, pero Jesús quinilhui:

—Ayecmo xichocaca. Amo mictoc, san cochtoc.

<sup>53</sup> Huan nopa masehualme pejque quihuetzquiláj pampa quimatque para ya mictoya. <sup>54</sup> Pero Jesús quimaitzqui nopa sihuapil, huan quiilhui:

—Sihuapil, ximijquehua.

<sup>55</sup> Huan itonal tacuepili ipan itacayo, huan nopa sihuapil mijquejtiquisqui. Huan Jesús quinnahuati ma quitamacaca. <sup>56</sup> Huan inana huan itata nelía quitachilijque huan quitetzaitaque, pero Jesús quinilhui amo aqui ma quiilhuica ten panoc.

## 9

*Jesús quintitanqui imomachtijcahua*

(Mt. 10:5-15; Mr. 6:7-13)

<sup>1</sup> Jesús quinnotzqui nopa majtacti huan ome imomachtijcahua ma mosentilica, huan quinmacac chicahualisti huan tequiticayot para quinquixtise ajacame ipan masehualme huan para quinchicahuase cocoyani ica ten hueli cocolisti.

<sup>2</sup> Teipa quintitanqui ma quinchicahuaca cati mocochuaj huan ma tepohuilitij quenicatzatánahuatía Toteco ipan iniyolo masehualme. <sup>3</sup> Quinilhui:

—Amo teno xijhuicaca ipan ojti. Amo xijhuicaca cuatopili, yon yoyoncoxtali, yon pantzi,

yon tomi. Huan amo xijhuicaca yoyomit cati ica anmopatase. <sup>4</sup> Huan quema ancalaquise ipan se cali para anmocahuase, ximocahuaca nopona hasta anquisase ten nopa altepet. <sup>5</sup> Huan sinta anyase ipan se pilaltepetzi campa masehualme amo amechselise, huajca quema anquisase nopona, ximotecactzejzeloca para anquiquixtilise nopa taltepocti. Huan ica nopa, anquinnextise anquintahuelcahuaj nopa pilaltepetzi ehuani para ma quiselica se hueyi tatzacuiltlisti.

<sup>6</sup> Huajca imomachtijcahua Jesús quisque huan nejnenque campa hueli ipan nochí pilaltepetzi cati nechca. Huan tepohuilijque icamanal Toteco huan quenicatza Toteco temaquixtía ten inintajtacolhua. Huan campa hueli quinchicahuayabaj masehualme cati mococohuaj.

*Mijqui Juan cati tecuaaltiyaya  
(Mt. 14:1-12; Mr. 6:14-29)*

<sup>7</sup> Nopa Gobernador Herodes Ántipas quicajqui nochí cati Jesús quichihuayaya, huan amo quimatiyaya tayamoilhuis pampa sequij quiijtohuayabaj Jesús elqui Juan cati achtohui tecuaaltiyaya pero ama moyolcuitoc. <sup>8</sup> Huan sequinoc quiijtohuayabaj sempa monextijtoya nopa tajtolpanextijquet Elías ten huejcajquiya. Huan sequinoc quiijtohuayabaj moyolcuitoya se ten nopa tajtolpanextiani cati huejcajquiya mictoyaj. <sup>9</sup> Pero Herodes quiijto:

—Juan ya mictoc pampa nitanahuati ma quiuechtzontequica, pero ¿ajquiya ni tacat cati ama nijcaqui quichijtinemi huejhueyi tiochicahualnescayot?

Huan Herodes quitemohuayaya quenicatza huelis quiitas Jesús.

*Jesús quintamacac macuili mil tacame  
(Mt. 14:13-21; Mr. 6:30-44; Jn. 6:1-14)*

<sup>10</sup> Huan tacuepilijque itayolmelajcahua Jesús, huan quipohuilijque nochí catí quichijtoyaj huan campa yajtoyaj. Huan Jesús quiniyocaquixti itayolmelajcahua ten nopa miyaqui masehualme huan quinhuicac hasta huactoc tali nechca altepet Betsaida. <sup>11</sup> Pero nopa miyaqui masehualme quimatque canque yahuiyayaj huan quintoquili-jque. Huan Jesús quinseli ica cuali huan quinilhui quenicatza tanahuatía Toteco ipan iniyolo masehualme. Huan Jesús quinchicajqui catí mococo-huayabaj.

<sup>12</sup> Huan ica tiotac monechcahuijque itayolmelajcahua Jesús huan quiilhuijque:

—Xiquintitani ni masehualme ma yaca ipan pilaltepetzi nechca quitemotij campa cochise huan catí quicuase pampa nica campa tiitztoque amo teno onca.

<sup>13</sup> Pero Jesús quinilhui:

—Amojuanti xiquintamacaca.

Huan imomachtijcahua quiilhuijque:

—San tijpiyaj macuili pantzi huan ome michime, o ¿tijnequi ma tijcohuatij catí quicuase nochí ni masehualme?

<sup>14</sup> Itztoyaj nopona nechca macuili mil tacame huan Jesús quinilhui imomachtijcahua:

—Xiquinilhuitij ni masehualme ma mosehuica ica tamontomit, ica cincuenta ipan sese monto.

<sup>15</sup> Huan imomachtijcahua quinilhuijque huan nopa masehualme quej nopa mosehuijque.

**16** Huan Jesús quicuic nopa macuili pantzi huan nopa ome michime, huan tachixqui ilhuicac huan quitascamatqui iTata. Teipa quintajcotapanqui huan pejqui quinmajmaca imomachtijcahua para ma quinmajmacaca nopa miyaqui masehualme. **17** Huan nochí nopa miyaqui masehualme tacuajque huan cuali ixhuique. Huan quisentilijque nochí pantatapatzti cati mocajtoya huan ica quitemitijque majtacti huan ome chiquihuit.

*Pedro quijito Jesús yaya Cristo  
(Mt. 16:13-19; Mr. 8:27-29)*

**18** Se tonali Jesús huan imomachtijcahua moiyoquixtijtoyaj huan yaya yajqui motatajtito iselti. Huan teipa tacuepili campa imomachtijcahua huan quintatzintoquili:

—¿Ajquiya quijitoahuaj masehualme para na?

**19** Huan imomachtijcahua quiilhuijque:

—Sequij quijitoahuaj ta tiJuan cati tecuaaltilyaya, pero sequinoc quijitoahuaj ta tiElías. Huan sequinoc quijitoahuaj ta tise tajtolpanextijquet cati huejcajquia itztoya huan ama timoyolcuitoc.

**20** Huan Jesús quintatzintoquili:

—Huan, ¿amojuanti? ¿Ajquiya anmoilhuíaj para na?

Huan Pedro quinanquili:

—Ta tiCristo cati Toteco Dios techilhui techtitanilisquía.

*Jesús quinilhui miquis  
(Mt. 16:20-28; Mr. 8:30-9:1)*

**21** Huan Jesús quinnahuati amo aqui ma quipo-huilica, **22** huan quinilhui:

—Monequi para na cati niMocuetqui Masehuali nitaijyohuis miyac. Amo nechselise nopa tay-acanca totajtzitzí, huan nopa tamachtiani ten itanahuatil Moisés, huan nopa huehue israelita tacame. Huan masehualme nechmictise, pero ica eyi tonati nimoyolcuis sempa.

**23** Huan nojquiya quinilhui:

—Sinta se quinequi nechtoquilis, monequi quielcahuas cati ya quinequi huan nechtoquilis mojmosta mocualtalijtoc para taijyohuis huan miquis pampa nechneltoca. Monequi elis quej se tacat cati quihuica icuamapel para ipan miquis. **24** Pampa cati quinequi momanahuis huan amo quinequi taijyohuis pampa nechneltoca, quema miquis quipolos nochí. Pero sinta se taijyohuis o miquis pampa nechneltoca, momaquixtis itonal huan itztos nepa ilhuicac para nochipa. **25** Huan amo ipati masque se masehuali quipiyasquía para iaxca nochí cati onca ipan ni taltipacti, pampa amo teno huelis quipalehuis quema miquis huan polihuis nepa micta. **26** Sinta se masehuali pinahua ica na huan ica nocamanal huan quijitos amo nechixmati, huajca na cati niMocuetqui Masehuali nipinahuas ica ya huan niquijtos amo niquixmati quema nitacuepilis ipan taltipacti ica notatanex, huan ica itatanex noTata, Toteco Dios. Huan ipan nopa tonali nohuaya hualase itatzelotlatica ilhuicac ejcahua ica intantanex. **27** Pero nimechilhuía, sequij amojuanti nica amo anmiquise hasta anquitätase quenicatza eltoc nepa campa tanahuatía Toteco.

*Jesús quipatac itachiyalis iniixpa  
(Mt. 17:1-8; Mr. 9:2-8)*

<sup>28</sup> Jesús quiijito ya ni huan hualchicueyi quinhuicac Juan, Jacobo huan Pedro huan tejcoque ipan se tepet para motatajtise. <sup>29</sup> Huan quema Jesús motatajtiyaya, ixayac mopatac huan iyoyo mocuetqui chipahuac huan cahuaniyaya. <sup>30</sup> Huan nesque ome tacame cati quicamanalhuiyaya. Elque Moisés huan Elías. <sup>31</sup> Huan quinyahualojtoya se tatanexti cati tahuel cahuaniyaya. Huan quicamanalhuiyaya Jesús ten quenicatza quitamisencahuas para miquis huan quistehuas ten ni taltipacti ipan Jerusalén. <sup>32</sup> Achtohui Pedro huan ihuampoyohua tahuel cochisnequiyaya, pero teipa cuali tachixque huan quiitaque itatanex Jesús huan nopa ome tacame cati moquetzayayaj ihuaya. <sup>33</sup> Huan quema nopa ome ya itztoyaj para quisase, Pedro quiilhui Jesús:

—Tamachtijquet, cuali tiitztose nica. Ma tijchi-huaca eyi pilxajcaltzitz. Se para ta, seyoc para Moisés, huan seyoc para Elías.

Pero Pedro nelía amo quimachiliyaya cati quiijtohuayaya. <sup>34</sup> Huan quema Pedro quiijtohuayaya nopa camanali, temoc se mixti huan quintazqui huan nelía momajmatijque, pampa quiitaque temoyaya nopa mixti ipan inijuanti. <sup>35</sup> Huan quicajque se cati quincamanalhui ipan nopa mixti huan quiijto: “Ya ni Nocone cati niquicneélia. Xijcaquica cati quiijtohua.”

<sup>36</sup> Huan quema Toteco Dios tanqui camanalti, quiitaque Jesús itztoya iselti. Huan para miyac tonali nopa eyi imomachtijcahua mocamatzajque

huan amo teno quiijtojque ten cati quiitztoyaj ipan nopa tepet.

*Jesús quiquixti se iajacayo Amocualtacat  
(Mt. 17:14-21; Mr. 9:14-29)*

<sup>37</sup> Tonili Jesús huan nopa eyi imomachtijcahua temoque ten nopa tepet, huan quinnamijque tahuel miyaqui masehualme. <sup>38</sup> Huan camanaltic chicahuac se tacat cati itztoya campa nopa miyaqui masehualme huan quiijto:

—Tamachtijquet, nimitztajtanía xijtachiliqui nooquichpil pampa piliyojtzi. <sup>39</sup> Huan se iajacayo Amocualtacat quiitzquia, huan tzajtzi, huan nimantzi quitahuisohua ica se ajaca cocolisti, huan quichihua ma huihuipica chicahuac huan ma camaposoni. Quitaijyohuilitia nocone miyac huan amo quema quicahua. <sup>40</sup> Huan niqintajtani momomachtijcahua ma quiquixtilica, huan amo huelque.

<sup>41</sup> Huan Jesús quinanquili huan quiijto:  
—¡Ay amojuanti cati amo antechneltocaj! Chicotic amotalnamiquilis. ¿Quesqui tonali monequi nimocahuas amohuaya? ¿Quesqui tonali monequi nimechijyohuis? Techhualiquila mooquichpil.

<sup>42</sup> Huan quema monechcahuiyaya ioquichpil, nopa ajacat quitahuiso talchi huan quimacac se ajaca cocolisti, huan pejqui chicahuac huihuipica. Pero Jesús quinahuati nopa ajacat ma quisa huan mochicajqui nopa oquichpil. Huan Jesús sempa quimactili itata. <sup>43</sup> Huan nochí quitachiliyayaj huan quitetzaitayayaj ihueyitilis Toteco.

*Jesús quinilhui imomachtijcahua yaya miquis  
(Mt. 17:22-23; Mr. 9:30-32)*

Pero quema nochí noja san quitachiliyayaj ica cati Jesús quichijtoya, yaya quinilhui imomachtijcahua:

**44** —Xijtacaquilica cuali ni camanali cati nimechilhuía ama huan amo xiquelcahuaca. Nechtemactilise na cati niMocuetqui Masehuali inimaco amo cuajcualme.

**45** Pero imomachtijcahua amo quimachilijque cati quiijto pampa amo quincahuili para ma quimachilica cuali, huan majmahuiyayaj para quitatzintoquilise taya quiijtosnequi.

*Ajquia elis más hueyi iixpa Toteco  
(Mt. 18:1-5; Mr. 9:33-37)*

**46** Huan imomachtijcahua Jesús pejque monajnanquiliáj catijqui ten inijuanti quipiyas más tequiticayot. **47** Huan Jesús quimatiyaya cati moilhuiyayaj ipan inintalnamiquilis, huan yeca quihualicac se conet huan quiquetzqui inechca.

**48** Huan quinilhui:

—Cati quiselía se conet quej ni pampa nechneltoca, yaya nechselía na. Huan cati nechselía na, nojquiya quiselía noTata cati nechtitancoc. Huan yaya ten amojuanti cati más moechcapanos, yaya más quipiyas tequiticayot.

*Cati amo techcualancaita itztoc tohuaya  
(Mr. 9:38-40)*

**49** Huan teipa Juan quiilhui:

—Tamachtijquet, tiquitaque se cati quinquixtiliyaya masehualme iajacahua Amocuallatcat ica

motoca\*, huan tiquilhuijque ma ayecmo quichihua pampa amo nemí tohuaya.

<sup>50</sup> Pero Jesús quiilhui:

—Amo xijtzacuilica pampa se cati amo techcualancaita itztoc tohuaya.

### *Jesús quinajhuac Jacobo ihuaya Juan*

<sup>51</sup> Huan quema ya monechcahuiyaya nopa tonali para yas ilhuicac, Jesús quielcajqui nochí sequinoc tamanti huan motemamac para yas Jerusalén huan quistejqui. <sup>52</sup> Huan quintitanqui se ome tacame ma tayacanaca para quitemotij campa mocahuasquíaj ipan ojti. Huan inijuanti calajque se pilaltepetzi ipan estado Samaria para quisencahuasquíaj. <sup>53</sup> Pero masehualme nopena amo quinselijque pampa quimatque Jesús motalijtoya para yas altepet Jerusalén. <sup>54</sup> Huan quema quiitaque Juan huan Jacobo para amo quinselijque, quitatzintoquilijque Jesús:

—Toteco, ¿tijnequi ma tijnahuatica tit ma huetzit en ilhuicac quej quichijqui Elías huan ma quintamitati ni masehualme?

<sup>55</sup> Huan Jesús moicancuetqui huan quinajhuac:

—Se ajacat amechchihuilá quej nopa xicamanaltica huan amo anquiixmatij. <sup>56</sup> Na cati niMocuetqui Masehuali nihualajtoc para niquinmaquixtis masehualme. Amo nihualajtoc para niquintzontamiltis.

Huan nochí inijuanti yajque seyoc pilaltepetzi.

### *Masehualme cati quinejque quitoquilise Jesús (Mt. 8:19-22)*

\* **9:49** 9:49 O quiijtohuayayaj para quipixtoyaj motequiticayo.

**57** Huan quema nochí yahuiyayaj ipan ojti, se tacat quiilhui Jesús:

—Toteco, nimitztoquilis campa hueli tiyas.

**58** Huan Jesús quiilhui:

—Cayochime quipiyaj ininchaj huan totome quipiyaj inintepasol, pero na cati niMocuetqui Masehualí amo cana njipiya para nimotzontecas.

**59** Huan Jesús quiilhui seyoc:

—Techtoquili.

Pero yaya quiilhui:

—NoTeco, achtohui techcahuili ma njitalpachos notata quema miquis.

**60** Pero Jesús quiilhui:

—Xiquincahuili inijuanti cati mictoque iixpa Toteco ma quintalpachoca inimijcahua. Pero ta xiya huan xiquinyolmelahuati masehualme quenicatzá Toteco tanahuatía.

**61** Huan seyoc tacat quiilhui Jesús:

—Nimitztoquilis, noTeco, pero achtohui techcahuili niyas niquinnahuatiti cati itztoque nocalicitic.

**62** Pero Jesús quiilhui:

—Se tacat cati talpoxonía ica tapiyalme huan moicanita quichihua isurco huijcoltic, huan nojquiya se cati pehua quitoquilíia iojhui Toteco huan talojtzitzí moilhuía cati quicajtejtoc, amo quinamiqui calaquis campa Toteco tanahuatía.

## 10

*Jesús quintitanqui setenta itatoquilijcahua ma tequitica*

<sup>1</sup> Huan teipa Jesús quintequimacac seyoc setenta tacame huan quintitanqui ma yaca ojome para tayacanase ipan nochi altepeme huan pilaltepetzitzi campa Jesús ajsisquía. <sup>2</sup> Huan yaya quinilhui: “Itztoque miyaqui cati quichiyaj para quicaquise nocamanal, pero amo miyaqui para yase huan quinilhuitij. Eltoc quej onca se hueyi pixquisti huan san itztoque se o ome masehualme para quisentilise. Xijtajtanica Toteco Dios ma quintitani más tequipanohuani para ma teilhuica icamanal pampa nopa pixquisti iaxca. <sup>3</sup> Amojuanti anelise quej borregojme cati mopantíaj ica tepechichime ipan nopa tequit campa nimechtitani. <sup>4</sup> Amo xihuicaca se morral, yon se payo para anmotominpique. Amo xihuicaca seyoc amotecac huan amo ximoquetziyaca ipan ojti para antetajpalose. <sup>5</sup> Huan quema ancalaquise ipan se cali, xijtajtanica Toteco ma quintiochihua cati itztoque nopona. <sup>6</sup> Huan sinta quinamiqui para cati nopona itztoque quiselise se tatiochihualisti, Toteco quintiochihuas. Huan sinta amo quinamiqui, Toteco amo quintiochihuas. <sup>7</sup> Huan ximocahuaca ipan nopa cali campa amechselíaj, huan xijuacaca huan xiquica cati amechmacase pampa quinamiqui se tequipanojquet quiselis itaxtahuil ten itequi. Ximocahuaca ipan san se cali ipan sese altepet, huan amo san campa hueli xicotchinemica. <sup>8</sup> Huan quema anasitij ipan se altepet campa amechselise, xijuacaca cati amechmacase. <sup>9</sup> Huan xiquinchicahuaca cati mococohuaj huan xiquinilhuica: ‘Toteco Dios cati tanahuatía ipan iniyolo masehualme

amechnechcahuijtoc ama.’ <sup>10</sup> Huan quema ancalaquise ipan se altepet huan masehualme nopona amo amechselise, xiyaca ipan ojti huan xiquijtoca: <sup>11</sup> ‘Nochi ni taltepoc ti ten amoaltepe cati tatzquitoc ipan totecac tijtzejzelohuaj para quinextis nopa tatzacuiltli cati amechajsis pampa amo antechselijke. Pero xijmatica para melahuac ama Toteco amechnechcahuijtoc para amechnotzas xicalaquiaca campa yaya tanahuatía.’ <sup>12</sup> Huan nimechilhuía, quema Toteco tetajtolsencahuas, nopa masehualme ipan nopa altepet cati amo amechselise, quiselise se tatzacuiltli cati más hueyi huan amo quej cati quiselijke nopa masehualme cati itztoyaj ipan altepet Sodoma huejcajquiya.

*Teicneltique cati amo quitepanitaj Toteco  
(Mt. 11:20-24)*

<sup>13</sup> “Anteicneltique anCorazín ehuani pampa Toteco amechtatzacuiltis. Anteicneltique anBetsaida ehuani, pampa amo antechneltocaque quema nijchijqui huejhueyi tiochicahualnescayot amoixpa. Sinta nopa masehualme cati huejcajquiya itztoyaj ipan altepeme Tiro huan Sidón quiitztosquíaj cati nijchijqui amoixpa, moyolpatatosquíaj nimantzi, huan nochí masehualme quimajtosquíaj. <sup>14</sup> Huajca quema Toteco tetajtolsencahuas, más chicahuac amechtatzacuiltis huan amo quej nopa amo cuajcualme cati itztoyaj ipan Tiro huan Sidón huejcajquiya. <sup>15</sup> Nojquiya anCapernaum ehuani anmohueyimati huan anmoilhuíaj anmotanananase hasta ilhuicac, pero amo

neli. Antemose hasta micta pampa amo anmoyolpatatoque.”

<sup>16</sup> Huan Jesús sempa quinilhui imomachtijc ahua: “Masehualme cati quicaquise amocamanal ica cuali, cuali nechtacaquilise, huan cati amechhuejcamajcahuase, nojquiya nechhuejcamajcahuase huan quihuejcamajcahuase yaya cati nechtitantoc.”

### *Mocuetque nopa setenta*

<sup>17</sup> Huan teipa nopa setenta cati Jesús quintiantoya tacuepilijque ica paquilisti huan quiilhuijque:

—Toteco, hasta iajacahua Amocuältacat techneltocaque quema tiquinnahuatijque ipan motoca\*.

<sup>18</sup> Huan Jesús quinilhui:

—Quena, niquitac Amocuältacat huetzqui ten ilhuicac quej nesi quema huetzi se tioxchit quema tapetani. <sup>19</sup> Xiquitaca, nimechmacatoc tequiticayot para ipan anmoquejquetzase cohuame huan colome, huan para anquitanise nochí ichicahualis Amocuältacat. Amo teno huelis amechcos. <sup>20</sup> Pero amo tahuel xipaquéica pampa ajacame amechchihuilíaj amocamanal. Más quinamiqui xipaquéica pampa ya ijculijtoc amotoca ipan iama Toteco nepa ilhuicac.

### *Jesús quipaquilismacac Toteco (Mt. 11:25-27; 13:16-17)*

<sup>21</sup> Huan ipan nopa talojtzi Itonal Toteco quimacac Jesús miyac paquilisti huan Jesús quiilhui iTata: “Nimitzpaquilismaca, noTata, ta

---

\* **10:17** 10:17 Ica motequiticayo.

tiToteco Dios cati titanahuatía ipan ilhuicac huan taltipacti. Tijtatijtoc motalnamiquilis para amo ma quimachilica masehualme catí mohueyimatij huan cati moilhuáj talnamiquij. Pero ama tiquinnextilía motalnamiquilis masehualme cati moechcapanohuaj quej coneme moixpa. Quena, Notata, quej nopa tijchijqui pampa quej nopa mopaquilis.”

<sup>22</sup> Huan Jesús quinilhui nopa masehualme: “No-Tata nechmacatoc tequiticayot ica noch tamanti. Amo aqui cuali nechixmati na cati niIcone Toteco, san noTata, quena, cuali nechixmati. Huan amo aqui cuali quiixmati noTata, san na nilcone huan cati nijnequi nijnextilía ajquiya ya.”

<sup>23</sup> Huan teipa moicancuetqui Jesús huan quintachili imomachtijcahua huan iyoca quinilhui: “Xipiyaca paquilsti ica noch cati anquuitaj. <sup>24</sup> Nimechilhuía, miyaqui tajtolpanextiani huan tanahuatiani cati huejcajquiya itztoyaj quinejque quiitase cati ama anquuitaj, pero amo quiitaque. Inijuanti quinequiyayaj quicaquise cati ama anquicaquij, pero amo huelque.”

### *Nopa cuali Samaria ejquet*

<sup>25</sup> Huan se tamachtijquet ten itanahuatil Moisés moquetzqui para quimasiltis Jesús ica icamanal huan quitatzintoquili:

—Tamachtijquet, ¿taya monequi nijchihuas para nijselis nopa nemilsti cati amo quem tamis?

<sup>26</sup> Huan Jesús quiilhui:

—¿Taya ijcuilijtoc ipan itanahuatil Moisés?  
¿Quenicitza tijmachilía ta?

<sup>27</sup> Huan yaya quinanquili:

—Xiquicneli Toteco Dios ica nochimoyolo, huan ica nochimoaalma, huan ica nochimochicahualis, huan ica nochimotalnamiquilis, huan xiquinicneli sequinoc quej timoicnelía.

<sup>28</sup> Huan Jesús quiilhui:

—Cuali technanquilijtoc. Huajca xijchijtinemi nochimaya ni huan tiitztos.

<sup>29</sup> Pero nopa tacat quinequiyaya monextis cuali iniixpa nopa masehualme, huajca quitatzintotquili Jesús:

—¿Ajquiya ne sequinoc cati monequi niquinicnelis quej nimoicnelía?

<sup>30</sup> Huan Jesús quinanquili:

—Se tacat quisqui altepet Jerusalén huan temoyaya ipan nopa taixtemolis cati ajsi altepet Jericó. Huan tachtequini quipantijque, huan quiqxtilijque iyoyo huan nochimati quipixqui. Huan teipa quihuitejque huan quicajtejque quej mictoc. <sup>31</sup> Huan panoc se totajtzi ipan ojti huan quiitac nopa tacat huilantoc, pero quitalcahui huan quichijqui quej amo quiitac.

<sup>32</sup> Huan nojquiya hualajqui se levita cati tapalehui ipan israelita tiopamit. Huan yaya ajsico campa huilantoya huan quiitac, pero nojquiya san quipanoc huan quichijqui quej amo quiitac. <sup>33</sup> Pero hualayaya ipan ojti se Samaria ejquet†, huan ajsico nopona huan

---

† **10:33** 10:33 Israelitame tahuel quincualancaitayayaj nochim tali Samaria ehuani huan amo quema quinnojnotzayayaj.

quiitac nopa tacat huetztoc, huan quitasojtac.  
<sup>34</sup> Quinechcahuito huan quipajpaquili campa cocojtoya ica xocomeca at, huan teipa quitequili aceite, huan quihuijconqui ica se yoyomit. Huan quitejcolti ipan iburro huan quihuicac ipan se cali campa cochij paxalohuani huan quimocuitahui. <sup>35</sup> Huan tonili quiqxinti tomi para ome tonati ten tequit, huan quimacac nopa tacat cati quinmocuitahuía paxalohuani huan quiilhui: ‘Xijmocuitahui ni cocoxquet huan sintia tijyaltis más tomi para tijmocuitahuis, huajca quema nitacuepilis, nimitztaxtahuis.’

Huajca Jesús quitatzintoquili nopa tamachtijquet ten itanahuatil Moisés:

<sup>36</sup> —¿Catijqui ten ni eyi tacame cati hualajque ipan ojti quiicneli nopa tacat cati quitachtequili-jque quej yaya moicnelía?

<sup>37</sup> Huan nopa tamachtijquet ten itanahuatil Moisés quiijto:

—Yaya cati quitasojtac.

Huan Jesús quiilhui:

—Quena, nelía. Xiya ta huan quej nopa nojquiya xijchihua.

### *Jesús ipan ichaj Marta huan María*

<sup>38</sup> Teipa Jesús yajqui ipan ojti hasta se pilaltepetzi, huan se sihuat itoca Marta quiseli ica cuali ipan ichaj. <sup>39</sup> Yaya quipixtoya se iicni cati itoca María cati mosehuico iicxita Jesús huan

quitacaquiliyaya icamanal. <sup>40</sup> Huan Marta quipixtoya miyac tequit huan san ya nopa quichihuayaya, pampa quisencahuayaya miyac tacualisti para Jesús. Huajca Marta quinechcahuico huan quiilhui:

—Toteco, ¿amo tiquita noicni nechcajtejtoc para noselti ma nijsencahua nochí cati tijcuase? Xiquilhui ma nechpalehuiqui.

<sup>41</sup> Pero Tohueyiteco Jesús quinanquili:

—Marta, Marta, timocuesohua huan timotequi-huía ica miyac tamanti cati tijchihua, <sup>42</sup> pero san setzi tamanti monequi. María quitapejpenijtoc para quicaquis nocamanal, huan ya nopa achi cuali, huan amo aquí huelis quiqxtilis.

## 11

*Jesús techilhui quenicatza ma timotatajtica  
(Mt. 6:9-15; 7:7-11)*

<sup>1</sup> Se tonali Jesús moiyo aquixti huan motatajtito campa momatqui yahui. Huan teipa quema tanqui, se imomachtijca quinechcahuico huan quiilhui:

—Tohueyiteco, techmacthi quenicatza ma timotatajtica quej Juan quinmacthi imomachtijcahua.

<sup>2</sup> Huan Jesús quinlhui:

—Quema anmotatajtíaj ica Toteco Dios, xiquilhuiica:

Toteco Totata, ta cati tiitztoc nepa ilhuicac.

Nochi masehualme ma mitzhueyichihuaca\*.

Xihuala xitanahuati qui nica.

---

\* **11:2** 11:2 Ma quihueyichihuaca motoca.

Nochi masehualme ma quichihuaca cati ta ti-jnequi nica ipan ni taltipacti,

quej nochí quichihuaj mopaquilis nepa ilhuicac.

<sup>3</sup> Techmaca nopa tacualisti cati monequi mojmosta.

<sup>4</sup> Techtapojpolhui totajtacolhua quej nojquiya tiquintapojojpolhuíaj cati techixpanoj.

Amo aqui xijcahuili ma techyoltilana para titajta-colchihuase.

Techmanahui ten yaya cati amo cuali.

<sup>5</sup> Huan Jesús quinilhui nojquiya:

—Ximoilhuica sintá tajco yohual se ten amojuanti yas ichaj se amohuampo huan quiilhuis: ‘Nohuampo, techtanejti se ome pantzi,  
<sup>6</sup> pampa se nohuampo ajsico huan huejca huala, huan amo teno nijpiya para nijmacas.’ <sup>7</sup> Huan huelis mohuampo mitznanquilis ya caltzactoc huan mitzilhuis: ‘Amo techcuatotoni. Ya nimocaltzactoc, huan noconebla ya itztoque nohuaya ipan tapechti. Huan amo hueli nimijquehuas para nimitzmacas cati tijnequi.’

<sup>8</sup> Nimechilhuía, huelis yaya amo mijquehuas para mitzmacas cati tijtajtanía pampa tiihuampo, pero sintá amo tijcahua tijtajtanía cati tijnequi, yaya mijquehuas huan mitzmacas nochí cati tijtajtanía san pampa quinequis ayecmo xijcuatotoni más. <sup>9</sup> Huajca nimechilhuía, xijtajtanica Toteco ten amechpolohua, huan yaya amechmacas. Xijtemoca cati amechpolohua huan anquipantise. Xijnotzaca Toteco huan yaya amechcaltapos. <sup>10</sup> Pampa nochí cati tajtanij, quiselíaj. Huan nochí cati quitemohuaj cati quinpolohua,

quipantíaj. Huan nochí catí quinotzaj Toteco, yaya quincaltapohua huan quinmaca catí quitajtaníaj.

**11** “Huan amojuanti catí anquinpiyaj amocone-hua, sintá se mocone mitztajtanis se pantzi para quicuas, amo tijmacas se tet. Huan sintá mocone mitztajtanis se michi para quicuas, amo tijmacas se cohuat. **12** Huan sintá mocone mitztajtanis se tecsistí, amo tijmacas se colot ma quicuas. **13** Pampa masque antajtacolchihuani, anquimati j anquinmacase amocone-hua catí cuali. Huajca achi más Totata catí itztoc ilhuicac quimati quinmacas iconehua catí cuali, huan yaya quinmacas Toteco Itonal nochí catí quitajtanise.”

*Moilhuijque para Jesús quipixqui se ajacat  
(Mt. 12:22-30; Mr. 3:20-27)*

**14** Huan Jesús quiquirixti se iajacayo Amocuältacat ipan se tacat catí quichijtoya ma eli nonotzi. Huan quisqui nopa ajacat, huan nopa tacat camanaltic huan nochí nopa masehualme san quitachilijque. **15** Pero sequij inijuanti quijtojque: “Amocuältacat † yaya catí inintayacanca nochí ajacame quimaca chicahualisti ni Jesús ma quinquixti ajacame.”

**16** Huan sequinoc masehualme quinequiyayaj quiyejyecose Jesús huan quitajtaniyayaj ma quichihua se tanextili catí huala ten ilhuicac para ma quinnextili ichicahualis. **17** Pero Jesús quimatqui inintalnamiquilis huan quinlhui: “Sinta masehualme ipan se tali ica se tanahuatijquet motajcoxelohuaj, huajca amo

---

† **11:15** 11:15 Nopa masehualme quitocaxtijque Amocuältacat, Beelzebú.

hueli huejahuas inintal. Sinta masehualme ipan se cali motajcoxelohuaj, amo hueli itztose san sejco. <sup>18</sup> Huan sintia Amocualtacat motehuis ica ajacame cati iaxcahua, ¿quenicatzia huejahuas itequiticayo? Anquijtohuaj niquinquixtia ajacame ica chicahualisti cati Amocualtacat nechmaca. <sup>19</sup> Pero sintia niquinquixtisquia ajacame ica ichicahualis, huajca ¿ica ajquiya ichicahualis quinquixtiaj ajacame nopa masehualme cati amechtoquilaj? Injuanti nojquiya amechilhuise para se huihuiyot cati anmoilhuijaj. <sup>20</sup> Pero xijmachilica, sintia yaya Toteco Dios cati nechmaca ichicahualis para niquinquixtis ajacame, huajca Toteco cati tanahuatia ipan iniyolo masehualme ya ajsico amohuaya.

<sup>21</sup> “Sinta se tetica tacat quej Amocualtacat quiyiya tepesti huan cuali quimocuitahuia ichaj, huajca nochia cati quiyiya eltoc temachti imaco, <sup>22</sup> hasta quema hualas se quej na cati mas tetic que ya huan quitanis. Huajca quena, huelis quicuilis nochia itepos ipan cati motemachia, huan huelis quihiucas nochia cati iaxca para quixelos ica se-quinoc.

<sup>23</sup> “Se cati amo quinequi techpalehuis, yaya nocualancaitaca. Huan se cati amo quinsentilia masehualme campa na, quinsemana

*Ajacame huelis tacuepilise  
(Mt. 12:43-45)*

<sup>24</sup> “Quema quisae se ajacat ipan se masehuali, nemi ipan huactoc tali quitemojtinemi canque mosiyajquetzas, huan sintia amo teno quipantis,

moilhuis: ‘Nitacuepilis nochaj ipan nopa masehuali campa niitztoya.’<sup>25</sup> Huan quema tacuepilis, quipantis iyolo nopa masehuali eltoc quej se cali cati tachpanti huan cati quipyia nochi cuali tacualtalili.<sup>26</sup> Huajca nopa ajacat yas huan quinhuicas chicome ajacame cati más fierojtique que ya huan nochi nopa ajacame itztotij ipan nopa masehuali. Huan nopa masehuali mocahuas más fiero que achtohuiya.”

*Ajquiya quipantía cati cuali*

<sup>27</sup> Huan quema Jesús tamachtiyaya ya ni, camanaltic se sihuat cati itztoya ica nopa miyaqui masehualme, huan chicahuac quijito:

—Cuali quipanti nopa sihuat cati mitztacatilti huan mitzchichitti.

<sup>28</sup> Pero Jesús quinanquili:

—Más cuali quipantíaj nopa masehualme cati quicaquij icamanal Toteco huan quineltoquilíaj.

*Amo cuajcualme quinejque se tanextili*

(Mt. 12:38-42; Mr. 8:12)

<sup>29</sup> Huan nopa masehualme pejque momiyaquilíaj huan Jesús quinlhui:

—Anmasehualme cati ama anitztoque amo ancuajcualme. Anquinequij ma nimechchihuili se tanextili para nimechnextilis ajquiya na. Pero amo nijchihuas. San Jonás eltoc quej se tanextili para amojuanti.<sup>30</sup> Pampa quej Jonás elqui se tanextili para masehualme ipan altepet Nínive huejcajquia, na cati niMocuetqui Masehuali nieltoc se tanextili para anmasehualme cati ama anitztoque.<sup>31</sup> Ipan nopa tonali quema Toteco tetajtolsencahuas, nopa sihua tanahuatijquet ten

Sur ‡ moyolcuis huan amechtelhuis cati ama antztoque, pampa yaya hualajqui tahuel huejca quema itztoya ipan taltipacti pampa quinejqui quicaquis italnamijca camanal Tanahuatijquet Salomón. Pero na más nihueyi que Salomón huan amo antechchihuiláj cuenta. <sup>32</sup> Huan quema Toteco tetajtolsencahuas, masehualme cati huejcajquiya itztoyaj ipan altepet Nínive moyolcuise huan amechtatehuiuse, pampa injuanti moyolpataque quema Jonás quincamanalhui ten ica-manal Toteco, pero na más nihueyi que Jonás huan amo antechcaquij.

*Nopa taahuili ipan totacayo*

(Mt. 5:15; 6:22-23)

<sup>33</sup> “Amo aqui quitatía se taahuili huan quitalía campa amo nesi. Amo aqui quitalis cajo tzinta. Sinta se masehuali quitatía se taahuili, quitalía ipan se taahuil quetzali para nochí cati calaquise ma quiitaca. <sup>34</sup> Moixteyol eltoc quej itaahuilo motacayo. Sinta cuali moixteyol, hueli calaqui taahuili ipan moyolo. Pero sinta amo cuali moixteyol, tiitztoc quej se cati tzactoc iyolo. Amo hueli tijmachilía nocamanal huan motalnamiquilis mocahua ipan tzintayohuilot. <sup>35</sup> Huajca ximotachili cati tijchihua ica nopa taahuili cati tijpiya pampa tijcactoc cati melahuac. Xijcahua ma mitzyolpata para amo sempa titacuepilis ipan tzintayohuilot. <sup>36</sup> Pero sinta nelía senquisa tijselía nocamanal, huajca nochí motacayo huan motalnamiquilis quipiyas taahuili huan amo oncas tzintayohuilot ipan ta.

---

‡ 11:31 11:31 Sabá.

Quena, elis quej se taahuili cati mitztaahuilijtos ipan motalnamiquilis.”

*Jesús quintelhui fariseos*

(Mt. 23:1-36; Mr. 12:38-40; Lc. 20:45-47)

<sup>37</sup> Huan quema Jesús tanqui tamachtía, itztoya nepa se fariseo cati quinotzqui ma yahui tacuati ichaj. Huan Jesús yajqui huan mosehui campa mesa. <sup>38</sup> Huan nopa fariseo quitachili quema Jesús amo momajtequi miyac huelta quej quiijtojque itanahuatil Moisés ma quichihuaca masehualme.

<sup>39</sup> Pero Tohueyiteco quiilhui:

—Anfariseos anquipajpacaj amotacayo, pero amoyolo amo anquipajpacaj. Ipan amoyolo san anmoyolilhuíaj ten tachtequisti huan cati amo cuali hueli anquichihuase. <sup>40</sup> ¡Anhuihuitque! Toteco quichijqui amotacayo, pero nojquiya quichijqui amoyolo. <sup>41</sup> Xijchijtinemica cati cuali ica nochí amoyolo huan amoyolo elis senquisa tapajpactic.

<sup>42</sup> “¡Anteicneltique anfariseos! Toteco tahuel amechtatzacuiltis. Anquimacaj Toteco majtacti por ciento ten nochí cati anquipiyaj hasta nopa tacualpajyot cati más pilquentzi ipan amoxochimil, pero amo anquichihuaj cati xitahuac huan amo anquichihuilíaj cuenta quenicatza Toteco quinicnelía masehualme. Ni tamanti achi más ipati iixpa Toteco. Huajca monequi anquichihuase catí más ipati huan nojquiya amo anquicahuase anquimacase Toteco se majtacti por ciento.

<sup>43</sup> “¡Anteicneltique anfariseos! Toteco tahuel amechtatzacuiltis. Amechpactía amosehuise

campa cuali siyaj campa onca más tatepanitacayot ipan tiopamit. Amechpactía para masehualme ma amechtajpaloca ica cuali ipan tianquis.

**44** “¡Anteicneltique anfariseos huan antamachtiani ten itanahuatil Moisés! Toteco tahuel amechtatzacuiltis. Anitztoque quej nopa mijca ostome cati amo nesi sinta mijca ostot huan yeca masehualme nemij ipani huan amo quimatiq sinta ipan moquejquetzaj.”

**45** Huan camanaltic se ten nopa tacame cati tamachtíaj taya quinequij quiijtose itanahuatil Moisés huan quiilihui Jesús:

—Tamachtijquet, quema tiquintelhuía fariseos, nojquiya techixcohuía tojuanti cati titamachtíaj taya quiijtosnequij itanahuatil Moisés.

**46** Huan Jesús quinanquili:

—Nojquiya anteicneltique cati antamachtíaj taya quiijtosnequij itanahuatil Moisés. Toteco tahuel amechtatzacuiltis. Antemacaj miyac tanahuatilme cati anquijtohuaj monequi nochí quitoquilise hasta amo aquí hueli quitamitoquilis. Eltoc quej anquinmamaltíaj masehualme cati etic, pero amo anquinequij anquinpalehuise ica yon se amomacpil.

**47** “¡Anteicneltique! Toteco tahuel amechtatzacuiltis. Anquinchihiuilíaj mijca calme para itajtolpanextijcahua Toteco para sequinoc ma moilhuica anquintepanitaj, pero amojuanti amotatahua cati quinmictijque,  
**48** huan anpaquij ica cati quichijque. Quena, amohuejcapán tatahua quinmictijque huan ama anquinchihiuilíaj inimijca calhua.

**49** “Yeca Toteco cati quipiya nochí tal-namiquilisti huejcajquiya quijito ten amojuanti: ‘Niquintitanilis notajtolpanextijcahua, huan notayolmelajcahua huan sequij quinmictise, huan sequinoc quintaijyohuiltise.’ **50** Huan yeca Toteco amechita anmasehualme cati ama anitztoque huan quijtohua para anquihuicaj tajtacoli por nochí inieso nopa tajtolpanextiani cati masehualme quinmictijque hasta quema pejqui taltipacti. **51** Quena, san sejco anquihuicaj tajtacoli por nochí cati temictijtoque ten huejcajquiya quema mijqui Abel huan hasta amanoc quema masehualme quimictijque Zacarías tatajco ten nopa taixpamit huan nopa hueyi tiopa. Nochi ni tajtacoli nimechilhuía anquihuicaj cati ama anitztoque.

**52** “¡Anteicneltique cati antamachtíaj taya quiijtosnequij itanahuatil Moisés! Toteco tahuel amechatzacuilton. Anquintzacuilton cati quinequij quimatise italnamiquilis Toteco. Amo anquimachilíaj italnamiquilis huan amo anquincahuilíaj ma quimachilica sequinoc cati quinequij quimachilise.”

**53** Huan quema Jesús tanqui quijito ya ni, nopa fariseos huan tamachtiani ten itanahuatil Moisés tahuel cualanque ihuaya huan pejque quitatzintoquilíaj miyac tamanti cati nelohui. **54** Quinequiyayaj ma quijito se tenijqui cati ica huelis quitatelhuise.

*Ma amo tijpiyaca ome toxayac  
(Mt. 10:26-27)*

<sup>1</sup> Quema Jesús quijjtohuayaya nochí ni camanali, mosentilijtoyaj miyac miles ten masehualme huan tahuel mocuatetzopayayaj. Huan Jesús quincamanalhui imomachtijcahua iniixpa nopa miyaqui masehualme huan quinilhui: “Ximotachilica para amo anquiselise inintasonej-cayo fariseos pampa injuanti san quipiyaj ome inixayac huan huelis amechchihualtise nojquiya anquipiyase ome amoxayac. <sup>2</sup> Nochi cati masehualme quichihuaj ixtacatzi ama, teipa monextis. Huan nochí cati ama amo nesi, teipa nochí quimatise. <sup>3</sup> Huan nochí cati anquijjtoque quema tayohua, nochí quicaquise tonaya. Huan cati ixtacatzi anmoilhuijtoque ipan amocalijtic, teipa masehualme moquetzase inintzonixco calme huan chicahuac tayolmelahuase.

*Amo xiquinimacasica masehualme  
(Mt. 10:26-31)*

<sup>4</sup> “Nohuampoyohua ya ni nimechilhuía. Amo xiquinimacasica masehualme. Inijuanti san hueli amechmictise, pero amo teno más hueli amechchihuilise. <sup>5</sup> Pero nimechilhuis ajquiya monequi xiquinimacasica. Xiquinimacasica Toteco, pampa yaya huelis amechmictis huan nojquiya quipiya tanahuatili para quititanis amoalma nepa micta. Quena, nimechilhuía, yaya cati monequi anquimacasise.

<sup>6</sup> “Masque quinamacaj maculti piltototzitzi para ome centavos, Toteco amo quielcahua yon se ten injuanti. <sup>7</sup> Huan ica amojuanti más miyac

Toteco amechmocuitahuía hasta quimati quesqui amotzoncal anquipiyaj. Huajca amo ximomajmatica. Tahuel más amopati iixpa Toteco que miyac totome.

*Ajquiya itztoque iaxcahua Jesucristo  
(Mt. 10:32-33; 12:32; 10:19-20)*

<sup>8</sup> “Huan nimechilhuía, nochí masehualme cati nechneltocaj huan tepohuilíaj para nechneltocaj, na cati niMocuetqui Masehuali, niquinilhuis iilhuicac ejcahua Toteco para nopa masehualme noaxcahua. <sup>9</sup> Pero sinta se teilhuía para amo nechneltoca, huajca na nojquiya niquinilhuis iilhuicac ehuani Toteco para yaya amo noaxca.

<sup>10</sup> “Sinta se nechtaijilhuía na cati niMocuetqui Masehuali ica cati amo cuali, Toteco huelis quitapojpolhuis. Pero sinta se quitaijilhuis Itonal Toteco, amo quema oncas tapojpolhuili.

<sup>11</sup> “Huan quema masehualme amechhuicase iniiuxpa tayacanani ipan toisraelita tiopahua huan iniiuxpa sequinoc tanahuatiani huan tequichihuani, amo ximotequipachoca taya anquijitose huan quenicatza anmomanahuise, <sup>12</sup> pampa Itonal Toteco amechnextilis ipan nopa talojtzi taya monequi anquijitose.”

*Mahuilili para se masehuali moricojchihuas*

<sup>13</sup> Huan se ten nopa miyaqui masehualme quiilhui Jesús:

—Tamachtijquet, xiqualhui noicni ma nechmaca cati noaxca ten cati totata techcahuilijtejtoc.

<sup>14</sup> Huan Jesús quiilhui:

—Tate, amo aqui nechtequimacatoc para nielis se juez campa amojuanti para nijtajcoxelos cati anquipiyaj.

<sup>15</sup> Huan teipa Jesús quinilhui nopa miyaqui masehualme:

—Ximomocuitahuica para amo tahuel xijnequica tamanti cati onca, pampa amo aqui quipantis nemilisti cati yancuic pampa quipiya miyac tamanti para iaxca.

<sup>16</sup> Huan Jesús quinilhui se tatenpohualisti: “Ital se tacat cati tominpixqui nelnelía temacac miyac itajca. <sup>17</sup> Huan nopa tacat moilhui: ‘¿Taya nijchihuas?, pampa amo nijpiya más cuacalme para ipan nicajocuis ni pixquisti.’ <sup>18</sup> Huan teipa quiijo: ‘Nijmati taya nijchihuas. Niquinsosolos nopilcua-calhua huan nijchihuas cati más huejhueyí huan ipan nicajocuis nochí ni pixquisti huan nochí cati nijpiya.’ <sup>19</sup> Huan teipa nimoyolilhuis: ‘Nijpiya miyac tomi huan tacualisti cati nechaxilis para miyac xihuit, huajca san nimosiyajquetzas, huan nitacuas huan nitais quej na nijnequis huan nitamahuisos.’ Quej nopa moilhuiyaya nopa tacat cati tominpixqui. <sup>20</sup> Pero Toteco Dios quiilhui: ‘Tacat ta tihuihuitic. Ama ni yohuali monequi timiquis, huan ¿ajquiya quiselis nochí cati timoajocuilijtoc?’ <sup>21</sup> Huihuitique masehualme cati quiajocuij miyac tamanti para iniaxca ipan ni taltipacti, pero mocahuaj teicneltzitzti iixpa Toteco.”

*Toteco quinmocuitahuía iconehua  
(Mt. 6:25-34)*

<sup>22</sup> Huan Jesús quinilhui imomachtijcahuá: “Yeca nimechilhuía, amo ximotequipachoca

ica cati amechmonequilía. Amo ximocuesoca ten taya anquicuase huan anquiise huan ica taya anmoyoyontise. <sup>23</sup> Toteco amechmacatoc nemilisti huan ya nopa más ipati huan amechmacas tacualisti nojquiya. Yaya amechmacatoc amotacayo cati más ipati huan amechmacas nojquiya cati ica anmoyoyontise. <sup>24</sup> Xiquintachilica totome. Amo momiltíaj, huan amo pixcaj huan amo quipiyaj inincuacalhua para ipan quitemase inintacualis, pero Toteco quintamacaca. Huan Toteco nojquiya amechtamacas pampa tahuel más amopati iixpa que totome. <sup>25</sup> San tapic para anmotequipachohuaj. Sinta anmotequipachohuaj pampa amo anhuejcapantique, ¿huelis anmoscaltise seyoc ome mistit san pampa miyac anmotequipachohuaj? Amo huelis. <sup>26</sup> Huan sintia amo anhuelij anquichihuaj se tamanti pilquentzi, ¿para ten anmotequipachohuaj ica sequinoc tamanti?

<sup>27</sup> “Xijtachilica nopa xochit cati moscaltía campa hueli. Amo tequitij huan amo tajtzomaj, pero nimechilhuía, nopa hueyi Tanahuatijquet Salomón ica nochí iricojyo amo quipixqui iyejyejca quej se xochit. <sup>28</sup> Toteco quinmacatoc xochime iniyejyejca masque san yoltoque se talojtzi, huan quema tonilis pilinise huan quintatise. Huan más miyac Toteco amechyoyontis masque pilquentzi anquineltocaj. <sup>29</sup> Huajca amo ximocuesoca ten taya anquicuase huan taya anquiise, <sup>30</sup> pampa quej nopa motequipachohuaj masehualme cati amo

quiixmatij Toteco, pero Toteco amoTata quimati monequi nochí ni tamanti para anmopanoltise.  
**31** Achtohui xijtemoca para ancalaquise ipan itanahuatilis Toteco huan yaya amechmacas nochí ni tamanti cati monequi.

*Cati ipati nepa ilhuicac  
(Mt. 6:19-21)*

**32** “Amo ximomajmatica masque amo anmiyaqui cati antechneltocaj na, pampa ica paquilisti Toteco amechcalaqis campa yaya tanahuatía. **33** Huajca xijnamacaca cati amoaxca huan xiquinmajmacaca teicneltzitzi para anquiajocuise cati ipati nepa ilhuicac. Cati anquiajocuise nepa amo sosolihuis huan amo quicuase mejtolime, yon tachtequini amo huelis quihiuicase. **34** Huan sintia anquimati cati yejyectzi amechchiya ipan ilhuicac, huajca ipan amoyolo anquinequise anitztose nepa.

*Ximocualtajtoca*

**35** “Xiitztoca ximocualtajtoca huan xijpixtoca amotaahuilhua tatatoque para quema nihualas masque niajsis tonaya o tayohua. **36** Xiitztoca quej tetequipanohuani cati quichiyaj ininteco ma tacuepili ten itacualis ten nemictili. Inijuanti amo cochij para huelis quicaltapose nimantzi quema yaya ajsis huan quinnojnotzas. Huan quej nopa nijnequi ximocualtajtoca huan xitachixtoca para quema nihualas. **37** Cuali quipantise nopa tetequipanohuani cati tachixtoque quema tacuepilis ininteco. Nelía nimechilhuía, ininteco moyoyontis quej se tetequipanojquet huan quinsehuis

campa mesa huan quintamacas. <sup>38</sup> Huan masque ininteco tacuepilis tajcoyohual o ya tanestihuala, sintia nopa tetequipanohuani tachixtoque, cuali ininpartis. <sup>39</sup> Anquimatiq sintia se masehuali quimatisquia ipan taya hora ajisquia se tachtejquet, quichixtosquia huan amo quicahuilisquia ma calaqui para tachtequis ipan ichaj. <sup>40</sup> Huajca amojuanti nojquiya ximocualtalijtoca pampa na cati niMocuetqui Masehuali nihualas ipan se hora quema amo antechchiyaj.”

*Nopa tetequipanojquet cati temachti  
(Mt. 24:45-51)*

<sup>41</sup> Huan Pedro quitatzintoquili Jesús:

—Tohueyiteco, ¿techilhuijtoc ni tatenpohualisti para tojuanti timomomachtijcahua ma timitzchiyaca o para nochi ni masehualme nojquiya ma mitzchiyaca?

<sup>42</sup> Huan Tohueyiteco quiilhui: “Nijcamanalhuía cati hueli tayacanca tequipanojquet cati temachti huan talnamiqui cati se caltanahuatijquet quitali para quinmocuitahuis itequipanojcahua huan quintamacas cati itztoque ipan ichaj. <sup>43</sup> Cuali ipantis nopa tequipanojquet sintia quema iteco hualas, quipantis ya quitamichijtoc nochi cati quiilhui. <sup>44</sup> Nimechilhuía iteco quitequitalis ma quimocuitahuis hasta nochi cati iaxca. <sup>45</sup> Pero sintia se tayacanquet quijjtohua: ‘Noteco huejcahuas.’ Huan sintia pehuas quinhuitequis nopa sequinoc tetequipanohuani, huan pehuas neltacuas huan neltais huan ihuintis, <sup>46</sup> huajca iteco nimantzi hualas ipan se tonali quema

nopa tayacanca tetequipanojquet amo quichiya, huan ipan se hora quema amo quimati. Huan chicahuac quitatzacultis itayacanca tequipanojca huan quitahuelcahuas campa quinamiqui para cati amo taneltocaj.

**47** “Huan se tayacanca tetequipanojquet cati quimatqui cati iteco quinequiyaya huan amo mocualtali huan amo quineltoquili, iteco quiuitequis nelchicahuac. **48** Pero seyoc tetequipanojquet cati amo quimatqui cati iteco quinequiyaya, huan quichijqui cati amo cuali, iteco amo más chicahuac quiuitequis. Pampa nochí cati Toteco miyac quintamajmaca, quintajtanía ma quichihuaca miyac cati cuali. Huan sintá Toteco quicahua miyac tequit imaco se itequipanojca, miyac tequit monequi quichihuas.

*Jesús quinxejxelohua masehualme  
(Mt. 10:34-36)*

**49** “Nihualajtoc ipan ni taltipacti para nijlemenaltis se tit. Huan nijnequisquía ya tantosquía notequi. **50** Nijpiya se taijyohuilisti cati monequi niquijyohuis huan nitaijyohuis hasta panos. **51** Amo ximoilhuica nihualajtoc para ma onca tasehuilisti ipan ni taltipacti. ¡Amo neli! Por na, moxexelose masehualme. **52** Para ama huan teipa campa itztoque macuilti masehualme ipan se cali, moxexelose. Eyi mocualanise ica nopa ome, huan nopa ome ica nopa eyi. **53** Moxexelose tetajme ica inintelpocahua huan tename ica iniichpocahua. Yexme moxexelose ica iniyexnahua, huan yexname ica iniyexhua.”

*Tanextili ten ni tonali  
(Mt. 16:1-4; Mr. 8:11-13)*

<sup>54</sup> Huan Jesús nojquiya quinilhui nopa miyaqui masehualme: “Quema anquiiitaj se mixti cati tejcos campa temo tonati, huajca nimantzi anquijjtohuaj: ‘Huetzis at’, huan quej nopa eli. <sup>55</sup> Huan quema anquimachilíaj huala se ajacat ten sur, huajca anquijjtohuaj: ‘Nelía tatotoniyas ama.’ Huan quej nopa eli. <sup>56</sup> Amojuanti san anquipiyaj ome amoxayac. Anquimatij taya quiijtosnequi cati nesi ipan taltipacti huan ilhuicacti, huajca ¿para ten amo anquimachilíaj taya quinequi quiijtos cati pano ipan ni tonali?

*Ximoyoltali ica mocualancaitaca  
(Mt. 5:25-26)*

<sup>57</sup> “Huan, ¿para ten amo anquiiitaj cati xitahuac amoselti huan xijchihuaca? <sup>58</sup> Quema mocualancaitaca mitztelhuisnequi ica se tequitquet huan noja anitztoque ipan ojti para anajsitij, achi cuali xijcamanalhui para anquisencahuase nopa tamanti san amojuanti. Pampa sintia amo, yaya mitzhuicas iixpa tequitquet huan nopa tequitquet mitztemactilis ica policías, huan nopa policías mitztalise ipan tatzacti. <sup>59</sup> Huan sintia quej nopa panos, amo tiquisas hasta titaxtahuas sesen centavo.”

## 13

*Monequi masehualme moyolpatase*

<sup>1</sup> Sequij tacame cati itztoyaj nopona ipan nopa tonali quiilhuijque Jesús para Pilato quinmictijtoya sequij Galilea ehuani quema nopa Galilea

ehuani quinmictiyabaj tapiyalme para tacajcahualisti. Huan yeca inieso momanelo ica inieso nopa tacajcahualisti.

<sup>2</sup> Huan Jesús quinnanquili: “¿Anmoilhuíaj nopa Galilea ehuani quipixtoyaj más tajtacoli que sequinoc Galilea ehuani pampa quej nopa ininpanic? <sup>3</sup> Nimechilhuía, amo. Amo más tajtacoli quipixtoyaj, huan amojuanti nojquiya anpolihuise sintia amo anmoyolpataj. <sup>4</sup> Huan quema nopa huejcapantic cali ipan Siloé huetzqui ipan majtacti huan chicueyi tacame huan inijuanti mijque, huelis anmoilhuíaj inijuanti quipixtoyaj más tajtacoli que nochí sequinoc ipan altepet Jerusalén. <sup>5</sup> Nimechilhuía, amo. Amo más tajtacoli quipixtoyaj que sequinoc, huan nochí amojuanti nojquiya anpolihuise, sintia amo anmoyolpatase.”

### *Se cuahuit cati amo temacac itajca*

<sup>6</sup> Huan Jesús pejqui quinilhuía ni tatenpohualisti nojquiya: “Se tacat quipixtoya se higuera cuahuit cati quitojqui ipan ixocomeca mil huan se tonali quitemoco itajca, pero amo teno quipixqui. <sup>7</sup> Huan quiilhui cati quimocuitahuía ixocomecamil: ‘Ya quipiya eyi xihuit nijhualtemohua higos ipan ni cuahuit, huan yon se amo quipiya, huajca xijtzontequi pampa san tapic ijcatoc.’ <sup>8</sup> Huan cati quimocuitahuiyaya ixocomecamil quinanquili: ‘Noteco, xijcahua para ni xihuit huan nijtzinxahuas huan nijtalilis yamanic tali, <sup>9</sup> huan sintia quipiyyas itajca ipan se xihuit, caultitoc, huan sintia amo, huajca quena, tijtzontequise.’”

*Jesús quichicajqui se sihuat cati cuitapanpon-pontic*

<sup>10</sup> Huan Jesús tamachtiyaya ipan se israelita tiopamit ipan sábado nopa tonali para mosiyajquetzase israelitame, <sup>11</sup> huan hualajqui se sihuat cati quipixtoya se ajacat para majtacti huan chicueyi xihuit cati quicuitapanponponchijtoya huan ayecmo huelqui momelahua. <sup>12</sup> Huan quema Jesús quiitac, quinojnotzqui huan quiilhui:

—Nane, nimitzquixtilía mococolis.

<sup>13</sup> Huan Jesús quitalili imax huan nimantzi nopa sihuat huelqui momelajqui huan pejqui quihueyichihua Toteco. <sup>14</sup> Huan nelía cualanqui nopa tiopan tayacanquet pampa Jesús quichicajtoya ipan sábado, nopa tonali para israelitame ma mosiyajquetzaca. Huajca nopa tayacanquet quinilhui nopa miyaqui masehualme:

—Onca chicuase tonali ipan se samano para ma titequitica, huajca xihualaca ipan seyoc tonali sinta anquinequij para Jesús ma amechchicahua. Ayecmo xihualaca ipan sábado.

<sup>15</sup> Huan Tohueyiteco Jesús quinanquili:

—Tijpiya ome moxayac. Sesen amojuanti anquitojtomaj amohuacax o amoburro quema ilpitoc ipan sábado, huan anquihuicaj ma atiti. <sup>16</sup> Para majtacti huan chicueyi xihuit Amocualtacat quipixtoya ilpitoc ni sihuat cati nojquiya se iteipan ixhui tohuejapan tata Abraham. ¿Amo tiquita cuali nojquiya njtojtomás ten icocolis ipan sábado?

<sup>17</sup> Huan quema Jesús quiilhui ya ni, nochicualancaitacahua mopinajque iniixpa nopa miyaqui masehualme, pero nopa masehualme

nelía paquiyayaj ica nopa huejhueyi tamanti cati quichihuayaya.

*Nopa xinachti ten mostaza  
(Mt. 13:31-32; Mr. 4:30-32)*

<sup>18</sup> Huan Jesús quijito: “¿Quenicatza huelis nimechilhuis ten quenicatza eltoc ipan itanahuatilis Toteco? <sup>19</sup> Eltoc quej se ixinacho mostaza cati se tacat quitoca. Huan nopa xinachti ixhuas huan moscaltis hasta mochihuas se cuahuit campa totome quichihuase inintepasol ipan imacuayo.”

*Tatenpohuilisti ten tasonejcayot  
(Mt. 13:33)*

<sup>20</sup> Nojquiya Jesús quijito: “¿Quenicatza huelis nimechilhuis para momiyaquilise masehualme cati quicahuiliáj Toteco ma tanahuati ipan iniyolo? <sup>21</sup> Inijuanti momiyaquilise quej mosonehua pantzi quema se sihuat quitalía se quentzi tasonejcayot ipan eyi kilos harina, huan teipa nopa tasonejcayot quisonehuas nochí nopa pantzi.”

*Nopa caltemit pitzactzi  
(Mt. 7:13-14, 21-23)*

<sup>22</sup> Jesús noja nejnemiyaya ipan ojti hasta altepet Jerusalén huan quinpanotiyajqui altepeme huan pilaltepetzi huan tamachtijtiyahuiyaya. <sup>23</sup> Huan se quiilhui:

—Tohueyiteco, ¿nelquentzi masehualme quinmaquixtis Toteco Dios ten inintajtacolhua?

Huan Jesús quinanquili:

<sup>24</sup> —Xijchihuaca campeca ancalaquise ipan nopa pitzactzi caltemit cati yahui ilhuicac, pampa miyaqui masehualme quinequise calaquise

nopona huan amo huelise. <sup>25</sup> Pampa ajsis se tonali quema motzacuas caltemit. Huan nielis quej se tetaj cati quitzacua caltemit ipan ichaj ica tayohua huan ayecmo aqui quicahuilis ma calaqui. Huan anmoquetzase calteno, huan antechnotzase na huan antechilhuese: ‘Toteco, techcaltapo’, huan na nimechnanquilis: ‘¡Amo! Amo nimechixmati, yon amo nijmati canque anehuani.’ <sup>26</sup> Huan antechilhuese: ‘Titacuajque huan tiatique mohuaya, huan titamachti ipan toaltepe’, <sup>27</sup> pero na nimechilhuis: ‘Amo nimechixmati, yon amo nijmati canque anehuani. Techtalcahuica amojuanti cati anquichihuaj cati amo cuali.’ <sup>28</sup> Huan anchocase huan antanhuehuechocase ica tatzacuiltyli huan calijtic campa Toteco tanahuatía anquiitase Abraham, Isaac, Jacob huan nochí tajtolpanextiani, huan anmocahuase calteno. <sup>29</sup> Huan masehualme hualase campa quisa tonati huan campa oncalaquei, huan hualase ten norte huan ten sur huan mosehuise campa mesa campa tanahuatía Toteco. <sup>30</sup> Huan sequij cati ama teicneltique, Toteco quinhueytalis ipan nopa tonal, huan sequij cati tayacanaj ama, Toteco quinechcapantalis.

*Jesús quintapoijpolhuijtosquíá Jerusalén ehuani  
(Mt. 23:37-39)*

<sup>31</sup> Huan ipan nopa talojtzi hualajque sequij fariseos huan quiilhuijque Jesús:

—Xiquisa nica huan xiya sintá tijnequi tiitztos, pampa Tanahuatijquet Herodes Ántipas quinequi mitzmictis.

<sup>32</sup> Huan Jesús quinilhui:

—Xiquilhuitij nopa cayochi Herodes para ama huan mosta nijsenhuiquilis niquinquixtis iajacahua Amocualtacat huan niquinchicahuas masehualme, huan huicta njitamiltis notequi. <sup>33</sup> Huajca ama, mosta huan huicta niitztos ipan ojti para niajsis Jerusalén, pampa san ipan altepet Jerusalén quinmictíaj cati itajtolpanextijcahuia Toteco.

<sup>34</sup> “¡Anteicneltique anJerusalén ehuani! Anquinmictíaj itajtolpanextijcahuia Toteco, huan anquintepachohuaj inijuanti cati yaya amechtitanilijtoc. Miyac huelta nijnequiyaya nimechsentilis ica amoconebla para nimechnajnahuas quej se tenanpiyo quinsentilía ipilconebla ieltapatzala, pero amo anquinejque. <sup>35</sup> Xiquita, Toteco Dios ayecko mocahua ipan amotiobla, huan nimechyo melahua amo antechitase sempa hasta ajsis tonali quemba antechilhuise: ‘Ma Toteco Dios mitz-tiochihua ta cati tihuala ipan itoca\*.’”

## 14

### *Jesús quichicajqui se tacat cati tejtemiyaya*

<sup>1</sup> Huan se sábado quemba israelitame mosiyaj-quetzaj, Jesús yajqui tacuato ichaj se tayacanca fariseo, huan sequinoc fariseos quitachiliyayaj talojtzitz. <sup>2</sup> Huan itztoya nepa iixpa Jesús se tacat cati tejtemiyaya. <sup>3</sup> Huan Jesús quintatzintoquili nopa tamachtiani ten itanahuatil Moisés huan nopa fariseos:

—¿Itanahuatilhua Moisés techcahuilíaj ma tiquinchicahuaca masehualme ipan nopa

---

\* <sup>13:35</sup> 13:35 Ica itequiticayo.

tonali para ma timosiyajquetzaca o ma amo tiquinchicahuaca?

<sup>4</sup> Huan inijuanti amo molinijque. Huan Jesús quimaitzqui nopa tacat huan quichicajqui, huan quiilhui ma yahui. <sup>5</sup> Huan teipa Jesús quinilhui:

—Sinta amoburro o amotoro cati quimati tapoxonía huetzisquía ipan se pozo, ¿amo anquiquixtisquíaj nimantzi masque ipan sábado?

<sup>6</sup> Huan inijuanti amo teno quinanquilijque.

### *Tanotzalme ipan se nemamictili*

<sup>7</sup> Huan Jesús quiitac nopa masehualme quitapejpeniyayaj nopa siyas cati más quipixqui tatepanitacayot campa mesas, huajca pejqui quinpohuilía se tatenpohualisti ten se tacat cati quinnotztoya masehualme ipan se tacualisti. Quinilhui:

<sup>8</sup> —Quema se amechnotzas ipan se tacualisti ten nemamictili, amo xijtemoca nopa siyaj campa quipiya más tatepanitacayot pampa huelis teipa ajsis seyoc tanotzali cati achi más mon-equi quitepanitase que ta. <sup>9</sup> Huan huelis mon-equis para yaya cati amechnotztoh hualas campa ta huan mitzilhuis: ‘Xijmaca mosiyaj ni tacat cati ajsico.’ Huan nelía tipinahuas huan mon-equis tijtemoti ten hueli siyaj para ipan timosehuis. <sup>10</sup> Quema se amechnotza xiyaca ipan se tacualisti, achi cuali ximosehuica campa amo más cuali huan teipa huelis hualas yaya cati mitznotzqui huan mitzilhuis: ‘Nohuampo, ximosehuiqui ipan nopa siya cati achi cuali.’ Huan quej nopa mitzhueyitalis iniixpa nochí cati mosehuíaj campa mesa. <sup>11</sup> Pampa masehualme cati

mohueyimatij ica iniselti ama, teipa Toteco quinpinahualtis. Huan cati moechcapantálaj ama, Toteco teipa quinhueyitalis.

<sup>12</sup> Huan nojquiya Jesús quiilhui nopa tacat cati quinnotztoya para ma tacuaca ichaj:

—Quema titemaca se tacualisti, amo xiquinnotza mohuampoyohua, o moicnihua, o mohuicalhua, o mocalnechcahua cati más quipiyaj tomi, pampa inijuanti teipa mitznotzase ipan se tacualisti para mitzcuepilise. <sup>13</sup> Pero quema tipiya se tacualisti, xiquinnotza cati teicneltzitzi huan cati metzcototique huan cati metzhuilpachlique huan cati popoyotzitzi, <sup>14</sup> pampa inijuanti amo hueli mitzcuepilise. Huan Toteco mitzti-ochihuas huan mitztaxtahuis quema moyolcuise nochi masehualme cati itztoque xitahuaque iixpa.

*Nopa hueyi tacualisti  
(Mt. 22:1-10)*

<sup>15</sup> Huan se tacat cati mosehuiyaya campa mesa ihuaya Jesús quicajqui cati quijito huan quiilhui:

—Cuali ipantis cati mosehuis huan tacuas nepa campa Toteco Dios tanahuatía.

<sup>16</sup> Huan Jesús quiilhui:

—Se tacat temacayaya se hueyi tacualisti huan quinnotzqui miyac ma tacuatij. <sup>17</sup> Huan quema ya cualtitoya nochi tacualisti, quititanqui itequipanojca ma yahui ma quinlhuiti nopa tanotzalme: ‘Xihualaca pampa nochi eltojca.’

<sup>18</sup> Huan nochi nopa tanotzalme pejque motechtíaj. Nopa cati achtohui quiilhui nopa tetequipanojquet: ‘Nijcojqui se tali, huan monequi niyas niquitati. Techtapojpolhui, pero

amo huelis niyas.’ <sup>19</sup> Huan seyoc quiilhui: ‘Niquincojtoc macuili pares torojme para tapoxonise, huan monequi niyas niquinyejyecoti sinta tequitij cuali. Techta pojpolhui, pero amo huelis niyas campa nopa tacualisti.’ <sup>20</sup> Huan seyoc quiilhui: ‘Nel amanoc nimosihuajti huan yeca amo huelis niyas.’

<sup>21</sup> “Huan nopa tetequipanojquet tacuepili huan quiyolmelajqui iteco nochí cati quijtojtoyaj. Huan nopa tetaj cualanqui pampa amo aqui hualajqui. Huajca quiilhui itequipanojca: ‘Nimantzi xiya tianquis huan xiya ipan nochí callejtipa ipan toaltepe, huan xiquinhualica nochí cati teicneltzitzti, huan cati metzcototique, huan cati metzhuilpachtique huan cati popoyotzitzi para ma hualaca ipan totacualis.’ <sup>22</sup> Huan nopa tetequipanojquet yajqui huan teipa tacuepili, huan quiilhui: ‘Noteco, ya nijchijqui cati techilhui huan miyac niquinhualicac, pero noja mocahua siyas.’ <sup>23</sup> Huan nopa tacat quiilhui itequipanojca: ‘Xiya ipan nopa icxiojti huan ipan mila huan xiquinfuerzajhuiti masehualme ma hualaca para ma temi nochaj. <sup>24</sup> Huan nimitzilhuía, yon se inijuanti cati achtohui niquinnotzqui amo quiyecos notacualis.’ ”

*Taijyohuise cati quitoquilise Cristo  
(Mt. 10:37-39)*

<sup>25</sup> Huan tahuel miyaqui masehualme nejne-miyayaj ihuaya Jesús ipan ojti, huan yaya moican-cuetqui huan quinilhui: <sup>26</sup> “Sinta se quinequi nechtoquilis, monequi nechicnelis tahuel miyac huan amo quej quiicnelía itata, huan inana, huan

isihua, huan iconehua, huan iicnihua. Quena, monequi tahuel nechicnelis más miyac quej ya moicnelía, pampa sinta amo quej nopa nechicnelía, amo huelis elis nomomachtijca. <sup>27</sup> Se nomomachtijca monequi elis quej se masehuali cati quihuicatiya icuamapel para ipan miquis. Sinta amo quej nopa nechtoquilía mocualtalijtoc para miquis pampa nechneltoca na, amo huelis elis nomomachtijca.

<sup>28</sup> “Sinta se ten amojuanti quinequi quichihuas se hueyi cali, huajca achtohui monequi mosehuis huan quipohuas quesqui tomi monequis para quimatis sinta quiaxilía para quitamiltis. <sup>29</sup> Pampa sinta amo moilhuía quesqui ipati achtohui, huelis san quitzinpehualtis nopa cali huan tamis itomi. Huan nochí quiitase para amo huelqui quitamiltis, huan quihihuiitase. <sup>30</sup> Quiijtose: ‘Ne tacat pejqui quichihua se cali, pero amo huelqui quitamilti.’

<sup>31</sup> “Huan sinta itztoc se tanahuatijquet cati quinequi motehuis ihuaya seyoc, ¿amo mosehuis huan moilhuis achtohui sinta nopa majtacti mil soldados cati quinpiya huelis quitanise nopa seyoc tanahuatijquet cati quinpixtoc veinte mil soldados? <sup>32</sup> Huan sinta quiitas para amo huelis quintanise, quema quihuejcaitas nopa tanahuatijquet huala ica isoldados, nimantzi quintitanis tacame ma quicamanalhuitij, huan san sejco quisencahuase quenicatza huelis moyoltalise. <sup>33</sup> Huajca ximoilhuica, monequi xijcahuaca nochí cati anquipiyaj para amochihuase annomomachtijcahua.

*Istat amo ipati sinta amo poyec  
(Mt. 5:13; Mr. 9:50)*

<sup>34</sup> “Istat nelía cuali, pero sinta ayecmo poyec, ¿quenicatza huelis tapoyeltisoc sempa? <sup>35</sup> Sinta ayecmo poyec amo hueli tijtequihiuse para tacualisti. Yon amo hueli tijtequihiuse ipan tali, o ipan yamanic tali para tatocsti. San monequi tijtepehuase. Nochi amojuanti anquipiyaj amonacas, huajca xijtacaquilica cati nimechilhuía.”

## 15

*Nopa borrego cati mocuapolo  
(Mt. 18:10-14)*

<sup>1</sup> Huan monechcahuiyaj campa Jesús para quitacaquilise nochí nopa tacame cati tainanque impuesto huan cati miyac tajtacoli quichijtoyaj. <sup>2</sup> Huajca fariseos huan tamachtiani ten itanahuatil Moisés pejque quitelhuiáj huan quiijtoque:

—Ni tacat Jesús quinselía tacame cati tahuel tajtacolchihuaj, huan hasta yaya tacua inihuaya.

<sup>3</sup> Huajca Jesús quinpohuili ni tatenpohualisti:

<sup>4</sup> “Sinta se ten amojuanti quinpiyasquía cien borreojme huan se polihuisquía, ¿amo quincahuasquía nopa noventa y nueve campa potrero huan contemosquía nopa cati polijtoc hasta quipantis? <sup>5</sup> Huan quema quipantis, quiajcolpantalis ica paquili para quihiucas ichaj. <sup>6</sup> Huan quema ajsiti ichaj, quinnotzas ihuampoyohua huan icalnechcahua, huan quinilhuis: ‘Xipaquica nohuaya pampa ya nijpanti nopolborrego cati mocuapolojtoya.’ <sup>7</sup> Nimechilhuía, san se eltoc nepa ilhuicac. Nepa

onca más paquilisti ica se tajtacolchijquet cati moyolpata huan quicahua itajtacolhua, que ica noventa y nueve cati moilhuíaj ya itztoque xitahuaque iixpa Toteco, huan amo monequi moyolpatase.

*Nopa tomi cati poli*

<sup>8</sup> “Huan sinta se sihuat quipiyasquía majtacti plata tomi huan quipolosquía se, ¿amo quitatisquía se taahuili huan tachpanasquía cuali calijtic, huan quitemosquía cuali hasta quipantis? <sup>9</sup> Huan quema quipantis, huajca quinnotzas ihuampoyohua huan icalnechcahua huan quinilhuis: ‘Xipaquica nohuaya pampa ya nijpanti nopa tomi cati nijpolojojtoya.’ <sup>10</sup> Huan nimechilhuía, quej nopa paquij ilhuicac ehuaní quema se tajtacolchijquet moyolpata huan quicajtehua itajtacolhua.”

*Nopa telpocat cati monejnenaquixti*

<sup>11</sup> Huan Jesús quinilhui: “Se tacat quinpixtoya ome itelpocahua, <sup>12</sup> huan yaya cati teipan ejquet quilhui itata: ‘Notata, techmaca ama nochí cati elis noaxca quema timquis.’ Huajca nopa tetaj quitajcoxelo cati quipixtoya, huan quimacac cati iaxcatisquía. <sup>13</sup> Huan amo huejcajqui nopa telpocat teipan ejquet quisentili nochí cati iaxca, huan quistejqui para yas huejca ipan seyoc tali. Huan nepa san quinempolo nochí itomi ica tamanti cati fiero. <sup>14</sup> Huan quema ya quita-miltijtoya nochí itomi, ajsico se hueyi mayanti ipan nopa tali, huan nopa telpocat amo quipixqui tomi para itacualis. <sup>15</sup> Huan quitemoto tequit ica se cati nepa ehua, huan yaya quititanqui ma quintamacati ipitzohua. <sup>16</sup> Huan nopa telpocat

nelía mayanayaya, hasta quinequiyaya quicuas  
 nopa epetat cati quicuayayaj pitzome, pampa  
 amo aqui quimacayaya cati quicuas. <sup>17</sup> Pero  
 quema pejqui moyolihuía, quielnamijqui queni-  
 catza eltoya nepa ichaj, huan moilhui: ‘Nochi  
 itequipanojcahua notata quipiyaj hasta mocahua  
 cati quicuase, huan na nica nimayancamictinemi.  
<sup>18</sup> Niquisas nica huan niyas campa notata huan  
 niquilhuis: Notata, na nitajtacolchijtoc iixpa  
 Toteco Dios huan moixpa. <sup>19</sup> Ayecmo quinamiqui  
 para techitas quej nimocone. San techcahuili ma  
 nimitztequipano. Quej nopa moilhui para quiil-  
 huis itata.’ <sup>20</sup> Huan yaya quistejqui huan yajqui  
 ichaj itata.

“Pero quema ayemo onajsiyaya ichaj, itata qui-  
 huejcaitac huan quitasojtac. Huan itata mo-  
 talojtejqui huan quicuanajnahuajqui huan quit-  
 zoponi. <sup>21</sup> Huan nopa telpocat quiilhui: ‘No-  
 tata, nitajtacolchijtoc iixpa Toteco Dios huan  
 moixpa, huan ayecmo quinamiqui para techitas  
 quej nimocone.’ <sup>22</sup> Pero itata quinnotzqui ite-  
 quipanojcahua, huan quinilhui: ‘Nimantzi, xi-  
 jhualicaca nopa yoyomit cati achi cuali para mo-  
 quentis notelpoca, huan xijhualicaca se anillo  
 para imax huan xijhualicaca tecacti para ma mo-  
 talili. <sup>23</sup> Huan xijhualicaca nopa pilhuacaxtzi cati  
 achi más tomahuac, huan xijmictica. Ma tijcuase  
 huan ma tiilhuichihuase, <sup>24</sup> pampa ni nocone el-  
 toya quej mictoya, huan ama quej moyolcuitoc.  
 Polijtoya huan ama ya tijpantijque.’ Huajca ini-  
 juanti pejque ilhuichihuaj.

<sup>25</sup> “Huan icone cati achtohui ejquet tequitiyaya

mila, huan quema monechcahuico ichaj, quicajqui tatzotzonali huan masehualme cati mijtotiyaya. <sup>26</sup> Huan quinotzqui se tequipanojquet huan quitatzintoquili taya oncayaya ipan ichaj. <sup>27</sup> Huan itequipanojca quiilhui: ‘Moicni tacuepili huan motata quimicti nopa pilhuacaxtzi cati achi más tomahuac pampa ya tacuepili ica cuali, huan amo teno más fiero ipantic.’ <sup>28</sup> Huan nopa achtohui ejquet nelía cualanqui, huan amo quinequiyaya calaquis ichaj. Huan itata hualajqui huan quiilhui ica cuali ma calaqui. <sup>29</sup> Pero nopa achtohui ejquet quiilhui itata: ‘Xiquita, nimitztequipanojtoc para miyac xihuit, huan nochipa nijchijtoc cati technahuatijtoc, pero amo quema techmacatoc se chivo para ma niilhuichihua ica nohuampoyohua. <sup>30</sup> Pero quema tacuepili ne motelpoca cati quinempolo nochí motomí ica ahuilnenca sihuame, ta tijselía ica cuali, huan tijmictijtoc nopa pilhuacaxtzi cati achi tomahuac para ma quicua.’

<sup>31</sup> “Huan itata quiilhui: ‘Nocone, nochí tonali tiitztoc nohuaya huan nochí cati nijpiya moaxca. <sup>32</sup> Pero monequi tiilhuichihuase huan tijpiyase paquilsti, pampa eltoya quej ya mictoya moicni, huan ama eltoc quej moyolcuitoc sempa, huan polijtoya huan ama ya tijpantijque.’ ”

## 16

*Nopa tayacanquet ipan ichaj iteco*

<sup>1</sup> Huan Jesús nojquiya quincamanalhui imo-machtijcahua huan quinilhui: “Itztoya se tomin-pixquet cati quipixtoya se itayacanca tequipano-jca ipan ichaj cati quimocuitahui nochi cati iaxca. Huan sequinoc quiyolmelajque para itayacanca tequipanojca san quinempolohuayaya nochi cati quipixqui. <sup>2</sup> Huajca nopa rico quinotzqui itay-acanca tequipanojca huan quiilhui: ‘¿Taya ya ni cati ica mitztelhuíaj masehualme? Techsencahuili se amat ica nochi cuentas huan ica nochi cati tijchijtoc, pampa ayecmo huelis techtequipanos ipan nochaj.’

<sup>3</sup> “Huajca nopa tayacanca tequipanojquet moil-hui: ‘¿Taya nijchihuas para ica nipanos? Noteco ayecmo nechcahuilis ma nijtequipano. Amo nijpiya tetili para nitequitis chicahuac, huan nipayahua para nimotaejehuis. <sup>4</sup> Ya nijmati taya nijchihuas. Nijsencahuas para masehualme ma nechselica quej niinihuampo quema ayecmo huelis nijtequipanos noteco.’

<sup>5</sup> “Huan nopa tayacanquet quinnotzqui sesen nopa tacame cati quitahuiquiliyaj iteco, huan pejqui ica yaya cati achtohui, huan quiilhui: ‘¿Quesqui tijtahuiquilía noteco?’ <sup>6</sup> Huan quijito: ‘Nitahuica cien tambores ten aceite.’ Huan nopa tayacanquet quiilhui: ‘Xijhuica nopa mocuenta ama huan nimantzi xijsencahua seyoc mocuenta cati quiijtos san tijtahuiquilía cincuenta tambores.’ <sup>7</sup> Huan nopa tayacanquet quiilhui seyoc: ‘¿Quesqui tijtahuiquilía noteco?’ Huan quijito: ‘Nijtahuiquilía cien tatamachihuali ten trigo.’ Huan nopa tayacanquet quiilhui: ‘Xijhuica nopa mocuenta huan techmaca seyoc

amat campa tiquijcuilo san tijtahuiquilía ochenta tatamachihuali.’ <sup>8</sup> Teipa iteco quimatqui taya quichijtoya huan quiijto para itayacanca tequipanojca nelía monexti talnamiqui para tacajcayahuas para huelis mohuicas cuali ica sequinoc. Huan ama nojquiya sequinoc masehualme monextíaj más talnamiquij ica cati quinchihuilíaj sequinoc que anmasehualme cati anquipiyaj taahuli.

<sup>9</sup> “Huan nimechilhuía achi cuali xijtequihuica amotomi nica ipan ni taltipacti para xiquinpale-huica cati teicneltzitzi huan para anmohuicase ica cati cuajcualme. Huan teipa quema tamis amotomi, amechselise campa masehualme itztose para nochipa.

<sup>10</sup> “Se masehuali cati elis temachti ica pilquentzi cati seyoc quicahua imaco, nojquiya elis temachti quema quicahuas miyac imaco. Huan sinta se quiichtequis quema quicahuilíaj pilquentzi imaco, nojquiya quiichtequis quema quicahuilise miyac imaco. <sup>11</sup> Huan sinta amo antemachme para cuali anquitequihuise nopa tomi cati anquipiyaj ipan ni taltipacti, Toteco amo amechcahuilis amomaco tamanti cati nelía ipati. <sup>12</sup> Huan sinta amo antemachme quema anquitequihuíaj tomi cati iaxca seyoc, ¿ajquiya amechmacas cati elis amoaxca amojuanti?

<sup>13</sup> “Amo aqui huelis quintequipanos ome itecohua pampa quicualancaitas se huan quiicnelis ne se. Huan se quitoquilis, pero ne se quitahuelahuas. San se, amo huelis anquitequipanose Toteco Dios huan tomi.”

**14** Huan quicaquiyayaj icamanal nopa fariseos cati tahuel quinejque moricojchihuase, huan ini-juanti pejque quihuihuiitaj. **15** Huan Jesús quinil-hui: “Iniixpa masehualme anfariseos anmochi-huaj quej ancuajcualme, pero Toteco quimati para fiero amoyolo. Tamanti cati masehualme quitepanitaj, Toteco amo quinequi quiitas.

*Quisas melahuac cati nopa tanahuatilme quij-tohuaj*

**16** “Quipixque tequiticayot itanahuatil Moisés huan intajcuilol itajtolpanextijahua Toteco hasta ajsico Juan cati tecuaaltiyaya. Pero Juan pejqui tepohuilía ten itanahuatilis Toteco huan hasta ama noja ya nopa titepohuilíaj. Huan eltoc quej nochí masehualme mocuatetzopaj pampa tahuel quinequij calaquise ipan itanahuatilis.

**17** “Pero ya nopa amo quinequi quijtos para itanahuatil Moisés ayecmo quipiyaj inintequi. Noja quisas melahuac sesen piltamantzitz cati quijtohuac itanahuatil, masque panotehuas il-huicac huan taltipacti.

*Se tacat ma amo quicahua isihua  
(Mt. 19:1-12; Mr. 10:1-12)*

**18** “Sinta se tacat quicahuas isihua huan mosejcotilis ica seyoc, huajca nopa tacat momecatía. Huan sinta se tacat mosejcotilis ica se sihuat cati quicajtejtoc ihuehue, huajca nopa tacat nojquiya momecatía.

*Se tominpixquet huan Lázaro*

**19** “Itztoya se tominpixquet cati mojmosta moquentiyaya iyoyo morado cati nelía patiyo, huan mojmosta quipiyayaya se hueyi tacualisti

ica nochí catí ajhuiyac quinequiyaya. <sup>20</sup> Huan nojquiya itztoya se motaejehuijquet teicneltzi catí itoca Lázaro catí mojmosta mosehuiyaya icalteno nopa tominpixquet. Huan Lázaro quinpixtoya miyac cocome ipan itacayo. <sup>21</sup> Huan hualayayaj chichime huan quipipitzohuayayaj icocohua. Huan tahuel mayanayaya huan quinequiyaya quicuas nopa pantatapatzti catí huetziyaya imesamatita nopa tominpixquet. <sup>22</sup> Huan quema ajsic tonali, Lázaro catí teicneltzi mijqui huan hualajque ilhuicac ehuani huan quihuicaque campa tayejyectzi campa Abraham itztoc. Huan nojquiya mijqui nopa tominpixquet huan masehualme quitalpachojque. <sup>23</sup> Huan teipa ipan tit nepa micta, tahuel taijyohuiyaya nopa tominpixquet, huan ica huejca quitachili Abraham ihuaya Lázaro. <sup>24</sup> Huajca camanaltic chicahuac nopa tominpixquet huan quiilhui: ‘Notata Abraham, techtasojta, huan xijtitani Lázaro ma quixoloni imacpilyacapa, huan ma quiseseliqui nonenepil pampa nelnelía nitaijyohuía miyac ipan ni tit.’ <sup>25</sup> Pero Abraham quiilhui: ‘Nocone, xiquelnamiqui quema tiitztoya ipan taltipacti huan tijpixtoya miyac tamanti catí cuali, huan Lázaro quipanoc miyac taohuijcayot. Ama yaya quipiya paquilisti, huan ta titaijyohuía. <sup>26</sup> Nojquiya onca se hueyi talostot tatajco tojuanti huan sintá se catí nica quinequisquía yas campa tiitztoc, amo huelis. Huan amo aquí catí itztoc nopona huelis hualas nica campa tojuanti tiitztoque.’

<sup>27</sup> “Huan nopa tominpixquet nepa micta

quiilhui: ‘Huajca, tinotata, nimitztajtanía ica nochí noyolo, xijtitani Lázaro nepa ichaj notata. <sup>28</sup> Pampa niquinpiya macuilty noicnihua. Ma quinlhuiti quenicatza eltoc nica para ma amo hualaca campa masehualme taijyohuíaj miyac.’ <sup>29</sup> Pero Abraham quiilhui: ‘Moicnihua quipiyaj nopa amatapohuali ten Icamanal Toteco cati Moisés huan itajtolpanextijcahua quiijcuilojque. Ma quitacaquilica cati quiijtohua.’ <sup>30</sup> Pero nopa tominpixquet quiilhui: ‘¡Amo! Notata Abraham, amo quichihuiláj cuenta. Pero sintá se cati mictoya moyolcuis huan quincamanalhuis, huajca moyolpatase huan quicahuase intintajtacolhua.’ <sup>31</sup> Pero Abraham quiilhui: ‘Sinta inijuanti amo quitacaquiláj cati Moisés huan itajtolpanextijcahua quiijcuilojque, nojquiya amo quichihuise cuenta icamanal se cati ya mictoc huan moyolcuis.’ ”

## 17

### *Masehualme ma amo tajtacolchihuaca (Mt. 18:6-7, 21-22; Mr. 9:42)*

<sup>1</sup> Huan Jesús quinlhui imomachtijcahua: “Nochipa oncas tamanti cati teyoltlanas ma tajtacolchihuaca. Pero se hueyi tatzacuilty quichiyas nopa masehuali cati quiyoltilanas seyoc. <sup>2</sup> Más cuali quema ayemo quichihua nopa miyac tajtacoli, ma moquechilpi imet huan ma misahuiti ipan hueyi at para amo quichihuaultis ma tajtacolchihuaca se cati noaxca huan ayemo quipiya tetili. <sup>3</sup> Xijtachilica taya anquichihuaj.

“Sinta moicni mitzixpanos, huajca xiquilhui cati quichijtoc. Huan sinta yaya moyolpatas, huajca xijtapojpolhui. <sup>4</sup> Huan sinta yaya mitzixpanos chicompa ipan se tonal huan sese huelta sempa hualas huan quiijtos: ‘Techtapojpolhui cati amo cuali nimitzchihuilijtoc’, huajca sese huelta xijtapojpolhui.”

*Monequi más tijneletocase Toteco*

<sup>5</sup> Huan itayolmelajcahua Tohueyiteco Jesús quihilhuijque:

—Techpalehui ma moscalti totaneltoquilis.

<sup>6</sup> Huan Tohueyiteco quinilhui:

—Sinta tijpiya taneltoquilisti cati moscaltía quej se ipilxinacho mostaza, huelis tiquilhuis ni hueyi cuahuit: ‘Ximoquixti huan ximotoca ipan hueyi at’, huan ni cuahuit amechneltoquilis.

*Quinamiqui ma tijtequipanoca Toteco*

<sup>7</sup> “Sinta itequipanojca se tacat tamehua ipan imil o quinmocuitahuía iborregojhua, huan teipa quitamiltis itequi huan tacuepilis ichaj, iteco amo quiilhuía: ‘Xihuala huan ximosehui para titacuas.’ <sup>8</sup> ¡Amo! Quema yaya hualas, iteco quiilhuis: ‘Xijsencahua cati njcuas huan techtequili huan teipa ta titacuas.’ <sup>9</sup> Huan teipa iteco amo monequi quitascamatis pampa quichijqui cati quinahuati, pampa ya nopa itequi para quichihuas mojmosta. <sup>10</sup> Huan quej nopa eltoc ica amojuanti, pampa anitequipanojcahua Toteco, huan quema anquichihuaj nochí cati amechnahuatiá, xiquilhuica: ‘Toteco, amo quinamiqui techtascamatis pampa tojuanti timoaxcahua huan san tijchijtoque cati quinamiqui tijchihuase.’ ”

*Jesús quinchicajqui majtacti tacame*

<sup>11</sup> Huan Jesús noja nejnemiyaya ipan ojti para altepet Jerusalén huan panotinenqui inepantipa estado Galilea huan estado Samaria. <sup>12</sup> Huan calajqui ipan se pilaltepetzi huan hualajque quinamiquicoj majtacti tacame cati tacayo palaniyayaj. Injuanti mohuejcaquetzque quej monequiyaya ica inincocolis, <sup>13</sup> huan quitzajtzilijque:

—Jesús, titamachtijquet, techtasojta huan techchicahua.

<sup>14</sup> Huan quema Jesús quinitac, quinilhui:

—Xiyaca ximonextitij iixpa nopa totajtzi para ma quimati anmochicajtoque.

Huan quema yahuiyayaj ipan ojti, nochimochicajque ten inincocolis masque eltoya nelfiero. <sup>15</sup> Huan se ten nopa tacame quiitac para Jesús ya quichicajtoya, huajca tacuepili, chicahuac quihueyichijtihualayaya Toteco Dios. <sup>16</sup> Huan motancuaquetzqui iicxita Jesús huan quitascamatqui. Huan nopa tacat eliyaya se Samaria ejquet. <sup>17</sup> Huan Jesús quiijto:

—¿Amo niquinchicajqui majtacti masehualme?  
¿Canque itztoque nopa seyoc chicnahui?  
<sup>18</sup> ¿Amo aquí más quinequiyaya tacuepilis para quihueyichihuas Toteco, san ni seyoc tali ejquet?

<sup>19</sup> Huan Jesús quiilhui nopa tacat:  
—Ximoquetza huan xiya mochaj. Timochicajqui pampa techneltocac.

*Quema Toteco tanahuatis  
(Mt. 24:23-28, 36-41)*

**20** Huan sequij fariseos quitatzintoquilijque Jesús quema hualas Toteco para tanahuatis ipan ni taltipacti. Huan Jesús quinnanquili huan quinilhui:

—Quema Toteco tanahuatis, amo oncas tanextili cati huelis anquiiitase. **21** Huan amo aqui quiijtos: ‘Xiquitaca, nica Toteco tanahuatía’, o ‘Nepa Toteco tanahuatía’; pampa Toteco tanahuatía ipan iniyolo masehualme.

**22** Huan Jesús quinilhui imomachtijcahua:

—Ajsis se tonali quema anquinequise antechitase na cati niMocuetqui Masehuali huan anquinequise sempa anitztose nohuaya, pero amo huelis antechitase. **23** Huan masehualme amechihuise: ‘Xijtachilitij nepa itztoc’, o ‘Xijtachiliquij nica itztoc’, pero amo cana xiyyaca techtemotij. **24** Quej nochí hueli quiitaj quema tapetani ipan ilhuicacti huan taahuía campa hueli, quej nopa nojquia nochí nechitase na cati niMocuetqui Masehuali ipan nopa tonali quema sempa nihualas ipan taltipacti. **25** Pero achtohui monequi para tahuel nitaijyohuis, huan para masehualme cati ama itztoque nechhuejcamajcahuase.

**26** “Quema nitacuepilis ipan taltipacti elis quej eltoya quema Noé itztoya. **27** Ipan nopa tonali, masehualme tacuayayaj, taiyayaj, mosihuajtiyayaj huan quisencahuayayaj para iniichpocahua ma monamictica. Quichihuayayaj nochí cati ipa momajtoyaj quichihuaj hasta nopa tonali quema Noé calajqui ipan cuaacali. Huan nopa tonal pejqui tahuel huetzi at huan tatemic campa hueli hasta quintamimicti nochí masehualme.

<sup>28</sup> “Huan san se panoyaya quema Lot itztoya ipan taltipacti. Masehualme tacuayayaj, taiyayaj, tacohuayayaj, tanamacayayaj, tatojtocayayaj huan quichihuayayaj ininchajchaj. <sup>29</sup> Pero ipan nopa tonali quema Lot quisqui altepet Sodoma, huetzqui tit ihuaya azufre huan quintamitati nochi nopa masehualme cati itztoyaj nopona. <sup>30</sup> Huan san se elis nojquiya ipan nopa tonali quema na cati niMocuetqui Masehuali nimonextis, amo oncas tanextili para amechilhuis sinta se tenijqui panos.

<sup>31</sup> “Ipan nopa tonali sinta se itztos icalcuitapa, ma cholo nimantzi. Ma amo temo huan calaquis calijtic para quihuicas cati iaxca. Huan cati itztose campa inimila ma amo tacuepilise ininchajchaj. <sup>32</sup> Xiquelnamiquica cati quipanoc isihua Lot. <sup>33</sup> Nojquiya nimechilhuía sinta se momanahuisnequi para amo miquis por na, quipolos ialma. Huan cati amo majmahuis para miquis por na, quimaquixtis ialma.

<sup>34</sup> “Huan nimechilhuía, quema ajsis nopa tayohua, ome itztose ipan se tapechti, huan notequipanojca quihiucas se huan nopa seyoc quicajtehuas nopona. <sup>35</sup> Huan ome sihuame tistose san sejco, huan quihiucas se huan nopa seyoc quicajtehuas. <sup>36</sup> Huan ome tacame tequititinemise ipan mili, huan nojquiya quihiucas se huan nopa seyoc quicajtehuas.”

<sup>37</sup> Huan inijuanti quitatzintoquilijque:

—Tohueyiteco, ¿canque panos ya ni?

Huan Jesús quinnanquili:

—Quej nochí quiitaj quema mosentilíaj tzojpi-lome campa huetzto se mijcatzi, nochí quiitase ya ni.

## 18

### *Se cahual toahui huan se tequitquet*

<sup>1</sup> Huan Jesú斯 quinilhui imomachtijcahua se tatenpohualisti para quinnextilis cuali ma quisenhuiquilica motatajtíaj ica Toteco hasta yaya quinmacas cati quitajtaníaj. <sup>2</sup> Huan quinilhui: “Ipan se altepet itztoya se tequitquet cati amo quitepanitayaya Toteco huan amo quinchihuiliyaya cuenta masehualme. <sup>3</sup> Nojquiya itztoya se toahui cati icnotzi ipan nopa altepet cati taloitzitzí quitajtaniyaya ma quitajtolsencahua ica cati fiero icualancaitacahua quichihuiliytoyaj. <sup>4</sup> Huan miyac huelta quitajtani nopa tequitquet huan amo quinequiyaya quipalehuis, pero teipa nopa tequitquet moilhui: ‘Masque amo nijtepanita Dios huan amo niquinchihuila cuenta masehualme, <sup>5</sup> pampa ni toahui cati icnotzi tahuel nechcuatotonía, monequi nijchihuas cati xitahuac. Monequi nijtajtolsencahuas quej quinamiqui pampa taloitzitzí huala nechtajtanía, huan ya nechylaxiti.’”

<sup>6</sup> Huan Tohueyiteco quinilhui: “Xijmachilica quenicatza nopa amo cual tequitquet moilhui quema quijito quipalehuis nopa toahui cati icnotzi. <sup>7</sup> Noja más nimantzi Toteco quintajtolsencahuas cuali imasehualhua cati quintapejpenijtoc sintia inijuanti motatajtíaj ica ya tayohua huan tonaya. Yaya amo quijitos para mosta quichihuas.

<sup>8</sup> Nimechilhuía, nimantzi quinpalehuis. Pero quema na cati niMocuetqui Masehuali sempa nihualas, ¿quesqui masehualme noja nechnelto-catose huan motatajtijtose ipan ni taltipacti?”

*Ome tacame motatajtitoj*

<sup>9</sup> Huan Jesús quinilhui ni tatenpohualisti para masehualme cati mohueyimatiyayaj. Moilhuiyayaj ya itztoyaj xitahuaque iixpa Toteco, huan yeca quincualancaitayayaj sequinoc pampa quinitayayaj para amo cuajcualme. Huan Jesús quijito: <sup>10</sup> “Ome tacame yajque ipan hueyi tiopamit para motatajtiti jica Toteco. Se eliyaya se fariseo huan seyoc se tacat cati tainanqui impuesto huan momatqui tacajcayahua. <sup>11</sup> Huan nopa fariseo moquetzqui huan motatajti huan quijito: ‘Toteco Dios, nimitztascamati pampa amo niitztoc quej sequinoc. Inijuanti tachtequij, momecatíaj huan quichihuaj cati amo cuali. Nojquiya nipaqui pampa amo niitztoc quej ni tacat cati nonechca itztoc cati tainama impuesto huan tacajcayahua. <sup>12</sup> Na nimosahua ompa ipan se samano huan nimitzmaca majtacti por ciento ten nochí cati njipiya.’ <sup>13</sup> Pero nopa tacat cati tainanqui impuesto moquetzqui jica huejca huan mohuijzonqui pampa pinahuayaya quitananas itzonteco para quitachilis ilhuicac. Huan yaya moyolixtejtazonayaya jica tequipacholi huan quijito: ‘Toteco techtasojta pampa miyac njihuica tajtacoli moixpa.’ <sup>14</sup> Na nimechilhuía, Toteco quitapojojpolhui nopa tacat cati tainanqui impuesto huan yaya yajqui ichaj xitahuac iixpa Toteco, pero nopa fariseo, amo. Pampa nochí cati

mohueyimatij, Toteco quinechcapantalís huan nochí catí moechcapanohuaj iixpa Toteco, Toteco quinhueyitalis.”

*Jesús quintiochijqui coneme  
(Mt. 19:13-15; Mr. 10:13-16)*

<sup>15</sup> Huan sihuame quinhualicayayaj campa Jesús ininpilconeuhua para ma quintalili imax ininpani para quintiochihuas. Huan imomachtijcahua Jesús quinitaque huan quinajhuaque. <sup>16</sup> Pero Jesús quinnojnotzqui imomachtijcahua huan quinilhui:

—Xiquincahuilica coneme ma hualaca campa na. Amo xiquintzacuilica, pampa Toteco tanahuatis ipan iniyolo masehualme catí nechselíaj quej ni coneme nechselíaj. <sup>17</sup> Huan aquí amo nechselía quej ni coneme quichihuaj, amo calaquis campa Toteco tanahuatía.

*Se tominpixquet quicamanalhui Jesús  
(Mt. 19:16-30; Mr. 10:17-31)*

<sup>18</sup> Huan hualajqui se tominpixquet huan quittzintoquili Jesús:

—Ticuali tamachtijquet, ¿taya catí cuali monequi nijchihuas para Toteco nechmacas nemilisti para nochipa?

<sup>19</sup> Huan Jesús quiilhui:

—¿Tijmati taya quijitosnequi para techtocaxtía nicuali? ¿Tijmachilía para san Dios nelía itztoc cuali? <sup>20</sup> Tijmati nopa tanahuatilme: ‘Amo ximomecati, amo xitemicti, amo xitachtequi, huan amo quema xiteistacahui quema timochihua testigo. Xiquintepanita motata huan monana.’

<sup>21</sup> Huan yaya quiilhui Jesús:

—Nochi ya ni nijchijtihualajtoc hasta quema niconetzi nieliyaya.

<sup>22</sup> Huan quema Jesús quicajqui ni, quiilhui:

—Sinta nelía ten tiquijtohua, huajca san se tamanti noja mitzpolohua. Xijnamacati nochí cati moaxca huan xiquinmaca nopa tomi cati teicneltzitzí huan quej nopa tijpiyas cati ipati para moaxca nepa ilhuicac. Huan teipa xihuala huan techtoquili.

<sup>23</sup> Pero quema nopa tacat quicajqui cati Jesús quiilhui, pejqui motequipachohua miyac pampa nelía quipixtoya tomi. <sup>24</sup> Huan Jesús quitachili huan quijito:

—Nelía ohui para masehualme cati tominpiyaj quicahuilise Toteco ma quinnahuati ipan iniyolo. <sup>25</sup> Ohui para se hueyi tapiyali quej se camello panos ipan iixteyol se huitzmalot, pero noja más ohui para se masehuali cati tominpiya calaquis ipan itanahuatilis Toteco.

<sup>26</sup> Huan inijuanti cati quicajque quiilhuijque:

—Huajca ¿ajquiya huelis momaquixtis ten itajta-colhua?

<sup>27</sup> Huan Jesús quinilhui:

—Nopa tamanti cati masehualme amo hueli quichihuaj, Toteco quena, yajati quichihuaj.

<sup>28</sup> Huan Pedro quiilhui:

—Xiquita, tijcajtejtoque nochí cati tijpixtoyaj para timitztoquilise.

<sup>29</sup> Huan Jesús quinilhui:

—Nelía nimechilhuía cati hueli cati quicajtejtoc ichaj, o isihua, o iicnihua, o itatahua, o iconehua para tepohuilis ten itanahuatilis Toteco, <sup>30</sup> quiselis más miyac ipan ni tonali huan ipan nopa tonali

cati huala, quipiyas nemilisti cati yancuic para nochipa.

*Jesús quiijto para masehualme quimictise  
(Mt. 20:17-19; Mr. 10:32-34)*

<sup>31</sup> Huan Jesús quinhuicac nopa majtacti huan ome imomachtijcahua iyoca huan quinilhui: “Xiquitaca, amantzi tiyahuij altepet Jerusalén campa panos nochí cati nopa tajtolpanextiani huejcajquiya quiijcuilojque para nopantis na cati niMocuetqui Masehuali. <sup>32</sup> Masehualme nechtemactilise inimaco seyoc tali ehuani huan nechhuihuiitase huan nechchihuilise cati fiero. Nechixchajchase, <sup>33</sup> huan nechhuijhuitequise, huan nechmictise, pero ica eyi tonati nimoyolcuis.”

<sup>34</sup> Huan imomachtijcahua amo quimachilijque cati quinilhuiyaya pampa Toteco quitatiyaya cati Jesús quiijtohuayaya para ma amo quimachilica.

*Jesús quichicajqui se popoyotzi  
(Mt. 20:29-34; Mr. 10:46-52)*

<sup>35</sup> Huan quema Jesús monechcahuiyaya altepet Jericó, itztoya npona se popoyotzi cati mosehuiyaya ojtenti motaejehuiyaya. <sup>36</sup> Huan quema nopa popoyotzi quincajqui nochí nopa miyaqui masehualme cati panoyayaj ihuaya Jesús, huajca quintatzintoquili ajquiya huala. <sup>37</sup> Huan masehualme quiilhuijque para hualayaya Jesús cati ehua altepet Nazaret. <sup>38</sup> Huan huajca nopa popoyotzi chicahuac quiijto:

—¡Jesús, tiiteipan ixhui Tanahuatijquet David ten huejcajquiya, techtasojta!

**39** Huan nopa masehualme cati tayacanayayaj quiajhuaque huan quiilhuijque ma ayecmo molini, pero noja más tzajtzic:

—¡Jesús tiiteipan ixhui David, techtasoja!

**40** Huan Jesús moquetzqui huan quinahuati se ma quihualiquili nopa popoyotzi. Huan quema ajisco, Jesús quitatzintoquili:

**41** —¿Taya tijnequi ma nimitzchihuili?

Huan nopa tacat quiilhui:

—NohueyiTeco, nijnequi nitachiyas sempa.

**42** Huan Jesús quiilhui:

—¡Xitachiya! Ya timochicajtoc pampa technelto-cac.

**43** Huan nimantzi tachixtejqui, huan quitoquili Jesús ipan ojti, quihueyichijtiyajqui Toteco Dios. Huan nochí nopa masehualme cati quiitaque ten panoc nojquiya quipaquilismacayayaj.

## 19

### *Jesús huan Zaqueo*

**1** Huan Jesús calajqui ipan altepet Jericó, pero san panotquisato. **2** Huan itztoya nopona se tacat cati itoca Zaqueo. Yaya eliyaya se tayacanquet cati tainamayaya impuesto huan quipixqui miyac tomi. **3** Huan Zaqueo quichihuayaya campeca para quiitas Jesús, pero amo huelqui pampa itz-toyaj miyauqui masehualme cati quiyahualojtoyaj, huan Zaqueo amo huejcapantic. **4** Huajca Zaqueo motalo huan tayacanqui huan tejcoto ipan se cuahuit para huelis quiitas Jesús quema panos ojtipa. **5** Huan quema Jesús ajisco nopona, ajcotachixqui ipan nopa cuahuit huan quiitac Zaqueo huan quiilhui:

—Zaqueo, ximoisihuilti huan xitemo, pampa ama nimocahuas nepa mochaj.

<sup>6</sup> Huajca nimantzi temoc, huan ica paquilsti quiseli Jesús ipan ichaj. <sup>7</sup> Huan quema masehualme quiitaque cati panoc, pejque quiejel-namiquij Jesús pampa yajqui quipaxaloto se tacat cati tahuel tajtacolchihua. <sup>8</sup> Huan teipa Zaqueo moquetzqui iniixpa nochi huan quiilhui Tohueyiteco:

—Tohueyiteco, amantzi nimoyolpatatoc. Nipehuas niquinmacas tajco cati njipiya ica injuanti cati tecneltzitzi. Huan ica nochi cati niquincajcajtoc huan niquinquixtili miyac tomi, niquincuepilis najpa imiyaca cati niquinquixtili.

<sup>9</sup> Huan Jesús quinilhui nopa masehualme noppa:

—Ama momaquixti ni tacat ten itajtacolhua pampa nechneltocac quej nojquiya Abraham nechneltocac. <sup>10</sup> Na cati niMocuetqui Masehuali nihualajtoc ipan ni taltipacti para niquintemos huan niquinmaquixtis masehualme cati mocuapolojtoyaj ipan inintajtacolhua.

*Se teteco huan majtacti tetequipanohuani  
(Mt. 25:14-30)*

<sup>11</sup> Huan nopa masehualme nochi quicaquiyayaj. Huan Jesús quinilhui se tatenpohualisti pampa monechcahuiyaya Jerusalén, huan miyaqui masehualme moilhuiyayaj Toteco pehuasquía tanahuatis nimantzi ipan ni taltipacti. <sup>12</sup> Huan Jesús quijto: “Se tacat cati itztoya ipan se familia

ten tanahuatiani quisayaya para yas ipan seyoc tali cati huejca para quiselis tequiticayot para tanahuatis, huan teipa tacuepilisquia. <sup>13</sup> Huan achtohui quinnotzqui majtacti itequipanojcahua huan quinmacac sese imiyaca tomi quej se tacat quitanisquia ipan eyi metzti ten tequit. Quinilhui ma tacohuaca huan ma tanamacaca para quitanilise más tomi hasta yaya sempa hualas. <sup>14</sup> Huan miyaqui masehualme nepa campa quisqui quicualancaitaque nopa tanahuatijquet huan quititanque se amatasencahuali campa ajsisquia huan nopa amat quiijo: ‘Amo quema tijnequij ni tacat ma technahuatiqui nica.’

<sup>15</sup> “Pero nopa tanahuatijquet quiseli itequiticayo para tanahuatis. Teipa quema tacuepili ipan ital quinnahuati ma mosentilica nopa tetequipanoihuani cati quintominmacatoya para quimatis taya quitantoyaj ica itomi.

<sup>16</sup> Huan nopa tetequipanojquet cati achtohui monexti, quiilhui: ‘Noteco, ica nopa tomi cati techcahuilijtejqui ya nijtantoc majtacti huelta más imiyaca tomi.’ <sup>17</sup> Huan iteco quiilhui:

‘Cualtitoc, tinocualtequipanoja. Temachti tiitztoya ica pilquentzi tomi cati nimitzmacac, huan ama nimitztalis xijnahuati majtacti altepeme.’ <sup>18</sup> Huan nopa ompa tetequipanojquet monexti huan quiilhui: ‘Noteco, ica nopa tomi cati techcahuilijtejqui, ya nijtantoc macuili hueltas más imiyaca tomi.’ <sup>19</sup> Huan san se quiilhui nopa ompa tetequipanojquet, nojquiya quiilhui:

‘Nimitztalis xijnahuati macuili altepeme.’

<sup>20</sup> “Huan seyoc itequipanojca hualajqui huan quiilhui: ‘Noteco, nica eltoc nopa tomi

cati techmacac. Nicajojqui ipan se payo.  
**21** Nimitzimacasiyaya sintia nijpolojtosquía motomi ica tanamaquilisti, pampa nijmati chicahuac titanahuatía. Tijcui tomi cati amo tijtantoc huan tipixca campa amo titoxtoc.’ **22** Huan iteco quiilhui: ‘Ta tifiero tetequipanojquet, nimitztajtolsencahuas ica cati ta mocamanal. Tijmatqui chicahuac nitanahuatía. Nijcui tomi cati amo nijtantoc huan nipixca campa amo nitotoc. **23** ¿Para ten amo tijtali notomi ipan se banco para ma quitequihuicaj, huan quema nihualasquía, nopa banco nechmacasquía se quentzi itanca?’

**24** “Huan nojquiya iteco quinilhui nopa mase-hualme cati ijcatojaj nechca: ‘Xijquixtilica nopa tomi cati nijmacac, huan xijmacaca yaya cati quitanqui majtacti huelta.’ **25** Huan nopa mase-hualme quiilhuijque: ‘Toteco, yaya ya quipiyá majtacti huelta itomi.’

**26** “Pero ininteco quinilhui: ‘Nimechilhuía, nochí cati quitequihuíaj cuali cati quipiyaj, niquinmacas más, huan cati amo quitequihuíaj cati quipiyaj, masque pilquentzi, niquinquixtilis nopa pilquentzi cati quipixtoyaj. **27** Huan nocualancaitacahua cati amo quinequiyayaj ma niquinnahuatíqui, ama xiquinhualicaca huan xiquinmictica nica noixpa.’ ”

*Jesús calajqui altepet Jerusalén ipan burro  
(Mt. 21:1-11; Mr. 11:1-11; Jn. 12:12-19)*

**28** Quema Jesús quinilhuijtoya ni tatenpohualisti, sempa pejqui yahui ipan ojti para Jerusalén.

**29** Huan quema monechcahuiyaya altepeme

Betfagé huan Betania huan nopa tepet cati itoca Olivos, quintitanqui ome imomachtijcahua ipan se tequit,<sup>30</sup> quinilhui:

—Xiyaca nopa pilaltepetzi cati mocahua amoixmelac huan quema ancalaquise nepa anquipantise se pilburrojtzi ilpitoc cati ayemo aqui tejcotox ipani. Xijtojtomaca huan techhualiquilica.<sup>31</sup> Huan sinta amechtatzintoquilise para ten anquitojtomaj, xiquinilhuica: ‘Toteco quinequi quitequihuis.’

<sup>32</sup> Huan nopa ome imomachtijcahua yajque huan nelia quipantijque nopa pilburrojtzi quej Jesús quinilhuijtoya. <sup>33</sup> Huan quema quitojtomayayaj, iteco quintatzintoquili:

—¿Para ten anquitojtomaj nopa pilburrojtzi?

<sup>34</sup> Huan quiilhuijque:

—Toteco quinequi quitequihuis.

<sup>35</sup> Huan quihuicaque campa Jesús, huan ipani quitalilijque inintaque, huan Jesús ipan tejcoc.

<sup>36</sup> Huan miyaqui masehualme quisohuayayaj inintaque ipan ojti campa Jesús nejnemiyaya.

<sup>37</sup> Huan quema monechcahuijque campa itaixtemolis nopa tepet Olivos, nochí nopa miyaqui masehualme cati quitoquiliyayaj pejque quipaquilismacaj Toteco por nochí nopa tiochicahualnescayot cati quiitztoyaj Jesús quichihua. Huan ica paquillisti,<sup>38</sup> inijuanti tahuejchihuayayaj huan quijtohuayayaj:

“¡Toteco Dios ma quitiochihua ni tanahuatijquet cati huala ipan itoca\*!

Oncas tasehuilisti ipan ilhuicacti.

---

\* **19:38** 19:38 Ica itequiticayo.

¡Ma tijhueyichihuaca Toteco Dios hasta tacaquistis ipan ilhuicac campa más huejcapa!"

**39** Huan sequij fariseos cati nejnemiyayaj ica nopa miyaqui masehualme quiilhuijque Jesús:

—Tamachtijquet, xiquinajhua momomachti-cahua pampa quiijtohuaj tamanti cati amo quinamiqui.

**40** Huan Jesús quinnanquili:

—Nimechilhuía sintia nomomachtijcahua amo molinisquíaj para nechhueyitalisquíaj, huajca ni teme camanaltisquíaj huan nechhueyichihuasquíaj.

**41** Huan quema Jesús monechcahui nepa Jerusalén, quitachili nopa altepet huan chocac por nopa masehualme cati nopona itztoyaj,

**42** huan quiijto: "AnJerusalén ehuani, sintia anquimachilijtosquíaj ten pano ama ni tonali, anhueltosquíaj anquipantisquíaj tasehuilisti. Pero tzactoc amoixteyol huan ya tanqui hora.

**43** Huajca se tonali amocualancaitacahua hualase huan amechyahualose huan amechojtzacuase para amo aqui huelis cholos. **44** Huan quisosolose amoaltepe huan amechmictise nochí amojuanti cati anitztoque nica. Huan amo teno ten amoaltepe mocahuas quej eltoya, pampa amo antechchihuilijque cuenta quema na nimechpaxaloco."

*Jesús quinquixti tanamacani tiopan calijtic  
(Mt. 21:12-17; Mr. 11:15-19; Jn. 2:13-22)*

**45** Huan Jesús calajqui ipan nopa hueyi israelita tiopamit huan pejqui quinquixtía nopa

tanamacani cati itztoyaj calijtic. <sup>46</sup> Huan quinilhui:

—Ijcuilijtoc ipan Icamanal Toteco campa quiijtohua: ‘Nochaj eltoc nopa cali campa masehualme motatajtise ica Toteco.’ Pero anquichijtoque campa anquintachtequiláj masehualme cati hualahuij.

<sup>47</sup> Huan Jesús tamachti mojmosta ipan nopa hueyi tiopamit, pero nopa tayacanca totajtzitzí, huan tamachtiani ten itanahuatil Moisés, huan inijuanti cati quihiucayayaj tequit quinequiyyayaj quimictise. <sup>48</sup> Pero amo quimatiyyayaj quenicatza quichihuase pampa nochí masehualme nelía quitacaquiliyyayaj icamanal.

## 20

### *Itequiticayo Jesús (Mt. 21:23-27; Mr. 11:27-33)*

<sup>1</sup> Se tonali Jesús tamachtiyaya huan tepohuiliyyaya icamanal Toteco ipan nopa hueyi israelita tiopamit, huan hualajque nopa tayacanca totajtzitzí, huan tamachtiani ten itanahuatil Moisés, huan nopa huehue tacame ten israelitame para quitatzintoquilise. <sup>2</sup> Huan quillhuijque:

—Techihilui ica taya tequiticayot tijchihua ni tamanti. ¿Ajquiya mitzmacatoc tequiticayot?

<sup>3</sup> Huan Jesús quinnanquili:

—Na nojquiya nimechtatzintoquilis se tamanti. Technanquilica ya ni. <sup>4</sup> ¿Ajquiya quititanqui Juan para tecuaaltis? ¿Toteco quititanqui o san masehualme quititanque?

**5** Huajca inijuanti iyoca pejque mocamanalhuíaj ten quenicatza quinanquilise. Quiijtojque: “Sinta tiquijtose Toteco quititanqui Juan, huajca technanquilis ¿para ten amo tijneltocaque icamanal?

**6** Huan sinta tiquijtose san masehualme quititanque, nochi ni masehualme techtehuise pampa inijuanti quineltocaj para Juan eliyaya se itajtolpanextijca Toteco.”

**7** Huan yeca inijuanti quinanguilijque, huan quiilhuijque amo quimatiyayaj ajquiya quititanqui Juan. **8** Huan Jesús quinilhui:

—Huajca na nojquiya amo nimechilhuis ajquiya nechmacatoc tequiticayot para njichihuas nochi ni tamanti.

*Se tatenpohualisti ten tequipanohuani cati amo cuajcualme*

(Mt. 21:33-44; Mr. 12:1-11)

**9** Huan Jesús pejqui quinilhuía ni tatenpohualisti, quijijo: “Itztoya se tacat cati quitojqui xocomecat ipan imil huan quincahuilijtejqui inimaco sequij tacame para ma quimocuitahuica huan teipa momajmacasquíaj cati temacasquía. Huan teipa yaya huejca yajqui. **10** Huan teipa quema ajsic tonali para tatequisti, nopa tacat quititanqui se itequipanojca ma quinitati nopa tacame para ma quimacaca cati ya iaxca ten nopa tatequisti. Pero nopa tacame cati inimaco eltoya nopa mili quimaquilijque itequipanojca huan san ica imax quimajcajque. **11** Huajca nopa tacat cati iaxca nopa mili sempa quititanqui seyoc itequipanojca, huan nojquiya quimaquilijque, huan fiero quichihuilijque, huan amo

teno quimacaque. <sup>12</sup> Huan ica expa nopa tacat sempa quititanqui seyoc itequipanojca, huan nopa tacame quicocojque, huan quiqxijque.

<sup>13</sup> “Huan nopa tacat cati iaxca nopa xocomeca mili moyolilhui: ‘Ama njmati taya njchihuas. Nijtitanis notelpoca cati niquicnelia, huan temachti quitepanitase.’ <sup>14</sup> Pero quema nopa tacame cati inimaco eltoya nopa mili quiitaque nopa telpocat, huajca moilhuijque se ica seyoc: ‘Yaya ni cati teipa quiselis ni xocomeca mili. Ma tijmictica huan teipa ni mili elis toaxca.’ <sup>15</sup> Huan inijuanti quitehuijque xocomeca milteno huan quimictijque.

“Huajca ¿taya anmoilhuíaj quichihuas nopa tacat cati iaxca nopa xocomeca mili ica nopa fiero tacame? <sup>16</sup> Yaya hualas huan quinmictis huan quicahuas imil inimaco sequinoc.”

Huan quema nopa fariseos quicajque ni, quimachilijque para inijuanti eliyayaj nopa fiero tacame ipan nopa tatenpohualisti, huajca quiilhuijque Jesús:

—¡Amo quema ma quicahuili Toteco panos ya nopa!

<sup>17</sup> Huan Jesús quintachili huan quintatzintotiquili:

—Huajca ¿taya quiijtosnequi cati ijcuilijtoc ipan Icamanal Toteco campa camanalti ten na quej nise hueyi tet? Quej ni quiijtohua:

‘Calchihuani amo quinejque quitequihuise se hueyi tet,

huan quitahuisojque.

Pero teipa nopa hueyi tet cati quitahuisojtoyaj, elqui cati más monequiyaya para yas calesquina huan ipan quiquetzase nopa cali.’

<sup>18</sup> Na ninopa hueyi tet huan nochí catí amo nech-nequij itztoque quej catí motepotanise huan huetzise ipan nopa hueyi tet, huan tahuel mococose. Huan quema na nihuetzis ininpani catí amo nech-selíaj, huajca niquinchihuas tatixtic.

*Ajquiya taxtahua impuesto  
(Mt. 21:45-46; 22:15-22; Mr. 12:13-17)*

<sup>19</sup> Huan ipan nopa tonali nopa tamachtiani ten itanahuatil Moisés huan nopa tayacanca totajtzitzi quimachilijque para inijuanti itztoyaj nopa fiero tacame ipan nopa tatenpohualisti. Huan yeca quinequiyayaj quitzacuase Jesús nimantzi, pero quinimacasiyayaj nopa miyaqui masehualme. <sup>20</sup> Huajca san quintitanque tacame ixtacatzi para ma nesica quej cuajcualme huan ma quitachilijtinemica para quicaquisquíaj se camanali catí ica quitelhuisquíaj Jesús iixpa nopa gobernador. <sup>21</sup> Huan se ten inijuanti quitatzintotiquili Jesús:

—Tamachtijquet, tojuanti tijmatij tiquijtohua huan titamachtía catí xitahuac huan amo aqui tijchicoicnelía. San titamachtía catí melahuac quinequi Toteco Dios ma tijchihuaca. <sup>22</sup> Huajca ¿tiquita cuali tiquixtahuase catí techtajtanía totanahuatijs César o amo?

<sup>23</sup> Huan Jesús quiitac para quinequiyayaj quimasiltise ica icamanal, huajca quinilhui:

—¿Para ten anquinequij antechcajca yahuase?

<sup>24</sup> Technextilica se tomi catí ica antaxtahuaj nopa impuesto. ¿Ajquiya iixcopinca quipiya ni tomi? Huan ¿ajquiya itoca ijcuilijtoc ipani?

Huan inijuanti quinanquilijque:

—Iixcopinca huan itoca Tanahuatijquet César.

<sup>25</sup> Huan Jesús quinilhui:

—Huajca xijmacaca César cati iaxca huan nojquiya xijmacaca Toteco cati Toteco iaxca.

<sup>26</sup> Huan amo huelque quicajcayahua Jesús o quimasiltise ica cati quijito iniixpa nopa masehualme. San quitachilijque quenicatza quinnanquiliyaya, huan ayecmo molinijque.

*Jesús quijito sempa moyolcuise mijcatzitzti*

*(Mt. 22:23-33; Mr. 12:18-27)*

<sup>27</sup> Huan hualajque campa Jesús sequij saduceos. Inijuanti amo quineltocaj para sempa moyolcuise mijcatzitzti. <sup>28</sup> Huan nopa saduceos quiilhuijque:

—Tamachtijquet, Moisés quijicuilo huejcajquiya sinta se tacat miquis huan amo quicajtehuas yon se conet, huajca iicni cati teipa ehua monequi mosihuajtisihuaya ihuejpol para quipiyase se conet cati quimacasiteipan ixhuihua yaya cati mijqui. <sup>29</sup> Itztoyaj chicome icnime huan nopa cati achtohui ejquet mosihuajti huan teipa mijqui, huan amo quipixqui yon se conet. <sup>30</sup> Huan nopa ompa tacat mosihuajti ica nopa cahuali huan nojquiya mijqui, huan amo quinpixqui coneme. <sup>31</sup> Huan nopa expa tacat mosihuajti ihuaya huan quej nopa panotiyajque hasta nochiccome icnime mosihuajtijque ihuaya nopa sihuat, huan amo quipixque inincone hua. <sup>32</sup> Huan teipa nojquiya mijqui nopa sihuat. <sup>33</sup> Huajca ipan nopa tonali quemamoyolcuise nochiccome mictoque, ¿ajquiya ten inijuanti quipiyas nopa sihuat para iaxca?, pampa nochiccome quichijque inisihua.

<sup>34</sup> Huan Jesús quinilhui:

—Ipan ni tonali nica ipan taltipacti tacame mosihuajtái, huan quisencahuaj para iniichpocahua ma monamictica. <sup>35</sup> Pero quema masehualme moyolcuise huan injuanti cati quinamiqui calaquise ilhuicac, ayecmo mosihuajtise, yon monamictise para quintacatiltise coneme, <sup>36</sup> pampa nepa ayecmo aqui miquis. Nochi itztose para nochipa quej ilhuicac ehuani. Itztose iconehua Toteco cati yaya quinyolcuic para itztose para nochipa. <sup>37</sup> Pero quena, mijcatzitzi moyolcuij pampa Moisés technextili ya nopa quema quiitac nopa xihuitzonti cati tatayaya huan quiijcuilo para Toteco quiilhui para yaya ininTeco Abraham, Isaac huan Jacob. <sup>38</sup> Huan pampa Toteco quiijto yaya noja eliyaya ininTeco Abraham, Isaac huan Jacob masque injuanti ya mictoyaj huejcajquiya quema quiijto nopa camanali, huajca tijmatij injuanti noja yoltoque nepa ilhuicac iixpa Toteco, pampa iixpa Toteco nochí yoltoque.

<sup>39</sup> Huan sequij tamachtiani ten itanahuatil Moisés quiilhuijque:

—Tamachtijquet, nelía cuali tijnanquili.

<sup>40</sup> Pero amo aqui motemamacac para más quitatz-intoquilis.

*Cristo iteipan ixhui David  
(Mt. 22:41-46; Mr. 12:35-37)*

<sup>41</sup> Huajca Jesús quintatzintoquili:

—¿Para ten masehualme quiijtohuaj para nopa Cristo cati Toteco quiijto hualasquía elis se iteipan ixhui Tanahuatijquet David ten huejcajquiya?

<sup>42</sup> Pampa David iselti quitocaxti Cristo ‘noTeco’ ipan Salmos campa quiijcuilo:

‘Toteco Dios quicamanalhui noTeco Cristo huan quilhui:

Ximosehui nica ipan nonejmat,

<sup>43</sup> hasta nimitzmactilis mocualancaitacahua para tiquinnahuatis.’

<sup>44</sup> Huajca Tanahuatijquet David quitocaxti Cristo ‘noTeco’ huan ya nopa technextilía Cristo yaya Dios, huajca ¿quenicatza elisquía nojquiya se masehuali cati iteipan ixhui David?

*Jesús quintelhui nopa tamachtiani ten itanahuatil Moisés*

(Mt. 23:1-36; Mr. 12:38-40; Lc. 11:37-54)

<sup>45</sup> Huan quema nochí nopa masehualme quitacaquiliyayaj, Jesús quinilhui imomachtijcahua: <sup>46</sup> “Ximomocuitahuica ica nopa tamachtiani ten itanahuatil Moisés cati quinpactía moquentise iniyoyo huehueyac. Quinpactía quema masehualme quintajpalohuaj ica cuali ipan tianquis. Quinequij mosehuise ipan nopa siyas cati más quipiya tatepanitacayot huan quinequij tacuase achtohui ipan se tacualisti. <sup>47</sup> Pero iyoca injuanti quinquixtilíaj sihuame icnotzitzin ininchajchaj. Huejcahuaj quema motatajtíaj ica Toteco para sequinoc ma quintepanitaca, pero san tacajcayahuaj, huajca achi más Toteco quintatzacuiltis que sequinoc.”

## 21

*Nopa tomi cati se toahui cati icnotzi quimacac Toteco*

(*Mr. 12:41-44*)

<sup>1</sup> Huan nepa tiopan calijtic Jesús quintachilijtoya quenicatza masehualme cati tominpiyayabaj quitaliyayaj inintomi ipan nopa caxa para quimacase Toteco. <sup>2</sup> Huan nojquiya quiitac se toahui cati icnotzi nelteicneltzi temamacac ome centavos. <sup>3</sup> Huan Jesús quijito:

—Nimechilhuía para melahuac ni toahui cati icnotzi huan teicneltzi quimacatoc Toteco más huan amo quej nochí ne sequinoc. <sup>4</sup> Pampa nochí inijuanti quimacaque cati mocahuayaya ten inintomi, pero yaya nelía teicneltzi, huan quimacatoc Toteco nochí cati quipixtoya para ica mopanoltisquía.

*Masehualme quisosolose tiopamit*

(*Mt. 24:1-2; Mr. 13:1-2*)

<sup>5</sup> Huan itztoyaj sequij cati camanaltiyayaj ten iyejyejca nopa hueyi tiopamit huan quenicatza quinyejeccchijtoyaj nopa teme cati masehualme temacatoyaj. Huan Jesús quinilhui:

<sup>6</sup> —Ajsis se tonali quema masehualme quisosolose nochí ni tamanti yejyectzi cati ama anquitachilíaj, huan yon se tet amo mocahuas campa eltoya.

*Tanextili cati mochihuas ipan itamiya tonali*

(*Mt. 24:3-28; Mr. 13:3-23*)

<sup>7</sup> Huan inijuanti quitatzintoquilijque:  
—Tamachtijquet, ¿quema panos ni tamanti?  
¿Taya tanextili oncas quema monechcahuis?

<sup>8</sup> Huan Jesús quinilhui: “Ximotachilica. Ma amo aqui amechcajcahuas pampa miyac tacame hualase huan quiijtose para na. Quiijtose: ‘Na niCristo’, huan ‘Ya ajsic hora’, pero amo xiquinnechcahuica. <sup>9</sup> Huan anquicaquise para oncas tatehuilisti huan para miyaqui tahuel mosisiníaj, pero amo ximajmahuica pampa achtohui monequi panos nochí ni tamanti, pero noja polihuiyoc para tamis taltipacti.”

<sup>10</sup> Huan Jesús noja quincamanalhui huan quinilhui: “Masehualme ipan se tali motananase huan quintehuise cati itztoque ipan seyoc tali. Tanahuatiani motehuise inihuaya sequinoc tanahuatiani huan inisoldados. <sup>11</sup> Huan campa hueli tahuel mohuisos tali, huan oncas huejhueyi mayanti, huan huejhueyi cocolisti. Huan ipan ilhuicac monextis huejhueyi tanextili huan tamanti cati temajmatis.

<sup>12</sup> “Pero achtohui, quema noja polihui nochí ni tamanti, masehualme amechitzquise huan amechtaijyohuilitse. Huan amechtemactilise iniixpa tequichihuani ipan tiopame, huan amechtzacuase. Huan amechhuicase iniixpa tanahuatiani huan gobernadores para amechtelhuise pampa antechneltocaj. <sup>13</sup> Huan quej nopa huelis anquinpohuilise ten na. <sup>14</sup> Huan amo ximoilhuica quenicatza anquinanquilise o quenicatza anmomanahuise, <sup>15</sup> pampa ipan nopa hora na nimechmacas talnamiquilisti huan nimechmacas nopa camanali cati monequi anquinilhuise, huan yon se amocualancaitaca amo huelis amechnanquilis. <sup>16</sup> Huan hasta amotatahua, o amoicnihua, o amohuicalhua, o

amohuampoyohua amechtemactilise ica amo cuajcualme. Huan inijuanti amechmictise sequij ten amojuanti. <sup>17</sup> Huan nochi masehualme amechcualancaitase pampa antechneltocaj na. <sup>18</sup> Pero amo teno huelise amechchihuilise, yon amo anquipolose yon se amotzoncal. <sup>19</sup> Huan sinta anquipiyase amoyolo huan nochi anquijyohuise, anitztose para nochipa.

<sup>20</sup> “Pero quema anquinitase soldados ten miyac talme cati quiyahualojtose ni altepet Jerusalén, huajca xijmatica para ya ajisco tonali para quisosolose. <sup>21</sup> Huajca ipan nopa hora, inijuanti cati itztoque ipan estado Judea ma choloca ipan tepeme, huan inijuanti cati itztoque ipan Jerusalén ma quisaca. Huan masehualme cati itztoque ipan mili ma amo tacuepilica para calaquise ipan ni altepet, <sup>22</sup> pampa ipan nopa tonali Toteco nelía quinnextilis masehualme icualancayo. Huan nochi panos quej ijcuilijtoc para ma pano. <sup>23</sup> Teicneltique sihuame cati tanemiltijtose huan cati quinchichitijtose coneme ipan nopa tonali pampa ohui cholose. Huan oncas hueyi taijyohuilsti ipan ni tali, huan Toteco quintatzacuiltis ni masehualme. <sup>24</sup> Huan tacame quinmictise miyaqui ica machetas huan miyaqui quinhuicase hasta ten hueli talme ipan taltipacti para ma tetequipanose san tapic. Huan cati amo israelitame ten cati hueli talme quitanise huan ipan moquejquetzase altepet Jerusalén huan quichihuilise ten quinequise hasta tamis nopa tonali cati Toteco quiixquetztoe para cati amo israelitame ma tatanica.

*Quema Jesús tacuepilis  
(Mt. 24:29-35, 42-44; Mr. 13:24-37)*

<sup>25</sup> “Huan teipa oncas tanextili ipan tonati huan ipan metzti huan ipan sitalime huan ipan taltipacti. Huan masehualme amo quimatise taya quichihuase pampa nelnelía momajmatise, pampa tahuel motananas hueyi at huan nelía ajcahuacas. <sup>26</sup> Huan masehualme tapolose pampa tahuel majmahuise ica nochí catí quiitase huala ipan taltipacti, pampa quiitase para tonati, metzti, sitalime huan nochí catí eltoc nepa ipan ilhuicacti huihuipicase. <sup>27</sup> Huan huajca quena, nechitase na catí niMocuetqui Masehuali sempa nihualas ipan se mixti ica nohueyi chicahualis, huan ica notatanex catí tahuel yejyectzi. <sup>28</sup> Huajca quema pehuas mochihuas nochí ni tamanti, ximoyolchicahuaca huan xiajcotachiyaca ica paquilsti pampa nechcatzi nopa hora quema nimechmaquixtis.”

<sup>29</sup> Huan nojquiya Jesús quinilhui se tatenpo-hualisti: “Ximoilhuica catí pano ica se higuera cuahuit huan nochí sequinoc cuame. <sup>30</sup> Quema nopa cuame moseliltíaj, huajca anquimatiij ya ajsis tatotonilot. <sup>31</sup> Huajca nojquiya quema anquiiitase panotos nochí ni tamanti, xijmatica ya nechca para Toteco tanahuatis ipan ni taltipacti.

<sup>32</sup> “Huan nimechilhuía melahuac para amo miquise nopa masehualme catí quiitase ni tanextili hasta nihualas. <sup>33</sup> Ilhuicacti huan taltipacti panotehuas, pero nocamanal nochipa motamichi-jtiyas.

<sup>34</sup> “Xitachixtoca para nopa tonal. Ma amo nimechpantiqui ipan tajtacoli. Yon amo nimech-

pantiqui anihuintitoque, yon ma amo nimech-pantiqui anmocuatotonijtoque ica tamanti ten ni nemilisti nica, pampa sinta san ya nopa anmoil-huíaj, amo anmocualtalise, huan nopa tonali ni-mantzi amechajsis quej se taquetzti. <sup>35</sup> Huan nopa tonali quinajsis nochí masehualme cati itztose campa hueli ipan taltipacti. <sup>36</sup> Pero ximocualchi-jchijtoca mojmosta para quema nihualas. Xijtaj-tanica Toteco Dios para amo monequi anpanose ipan nochí nopa tamanti cati hualas huan para huelis annoquetzase noixpa na cati niMocuetqui Masehuali.”

<sup>37</sup> Huan mojmosta quema tonaya, Jesús tamachtiyaya ipan hueyi israelita tiopamit huan ica tayohua quisayaya para toniliti ipan nopa tepet cati itoca Olivos. <sup>38</sup> Huan tahuel miyaqui masehualme mijquehuayayaj ijnaltzi para yase ipan hueyi israelita tiopamit para quitacaquilise.

## 22

*Quinejque quiitzquise Jesús  
(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Huan monechcahuiyaya nopa ilhuit cati itoca Pascua quema quicuaj pantzi cati amo quipiya tasonejcayot. <sup>2</sup> Huan nopa tayacanca totajtzitzi huan tamachtiani ten itanahuatil Moisés quitemohuayayaj quenicatza huelis quimictise Jesús, pero quinimacasiyayaj nopa miyaqui masehualme cati qitoquiliyayaj.

<sup>3</sup> Huan Amocualtacat calajqui ipan iyolo Judas Iscariote cati eltoya se ten nopa majtacti huan

ome imomachtijcahua Jesús. <sup>4</sup> Huan Judas ya-  
jqui quincamanalhuito nopa tayacanca totajtz-  
itzi huan ininteco nopa soldados ipan tiopamit,  
huan quisencajqui inihuaya quenicatza huelis  
quinmactilis. <sup>5</sup> Huan inijuanti paquiyayaj ica  
itapalehui huan quijtojque para quitaxtahuise.  
<sup>6</sup> Huan quipacti Judas huan pejqui quitemohua  
quenicatza huelis quinmactilis Jesús quema amo  
itztoyaj miyaqui masehualme.

*Itacualis Tohueyiteco*

(Mt. 26:17-29; Mr. 14:12-25; Jn. 13:21-30; 1 Co.  
11:23-26)

<sup>7</sup> Huan ajsic nopa tonali para quicuase pantzi  
cati amo quipiya tasonejcayot, huan para quimic-  
tise nopa pilborregojtzi para Pascua. <sup>8</sup> Huan Jesús  
quintitanqui Juan ihuaya Pedro huan quinilhui:

—Xiyaca huan xijsencahuaca nopa Pascua  
tacualisti para nochí tojuanti titacuatij.

<sup>9</sup> Huan inijuanti quiilhuijque:

—¿Canque tijnequi ma tijsencahuatij?

<sup>10</sup> Huan Jesús quinilhui:

—Quema ancalaquise ipan nopa altepet, an-  
quinamiquise se tacat cati quihuica iajcoltipa se  
comit at. Xijtoquilijtiyaca hasta nopa cali campa  
calquis. <sup>11</sup> Huan nopona anquiilhuise cati iaxca  
nopa cali: ‘Nopa tamachtijquet quijtohua ma  
timitztatzintoquiliquij, ¿canque eltoc nopa hueyi  
cuarto campa quicuas nopa Pascua tacualisti  
ihuaya imomachtijcahua?’ <sup>12</sup> Huan yaya amech-  
nextilis se cali cati quipiya ome piso campa eltoc  
se hueyi cuarto, huajca nopona xijsencahuaca  
nopa tacualisti.

<sup>13</sup> Huan injuantí quisque huan quipantijque nochí quej Jesús quinilhuijtoya huan nopena quisencajque nopa Pascua tacualisti.

<sup>14</sup> Huan quema ajsic hora, Jesús ajsico ica nochí imomachtijcahua huan mosehuijque campa mesa. <sup>15</sup> Huan Jesús quiijo:

—Nelía miyac nijnequiyaya nijcuas ni Pascua tacualisti amohuaya pampa ya nechca para nitaijyohuis. <sup>16</sup> Nimechilhuía, amo nijcuas sempa hasta tiitztose nepa campa Toteco tanahuatía huan ya panotos nochí cati quinextía ni tacualisti.

<sup>17</sup> Huan Jesús quicuic se taza ica xocomeca at huan quitascamatqui Toteco huan quiijo:

—Xiquica ipan ni taza huan ximomajmacaca nochí amojuanti. <sup>18</sup> Pampa nimechilhuía, amo niquis xocomeca at sempa hasta nopa tonali quema tanahuatis Toteco.

<sup>19</sup> Huan quiitzqui se pantzi huan quitascamatqui Toteco. Huan quitapanqui huan quinmajmacac imomachtijcahua huan quinilhui:

—Ni notacayo cati nitemactilis por amojuanti. Xijchihuaca ya ni para anquiixnextise annechelnamiquij.

<sup>20</sup> Huan quema ya tacuajtoyaj, sempa quichijqui san se, quiitzqui nopa taza, huan quinilhui:

—Ni noeso. Ica noeso cati nijtoyahuas para amojuanti nijpehualtis itequiticayo nopa yan cuic camanal sencahualli ica masehualme huan Toteco. <sup>21</sup> Pero xiquitaca, yaya cati nechtemactilis tacua nohuaya ipan ni mesa. <sup>22</sup> Quena, na cati niMocuetqui Masehuali nimquis pampa quej nopa Toteco quitalijtoc, pero teicnelti nopa tacat cati nechtemactilis pampa tahuel taijyohuis.

**23** Huan imomachtijcahua pejque mocamanal-huíaj para quimatise ajquiya huelis quiteactilis.

*Ajquiya achi hueyi iixpa Toteco  
(Mt. 20:25-28; Mr. 10:42-45)*

**24** Huan imomachtijcahua Jesús nojquiya pejque monajnanquiláj ajquiya elisquía más hueyi iixpa. **25** Huan Jesús quinilhui: “Tanahuatiani nica ipan ni taltipacti tahuel tanahuatíaj chicahuac huan masque ya nopa quichihuaj monequi inimasehualhua ma quintocaxtica ‘cuajcualme’.

**26** Pero amo quej nopa amojuanti anmochihuase anhuejhueyi iixpa Toteco. Cati ten amojuanti quinequi elis más hueyi, monequi mochihuas quej se cati más telpocat ten nochí. Huan cati quinequi elis amotayacanca, ma eli amotequipanojca. **27** ¿Catijqui anquiitaj para más hueyi, yaya cati mosehuía campa mesa o yaya cati quintequipanohua? Anmoilhuíaj yaya cati mosehuía achi hueyi. Pero xiquitaca na amo nimohueyimati. Na niitztoc amohuaya quej niamotequipanojca.

**28** “Amojuanti anitztoque cati anmocajtoque nohuaya quema nijpanotoc taohuijcayot. **29** Huan yeca nimechmacas tequiticayot antanahuatise quej noTata nechmacatoc tequiticayot nitanahuatis. **30** Huan antacuase nohuaya campa na nitanahuatis, huan nimechsehuis ipan siyas cati yejyectzi para anquintajtolsencahuase nopa majtacti huan ome huejhueyi familias ten israelitame.”

*Pedro quiijtos amo quiixmati Jesús  
(Mt. 26:31-35; Mr. 14:27-31; Jn. 13:36-38)*

<sup>31</sup> Huan nojquiya Toteco quiilhui Pedro:

—Simón, Simón, ximotachili. Amocualtacat ya tajtanqui caquihuili para mitztejtzelos quej se quitzejtzelohua trigo, <sup>32</sup> pero nimotatajtijtoc ica Toteco para amo tijcahuas techneltucas. Huan teipa quema timoyolpatas ica cati amo cuali ti-jchijtoc, xiquinyolchicahua ni moicnihua, huan xiquinmaca tetili.

<sup>33</sup> Huan Simón Pedro quiilhui:

—Tohueyiteco, nimocahuas mohuaya masque nechtzacuase o nechmictise.

<sup>34</sup> Huan Jesús quiilhui:

—Nimitzilhuía Pedro, amo tzajtzis se cuapele ica ijnaloc hasta expa tiquijtos para amo techix-mati.

### *Ama xijhuicaca amobolsa*

<sup>35</sup> Huan Jesús quinilhui nochí imomachtijc-ahua:

—Quema nimechtitanqui huan nimechilhui amo xijhuicaca tomi, yon morral, yon tecacti, ¿taya amechpolo?

Huan quinanquilijque:

—Amo teno techpolo.

<sup>36</sup> Huan Jesús quinilhui:

—Pero ama, nimechilhuía sinta anquipiyaj tomi, xijhuicaca. Huan nojquiya xijhuicaca se morral, huan sinta se amo quipiya se macheta, ma quinamaca itaque huan ma quicohua. <sup>37</sup> Pampa nimechilhuía, ama tamis cati quiijcuilojque huejcajquiya ten na campa quiijtohua: ‘Masehualme quiitase quej amo cuali pampa quiitase inihuaya amo cuajcualme.’

<sup>38</sup> Huan inijuanti quiijtojque:

—Tohueyiteco, xiquita nica tijpiyaj ome machetas.

Huan Jesús quijito:

—Ya cuali.

*Jesús motatajti nepa Getsemani*

(Mt. 26:36-46; Mr. 14:32-42)

<sup>39</sup> Huan Jesús quisqui huan yajqui campa nopa tepet Olivos quej momajtoya, huan imomachtijc-ahua quitoquilijque. <sup>40</sup> Huan quema ajsitoj nepa, quinilhui:

—Ximotatajtica ica Toteco para amo amechy-oltilanás tajtacoli.

<sup>41</sup> Huan yaya sempa moiyoquixti. Huan motancuaquetzqui huan pejqui motatajtía, <sup>42</sup> huan quijito: “Notata, sintia mopaquilis, huajca techquixtili ni hueyi taijyohuilisti catí huala, pero amo xijchihua catí na nijnequi, san xijchihua catí ta mopaquilis.”

<sup>43</sup> Huan hualajqui se ilhuicac ejquet ten ilhuicac huan quimacac tetili. <sup>44</sup> Jesús nelía taijyohuiyaya, huan chicahuac motatajtiyaya. Mitoniyaya miyac huan iitonal elqui quej esti catí chipiniyaya.

<sup>45</sup> Huan quema tantoja motatajtía, moquetzqui huan tacuepili campa itztoyaj imomachtijcahua, huan quinpantito cochtoque pampa tahuel siyajtoyaj ica tequipacholi. <sup>46</sup> Huan Jesús quinilhui:

—¿Para ten ancochtoque? Ximoquetzaca huan ximotatajtica para amo aqui amechyoltilanás antajtacolchihuase.

*Quiitzquijque Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Huan quema Jesús noja quincamanal-huiyaya, ajsicoj miyaqui tacame. Huan Judas se imomachtijca quinyacanayaya. Huan yaya monechcahui campa Jesús huan quitzoponi.

<sup>48</sup> Huan Jesús quiilhui:

—Judas, ¿ta techtzoponi para techtemactilis na cati niMocuetqui Masehuali?

<sup>49</sup> Huan inijuanti cati itztoyajihuaya Jesús quiitaque ten panoyaya, huan huajca quitatzintotquilijque:

—Tohueyiteco, Tohueyiteco, ¿tijnequi ma titatehuica ica tomacheta?

<sup>50</sup> Huan se cati itztoyajihuaya Jesús, quimaquiliitequipanojca nopa hueyi totajtzi huan quitzontequili inacas ten inejmat. <sup>51</sup> Huan Jesús quiilhui:

—¡Xijcahua! Ayecmo xitatehui.

Huan Jesús quiitzqui inacas huan quichicajqui.

<sup>52</sup> Huan hualajtoyaj nopa tayacanca totajtzitzi huan ininteco nopa soldados ipan nopa hueyi israelita tiopamit huan nopa huehue tacame ten israelitame. Huan Jesús quinilhui:

—¿Para ten anhualajtoque nica para antechitzquise ica machetas huan ica cuahuit quej nielisquía se nitachtejquet? <sup>53</sup> Mojmosta niitztoya amohuaya ipan nopa hueyi tiopamit, huan amo quema antechitzquijque. Pero nelía ni hora amoaxca huan iaxca Amocuältacat cati quipiya chicahualisti para tanahuatis ipan tzintayohuilot.

*Pedro quiijto amo quiixmati Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Huan inijuanti quiitzquijque Jesús, huan qui-huicaque hasta ichaj nopa hueyi totajtzi huan Pedro quihuejcatiquili. <sup>55</sup> Huan masehualme tipitztoyaj tajco calixpamit pampa taseseyayaya huan mosehuijtoyaj san sejco, huan Pedro no-jquiya mosehuito inihuaya. <sup>56</sup> Huan se sihua tequipanojquet quiitac Pedro mosehuiyaya titeno huan quitachili huan quiijo:

—Ni tacat nojquiya itztoya ihuaya Jesús.

<sup>57</sup> Huan Pedro quiijo para amo. Quiijo:

—Nane, amo niqximati.

<sup>58</sup> Huan quentzi teipa seyoc quitachili huan quiijo:

—Ta tiitztoya nojquiya tiimomachtijca.

Huan Pedro quiijo:

—¡Amo, Tate! ¡Amo na!

<sup>59</sup> Huan panoc se hora huan seyoc tacat quiijo:

—Temachti ni tacat nejnenqui ihuaya pampa yaya se Galilea ejquet nojquiya.

<sup>60</sup> Huan Pedro quiijo:

—Tate, amo njimati taya tiquijtohua.

Huan nimantzi quema noja camanaltiyaya Pedro, tzajtzic se cuapele. <sup>61</sup> Huan Tohueyiteco moicancuetqui huan quitachili. Huan Pedro quielnamijqui cati Tohueyiteco quiilhuijtoya: “Amo tzajtzis se cuapele ica ijnaloc hasta tiquijtos expa para amo techixmati.” <sup>62</sup> Huan Pedro quisqui calteno huan tahuel mochoquili.

*Tacame quimaquilijque Jesús  
(Mt. 26:67-68; Mr. 14:65)*

<sup>63</sup> Huan nopa soldados cati quimocuitahuiyayaj Jesús quihiuhuiitayayaj huan quimaquiliyayaj.

<sup>64</sup> Huan quiixtzajque huan quitatzintoquilijque:

—Sinta titajtolpanextijquet, techilhui, ¿ajquiya ten tojuanti timitzmaquilíaj? <sup>65</sup> Huan quiilihuiyayaj miyac tamanti cati fiero.

*Jesús iniixpa nopa hueyi tasentilisti ten tequichi-huani*

(Mt. 26:59-66; Mr. 14:55-64; Jn. 18:19-24)

<sup>66</sup> Huan quema tanesqui, mosentilijque nopa huehue tacame cati quihuicayayaj tequit ica israelitame, huan nopa tayacanca totajtzitz, huan nopa tamachtiani ten itanahuatil Moisés, huan quihuicaque Jesús iniixpa nopa tasentilisti cati más quipixqui tanahuatili. Huan nopa tacame quiilhuijque:

<sup>67</sup> —Sinta ta tiCristo cati Toteco techilhui techtitanilisquía, huajca techilhui.

Huan Jesús quinilhui:

—Sinta nimechilhuisquía, amo antechneltocasquíaj. <sup>68</sup> Huan sinta nimechtatzintoquilisquía tamanti para ica nimomanahuis, amo antechnanquilisquía, yon amo antechmajcahuasquía. <sup>69</sup> Pero ama, amo huejcahuas para na cati niMocuetqui Masehuali nimosehuiti inejmat Toteco Dios cati quipiya nochicahualisti.

<sup>70</sup> Huan inijuanti quitatzintoquilijque:

—Huajca ¿ta tiIcone Toteco Dios?

Huan Jesús quinilhui:

—Quena, na niIcone.

<sup>71</sup> Huan inijuanti moilhuijque se ica seyoc:

—Huajca amo aqui más monequi quitelhuis,  
pampa tojuanti ya tijcactoque cati ya quijtojtoc.  
San ya nopa monequi.

## 23

### *Jesús iixpa Pilato*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Huajca nochí inijuanti moquetzque huan qui-huicaque Jesús iixpa Pilato. <sup>2</sup> Huan pejque quitel-huiáj huan quiilhuijque Pilato:

—Tijpantijque ni tacat quincajcahuayaya masehualme ipan total huan quinilhuiyaya ma amo taxtahuaca impuesto catí Tanahuatijquet César techtajtanía. Huan quinilhuiyaya masehualme para yaya nopa Cristo, huan yaya se tanahuatijquet.

<sup>3</sup> Huan Pilato quitatzintoquili Jesús:

—¿Ta tiinintanahuatijca israelítame?

Huan Jesús quinanquili:

—Quena, na niinintanahuatijca quej tiquijto-hua.

<sup>4</sup> Huan Pilato quinilhui nopa tayacanca totajtz-itzi, huan nochí nopa miyaqui masehualme:

—Amo nijpantilía catí amo cuali quichijtoc.

<sup>5</sup> Pero inijuanti achi más tahuejchijque huan quiilhuijque:

—Yaya quinyolajcomantinemí masehualme campa hueli ica itamachtil. Pejqui ipan estado Galilea huan ajsico hasta nica ipan Judea.

<sup>6</sup> Huan quema Pilato quicajqui ya ni, quintatzintoquili sintá Jesús ehua estado Galilea. <sup>7</sup> Huan quicajqui para quena, huan quimatqui para quitocarohuayaya Herodes

Ántipas quitajtolsencahuas pampa yaya quipixqui tanahuatili ipan Galilea. Huajca quititanqui Jesús campa ya para ma quitajtolsencahua, pampa Herodes paxalohuayaya ipan altepet Jerusalén ipan nopa tonali.

### *Jesús iixpa Herodes*

<sup>8</sup> Huan quema Herodes quiitac Jesús, yaya nelía paquiyaya pampa miyac tonali quinequiyaya quiitas. Quicactoya miyac tamanti ten ya huan quinequiyaya para Jesús ma quichihua se tiochicahualnescayot iixpa. <sup>9</sup> Huajca Tanahuatijquet Herodes quitatzintoquili Jesús miyac, pero Jesús amo quinanquili. <sup>10</sup> Huan nopa tayacanca totajtzitzí huan tamachtiani ten itanahuatil Moisés moquetztoyaj npona, huan chicahuac quitelhuiyayaj. <sup>11</sup> Huajca Herodes huan isoldados pejque quihuihuitaj huan quihuetzquiláj. Huan quiyoyonti ica se yoyomit cati cuajcualtzí quej moquentíaj tanahuatiani, huan sempa quititanqui ica Pilato. <sup>12</sup> Huan ipan nopa tonali Herodes huan Gobernador Pilato sempa moyoltalijque pampa achtohui nelía mocualaniyayaj.

### *Quiijtoque ma miqui Jesús*

(Mt. 27:15-26; Mr. 15:6-15; Jn. 18:39-19:16)

<sup>13</sup> Huan Pilato quinnotzqui nopa tayacanca totajtzitzí, huan nopa tequichihuani, huan nopa miyaqui masehualme <sup>14</sup> huan quinilhui:

—Antechhualiquilijque ni tacat huan antechilhuiáj para quinyacana masehualme ma motananaca. Pero nijtatzintoquili amoixpa, huan nijpanti para amo quichijtoc yon se tajtacoli cati ica anquitelhuijtoque. <sup>15</sup> Huan nojquiya Herodes

amo teno quipantili, huan yeca nechtitanili sempa. Amo teno quichijtoc para ma tijmictica. **16** Huajca nijtatzacuiltis huan nijmajcahuas para ma yahui.

**17** Sesen xihuit ipan nopa Pascua Ilhuit monejqui para Pilato quimajcahuas se cati itztoya ipan tatzacti. **18** Pero nochí nopa masehualme chicahuac quijtojque:

—¡Xijmicti Jesú! ¡Xijmajcahuá Barrabás!

**19** Huan Barrabás quitzactoyaj pampa quintanqui masehualme ma tatehuica ica gobierno, huan nojquiya pampa temicti. **20** Huan Pilato sempa quincamanalhui nopa masehualme pampa quinequiyaya quimajcahuas Jesú, **21** pero nopa miyaqui masehualme achi más tzajtziyaj:

—¡Xijcuamapelolti! ¡Xijcuamapelolti!

**22** Huan Pilato ica expa quinilhui:

—¿Para ten? ¿Taya amo cuali quichijtoc? Amo teno nijpantili cati quichijtoc para ma tijmictica. San nijtatzacuiltis huan teipa nijmajcahuas ma yahui.

**23** Pero nopa miyaqui masehualme huan tayacanca totajtzitzi achi más tahuejchijque huan quitajtaniyayaj ma quicuamapelolti, huan yeca quifuerzajhuijque Pilato. **24** Huajca Pilato motemacac para quichihuas cati inijuanti quinequiyayaj. **25** Huan quinmalakanili nopa tacat cati tzactoya pampa tatehui ica gobierno huan temicti pampa yaya cati quitajtanijque. Huan quinmactili Jesú inimaco para ma quichihuaca ihuaya cati inijuanti quinequiyayaj.

*Quicuamapeloltijke Jesús  
(Mt. 27:32-44; Mr. 15:21-32; Jn. 19:17-27)*

<sup>26</sup> Huan nopa soldados quihuicaque Jesús. Teipa quiitzquijque se tacat cati itoca Simón cati ejqui tali Cirene. Yaya ajsitinemiyaya ten ital huan nopa soldados quiquechpanoltijke nopa cuamapeli para ma quihuica iica Jesús.

<sup>27</sup> Huan tahuel miyaqui masehualme quitoquiliyaya, huan miyac sihuame chocayaya, huan tahuejchihuayaya pampa quicuamapeloltise Jesús. <sup>28</sup> Huan Jesús moicancuetqui huan quinilhui:

—Naname cati anehuaj Jerusalén. Amo xichocaca por na, pero ximochquilica por amojuanti huan por amoconehua. <sup>29</sup> Pampa ajsis tonali quema masehualme tahuel taijyohuise huan quijtose para cuali ininpantis sihuame cati amo huelque conepiyaj huan amo quema quinchichitijke coneme. <sup>30</sup> Ipan nopa tonali masehualme quinilhuise nopa tepeme ma huetzi ininpani huan ma quintati. <sup>31</sup> Pampa sinta monequi nitaijyohuis quej ni, huan amo nitajtacolchijtoc, ¿quenicatza monequi taijyohuise masehualme cati miyac tajtacoli quihuicaj?

<sup>32</sup> Huan quinhuicayaya ome tachtequini nojquiya para quincuamapeloltise ihuaya Jesús.

<sup>33</sup> Huan nochí ajsitoj campa itoca Mijcatzonte-comit, huan quicuamapeloltijke Jesús ica nopa tachtequini, se ipan inejmat huan seyoc ipan iarraves. <sup>34</sup> Pero Jesús motatajti huan quiilhui iTata: “Notata, xiquintapojojhui pampa amo quimatij taya quichihuaj.”

Huan nopa soldados mahuiltijque ica piltetzitzi cati yejyectzi huan momajmacaque iyoyo Jesús.  
 35 Huan nopa miyaqui masehualme moquetztoyaj nopona huan quitachilijtoyaj. Huan nojquiya nopa tequichihuani quihuihuiitayayaj Jesús huan quijtohuayayaj ten ya:

—Quinmaquixti sequinoc, huajca ma momaquixti sinta nelía yaya nopa Cristo cati Toteco quitapejpenijtoc para techtitanicilis.

36 Huan nopa soldados nojquiya quihuihuitaque huan monechcahuijque campa yaya quej elisquía quitequipanohuaj huan quitenamiquilitijque xocomeca at cati ya xocoxtoya, 37 huan quiilhuijque:

—Sinta nelía ta tiinintanahuatijca israelitame, huajca ximomaquixti.

38 Quitalijtoyaj se tajcuiloli ipan icuamapel itzonta Jesús cati quijito: NI JESÚS ININTANAHUATIJCA ISRAELITAMÉ.

39 Huan se ten nopa tachtequini cati quicuamapeloltijtoyaj nojquiya ica paquiyaya Jesús huan quiilhui:

—Sinta nelía ta tiCristo cati Toteco techtitanicilijtoc, huajca ximomaquixti huan techmaquixti nojquiya.

40 Huan ne se tachtejquet quiajhuac ica cati quijito, huan quiilhui:

—¿Amo tiquimacasí Toteco, masque amantzi timiquis? 41 Quinamiqui para ta huan na ma timiquica pampa amo cuali cati tijchijtoque, pero ni Jesús amo teno quichijtoc cati amo cuali.

**42** Huan teipa nopa tachtejquet nojquiya quiilhui Jesús:

—Jesús, techelnamiquis quema tihuallas para titanahuatis.

**43** Huan Jesús quiilhui:

—Nimitzilhuía para temachti, ama ni tonali titztotí nohuaya nepa campa tahuel tayejyectzi.

*Jesús mijqui*

(Mt. 27:45-56; Mr. 15:33-41; Jn. 19:28-30)

**44** Huan nechca tajco tona, tzintayohuixqui campa hueli ipan taltipacti huan quej nopa mocajqui hasta las tres ica tiotac. **45** Ayecmo taahui tonati, huan tzayanqui ica ome nopa hueyi cortina cati quitzacuayaya nopa cuarto Campa Más Tatzejzelotic hueyi tiopan calijtic. **46** Huan Jesús camanaltic chicahuac, huan quiilhui iTata:

—Notata, nimitzmactilía notonal momaco ta.

Huan quema Jesús quiijto ya ni, mijqui.

**47** Huan nopa capitán ten soldados quiitac cati Jesús quichijqui, huan pejqui quihueyichihua Toteco Dios huan quiijto:

—Nelía ni Jesús eltoya se tacat cati amo teno quichijtoc.

**48** Nochi nopa miyaqui masehualme mosentilijtoyaj para quimatise taya ipantis Jesús, huan quema quiitaque nochi ten panoc, tacuepiliqque ininchajchaj moyoltejtejtzontiyajque pampa tahuel motequipachohuayayaj. **49** Huan nochi ihuampoyohua Jesús huan nopa sihuame cati hualajtoyaj ihuaya ten estado Galilea moquetztoyaj ica huejca, quitachiliyaj quej nochi ni tamanti.

*Quitalijke Jesús ipan ostot ipan se tepet  
(Mt. 27:57-61; Mr. 15:42-47; Jn. 19:38-42)*

<sup>50</sup> Huan itztoya se tacat cati itoca José cati ehuayaya altepet Arimatea ipan estado Judea. Yaya nojquiya eliyaya se tequitquet ipan nopa tasentilisti cati más quipixqui tanahuatili cati quittatzintoquili Jesús huan quiijtojque para monequi miquis. José eltoya se cuali tacat huan xitahuac iyolo iixpa Toteco. <sup>51</sup> Yaya quichiyayaya para Toteco Dios ma tanahuatis ipan taltipacti huan yeca amo quipacti cati quichijque nopa tasentilisti. <sup>52</sup> Huan ni José yajqui quiitato Pilato huan quitajtani ma quimaca itacayo Jesús. <sup>53</sup> Huan quitemohuito itacayo huan quimimilo ica se hueyi yoyomit. Huan quitejqui ipan se ostot ipan se tepet cati yancuic quicoyonijtoya ipan tet campa ayemo quitalijtoyaj se mijcatzi. <sup>54</sup> Huan eltoya nopa tonali para quicualtalise nochi cati monequi pampa a las seis ica tiotac pehuayaya nopa seyoc tonali quema nochi israelitame monequi mosiyajquetzase.

<sup>55</sup> Huan nopa sihuame cati hualajque ten estado Galilea ihuaya Jesús quitoquilijque José huan quiitaque nopa ostot ipan nopa tepet huan quenicitza quitalijtoya itacayo. <sup>56</sup> Huan teipa tacuepilijque ininchaj huan quisencajque taajhuiyacayot cati atic huan cati tatixtic. Huan ipan nopa tonal para mosiyajquetzase israelitame, injuanti mosiyajquetzque quej quiijto nopa tanahuatili.

## 24

*Moyolcuic Jesús  
(Mt. 28:1-10; Mr. 16:1-8; Jn. 20:1-10)*

<sup>1</sup> Ipan domingo, nopa achtohui tonali ipan samano, nelía ijnaltzi nopa sihuame yajque campa ostot ipan nopa tepet huan quihuicaque nopa taajhuiyacayot cati quisencajtoyaj. Huan sequinoc sihuame nojquiya yajque inihuaya. <sup>2</sup> Huan quema ajsicoj, quiitaque ya quiijcuenijtoyaj nopa hueyi tet cati quiixtzactoya nopa ostot ipan nopa tepet. <sup>3</sup> Huan calajque, pero amo quipantijque itacayo Tohueyiteco Jesús. <sup>4</sup> Huan san motachilijque huan san moilhuiyaj taya panotoya. Huan nimantzi moquetzque ininechca ome tacame cati moquentijtoyaj iniyoyo cati nelía cahuaniyaya. <sup>5</sup> Huan tahuel momajmatijque huan mohujtzonque huan nopa tacame quinlhuijque:

—¿Para ten anquitemohuaj se cati itztoc nica campa quincahuaj mijcatzitz? <sup>6</sup> Jesús amo aqui nica. Ya moyolcuic. Xiquelnamiquica quema noja itztoya ipan Galilea amechilhui para moyolcuisquía. <sup>7</sup> Amechilhui para monequi quitemactilisquíaj yaya cati Mocuetqui Masehuali inimaco tajtacolchijca masehualme huan quicuamapeloltisquíaj huan ica eyi tonati yaya moyolcuisquía sempa.

<sup>8</sup> Huajca nopa sihuame quielnamijque icamanal, <sup>9</sup> huan quisque ipan ostot ipan nopa tepet huan quinyolmelahuatoj nopa majtacti huan se imomachtijcahua huan nochí sequinoc ihuampoyohua Jesús cati quiitztoyaj. <sup>10</sup> Huan nopa sihuame cati quinyolmelahuatoj itayolmelajcahua Jesús ten quiitztoyaj inintoca eliyaya María Magdalena, Juana, huan María

inana Jacobo huan nojquiya itztoyaj sequinoc sihuame inihuaya. <sup>11</sup> Pero imomachtijcahua moilhuijque san ahuilcamanaltiyayaj huan amo quineltocaque cati quinilhuicoj.

<sup>12</sup> Pero Pedro moquetzquisqui huan matalo hasta nopa ostot ipan nopa tepet. Huan quitachili iijtic huan quiitac san eltoya nopa hueyi yoyomit cati ica quipijque itacayo Jesús. Huan teipa tacuepili ichaj huan tahuel quitetzaitayaya ten panotoya.

*Ipan ojti para Emaús  
(Mr. 16:12-13)*

<sup>13</sup> Huan nojquiya ipan nopa tonali itztoyaj ome ihuampoyohua Jesús cati nejnemiyayaj ipan ojti hasta se pilaltepetzi cati itoca Emaús cati mocajqui nechca majtacti huan se kilómetros ihuej-caca ten altepet Jerusalén. <sup>14</sup> Huan mocamanal-huiyayaj se ica seyoc ica nochí ten panotoya.

<sup>15</sup> Huan quema mocamanalhuiyayaj, Jesús iselti monechcahuico huan pejqui inihuaya nejnemi.

<sup>16</sup> Pero Toteco amo quincahuili ma quiixmatica sintia ya. <sup>17</sup> Huan Jesús quintatzintoquili:

—¿Taya anmocamanalhuijtiyahuij ipan ojti?  
¿Para ten tahuel anmotequipachohuaj?

<sup>18</sup> Huan se ten inijuanti cati itoca Cleofas quinanquili Jesús:

—¿Huelis san ta ipan nochí altepet Jerusalén amo tijmati nochí tamanti ten panotoc nica ipan ni tonali?

<sup>19</sup> Huan Jesús quinilhui:

—¿Taya tamanti?

Huan quiilhuijque:

—Nopa tamanti ten panoc ica Jesús cati ehua Nazaret. Yaya eltoya se tajtolpanextijquet cati quipixqui chicahualisti quichihuas huejhueyi tiochicahualnescayot. Tamachi ica chicahualisti huan quipacti Toteco Dios huan quinpacti masehualme. <sup>20</sup> Huan nopa tayacanca totajtzitzi huan tequichihuani quitemactilijque para ma quimictica. Huan quicuamapeloltijque. <sup>21</sup> Tojuanti timotemachiyayaj ipan ya para techmaquixtis tiisraelitame. Huan quipiya eyi tonati quicuamapeloltijque. <sup>22</sup> Ama nojquiya san timotachiliyayaj pampa sequij sihuame yajque ijnaltzi hasta campa ostot ipan nopa tepet, <sup>23</sup> huan amo quipantijque itacayo. Techilhuicoj quinitaque ilhuicac ehuan cati quinilhuijque para Jesús ya itztoc. <sup>24</sup> Huan sequinoc cati itztoyaj tohuaya nojquiya yajque campa ostot ipan nopa tepet huan quipantijque nochiquej nopa sihuame quiijtojtoyaj, pero amo quiitaque Jesús.

<sup>25</sup> Huan Jesús quinilhui:

—¿Amo anquimachilíaj? Nelía ohui para anquineltocaj nochí cati quiijtojque itajtolpanextijcahua Toteco. <sup>26</sup> ¿Amo anquimachilíaj para monejqui Cristo taijyohuis ica nochí ni tamanti huan teipa yas ilhuicac campa quipiyas ihueyitilis?

<sup>27</sup> Huan Jesús pejqui ica cati quiijcuilo Moisés huan panoc inintajcuilol nochí sequinoc itajtolpanextijcahua Toteco, huan quinpohuili nochí cati ijcuilijtoc ten ya campa hueli ipan Icamanal Toteco.

<sup>28</sup> Huan quema monechcahuiyayaj nopa pilaltepetzi campa yahuij, Jesús mochijqui quej achi

más huejca yasquía. <sup>29</sup> Huan nopa ome tacame chicahuac quiilhuijque:

—Ximocahua tohuaya pampa nimantzi calaquis tonati huan tayohuiyas.

Huan Jesús yajqui para mocahuas inihuaya. <sup>30</sup> Huan quema mosehuijtoya inihuaya campa mesa, quiitzqui pantzi huan quitascamatqui Toteco, teipa quitajcoitac huan quinmajmacac. <sup>31</sup> Huajca elqui quej tapojqui iniixteyolhua huan quiixmatque, huan nimantzi Jesús ayecmo monexti iniixpa. <sup>32</sup> Huan huajca quiijtojque se ica seyoc:

—¿Amo tijmachiliyaya quej yejyectzi eliyaya ipan moyolo quema yaya techcamanalhuiyaya ipan ojti huan techilhuiyaya cati quiijtosnequi Icamanal Toteco?

<sup>33</sup> Huan huajca nopa ome tacame moquetzque nimantzi huan tacuepilijque Jerusalén. Huan quinpantijque nopa majtacti huan se imomachtijcahua Jesús ya mosentilijtoyaj ica sequinoc <sup>34</sup> cati quiijtohuayayaj para Tohueyiteco nelía moyolcuitoc huan monextijtoya ica Simón Pedro. <sup>35</sup> Huajca nopa ome nojquiya pejque quinyolmelahuaj ten ininpantic ipan ojti huan quenicatza quiixmatque Jesús quema quitajcoitac nopa pantzi.

*Jesús monexti iniixpa imomachtijcahua  
(Mt. 28:16-20; Mr. 16:14-18; Jn. 20:19-23)*

<sup>36</sup> Huan quema noja quinilhuiyayaj ni tamanti, Jesús moquetzqui tatajco ten inijuanti huan quinilhui:

—Xijpiyaca tasehuilisti ipan amoyolo.

<sup>37</sup> Huan inijuanti san quitachilijque huan momajmatijque huan moilhuijque quiitayayaj se ajacat. <sup>38</sup> Huan Jesús quinilhui:

—¿Para ten anmajmahuij huan ohui anquineltocaj para melahuac na? <sup>39</sup> Xiquitaca nomax huan noicxihua campa calajqui lavos. Nelía na. Techitzquica huan xijmachilica. Se ajacat amo quiipyia inacayo huan iomiyo quej anquiitaj nijpiya.

<sup>40</sup> Huan quema quiijtohuayaya ni camanali, quinnextili imax huan iicxihua. <sup>41</sup> Huan amo quineltocayayaj pampa tahuel paquiyayaj huan san quitachiliyayaj huan quitetzaitayayaj. Huan yeca Jesús quinilhui:

—¿Amo teno anquipiyaj nica para nijcuas?

<sup>42</sup> Huan inijuanti quimacaque se michi cati tacatczoli huan se quentzi necti. <sup>43</sup> Huan quiitzqui huan quicuajqui iniixpa. <sup>44</sup> Huan quinilhui:

—Quema noja niitztoya amohuaya, nimechilhui monequiyaya para ma panos nochí cati ijcuilijtoc ten na ipan itanahuatil Moisés, huan ipan Salmos, huan ipan iniamahua nopa tajtolpanextiani.

<sup>45</sup> Huan teipa Jesús quintapohuili inintalnamiquilis para ma quimachilica Icamanal Toteco. <sup>46</sup> Huan quinilhui:

—Quej ni ijcuilijtoc para nopantisquía na niCristo. Monejqui nitaijyohuis huan nim quis huan ica eyi tonati monejqui nimoyolcuis sempa, huan quej nopa elqui. <sup>47</sup> Huan ama monequi amojuanti xijpehualtica nica Jerusalén huan xitepohuilica ni camanali ica notequiticayo. para masehualme ma moyolpataca huan

ma quicahuaca intintacolhua huan Toteco quintapojpolhuis. Huan teipa xitepohuilitij ipan nochí talme ipan taltipacti. <sup>48</sup> Anquiitztoque ni tamanti huan ama monequi anteyolmelahuase cati anquiitztoque. <sup>49</sup> Nechcatitoc para njtitanis Itonal Toteco ipan amojuanti quej noTata amechtencahuilijtoc amechmacas. Huajca ximocahuaca ipan altepet Jerusalén hasta yaya ajsis huan amechtemitis ica chicahualisti ten ilhuicac.

*Jesús tejcoc ilhuicac  
(Mr. 16:19-20)*

<sup>50</sup> Huan Jesús quinhuicac imomachtijcahua hasta Betania huan momatananqui huan quintiochijqui. <sup>51</sup> Huan quema noja quintiochihuayaya, quistejqui huan tejcoc ilhuicac. <sup>52</sup> Huan imomachtijcahua quihueyichijque huan teipa tacuepilijque altepet Jerusalén ica hueyi paquilisti. <sup>53</sup> Huan mojmosta itztoyaj ipan nopa hueyi israelita tiopamit quipaquilismacayayaj huan quihueyichihuayayaj Toteco Dios. Quej nopa ma eli.

**Icamanal toteco; Santa Biblia  
Bible without Deuterocanon in Nahuatl, Huasteca  
Central (MX:nch:Nahuatl, Huasteca Central )**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

**Copyright Information**

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clix

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

c565d9f9-d202-544b-b78a-3c93df26508e